

Wam Korīt Pawre kot Korīt kām Jejus kôt hkwÿjê hwÿr kagà nê mēnh

Pawre na pre kagàja nhĩpêx. Jejus nhĩ hã kapêr jarēnh o pa xwÿnhjê hõ na pre. Na pre hipêx nê ma krĩ pê Korīt kām Jejus krajê hwÿr kumê. Nê kagàja kamã mē kām tanhmã mēmoj tã karõ hto. Na pre mē kot àhpumunh tÿx ã amnhĩ to jarkrar o pa nê mē kām kapêr. Nê tanhmã amnhĩ tomnuj to nê mē kām kapêr. Nê mē hprõ nê mē mjên xwÿnhjaja tanhmã wa kot axpên nhĩpêx to hã mē kām karõ. Nê mē kot Tĩrtũm mã mex o mex ã harēnh kaxyw axpên wÿr mē pikuprõnh nê tanhmã amnhĩ nhĩpêx to hã nhũm mē kām karõ. Æ na pre Pawre mē kām mēmoj tã karõ nê hã kagà anê. Nê mē kām:

¹ Pa Korīt kām Jejus kôt ixkwÿjaja. Xà mē amex? Ot pa mē awÿr kagàja nhĩpêx nê kumê. Ixpê Pawre na pa Kris kôt mē pahtõ Sostenes mē wa awÿr ixpêr mē. Tã kagàja nhĩpêx nê mē awÿr kumê. Tĩrtũm na pre ixte Jejus Kris nhĩ hã mē ajahkre ho ri ixpa kaxyw ixãm. ²Tã ot pa mē awÿr kagà nhĩpêx nê mēnh mã. Korīt kām ixpyrà nê mē apê Tĩrtũm krajê hwÿr.

Tĩrtũm kot amnhĩ kaxyw mē axunhwÿr jakamã na ka prem amnhĩ tomnuj kaga nê Kris kôt amnhĩ xunhwÿ nê hkôt amnhĩ nhĩpêx mex o ri apa. Krĩ piitã hkôt mē kot amnhĩ to Jejus Kris wÿr o mē pa xwÿnhjê pyrà nê. Mē panhõ Pahihti Jejus Krisja ãm pixi mex na.

³ Nê Tîrtûm kêp Měpahpām maati nê Jejus Kris kêp mẽ panhõ Pahihiti jakamã na pa hte mẽ ato wa hwÿr rãhã o ri ixpa nê mẽ ato wa hwÿr o:

—Kwa Tîrtûm mẽ Jejus wa. Kêr ka wa Korît nhõ xwÿnhjê kutã anojarêt rãhã ho wa ri apa. Nê mẽ ho mex rãhã nê. Kê mẽ amnhĩ tã war apumunh kôt ri hamakêtkati nê hkĩnh nê àmnhĩx tanhmã ri amnhĩ nhĩpêx to ho ri pa. Anê.

Tîrtûm kot Jejus Kris kukwak ri mẽ pahto mex ã harênh

Sikûn Pêtre 1.2; Wam Tesarôn 5.23-24

⁴ Nê mẽ ate amnhĩ kaxyw Jejus Kris kôt ajamaxpêr o ri apa jakamã na hte Tîrtûm mẽ ato mex nê. Tã pa hte kãm amnhĩ jarênh kaxyw nê kãm mẽ ajarênh o:

—Pa Tîrtûm. ãm hãmri na ka pre Korît nhõ xwÿnh kwÿjê ho akra. Nã ja mex o mex. Anê.

⁵ Nê ra mẽ ate Kris kôt amnhĩ xunhwÿr jakamã na ka mẽ ra amex kumrêx nê ri apa. Nê aprĩ hã Kris kot amnhĩ nhĩpêx pumunh mex nê aprĩ hã akwÿjê mã harênh o ri mẽ hkôt apa. ⁶ Na pa pre mẽ awÿr mõ nê mẽ amã Kris kot amnhĩ nhĩpêx ã harênh o ri mẽ akôt ixpa. Ka prem inhma nê hkôt amnhĩ xunhwÿr tÿx kurê kumrêx. ⁷ Jakamã nhũm Tîrtûm mẽ ate kãm tanhmã amnhĩ nhĩpêx to ho apa kaxyw mẽ ato mẽ axihtÿx. Nê kaxyw mẽ amã mẽ ate axpên to mex xà piitã mẽ amã kugõ. Mẽ ate Jejus kot akupÿn mẽ pahwÿr wrÿk jamâr pê hapêr arît o apa pê tanhmã kãm axpên nhĩpêx to ho apa kaxyw. ⁸ Kõja Tîrtûm tanhmã mẽ akrã hto ka mẽ hkôt pix mã ri amnhĩ nhĩpêx rãhã nhũm Pahihiti

Jejus Krisja akupÿn mẽ pahwÿr wrÿ. Hãmri nẽ mẽ ate amnhĩ nhĩpêx ã mẽ apumu nẽ mẽ ajarênh o:

—Nà ãm hãmri na hte jajaja amnhĩ to mex pix o ri pa. Anẽ.

⁹ Nẽ koja Tĩrtũm ra kot amnhĩ jarênh xà hkôt mẽ ato mex nẽ. Ra kot mẽ ate Pahihti Jejus Kris kôt apa kaxyw amnhĩm mẽ axunhwÿr jakamã koja ra kot amnhĩ jarênh xà hkôt mẽ ato mex rãhã nẽ.

Mẽ pahte mẽmoj tă axpẽn pê pahpigrành kêt ã mẽ pamã karõ

Rômãn 15.5-6; Sikũn Korît 13.11; Epes 4.1-6; Piri-pos 2.1-4; Wam Pêtre 3.8

¹⁰⁻¹¹ E Kris kôt ixkwÿjaja. Na ka xep htem mẽmoj tă axpẽn mã axàkjêr pix o ri apa nhũm pre Krojre hkwÿjaja amnẽ ixwÿr pøj nẽ inhmã mẽ ajarê. Kwa nà mẽ ã amnhĩ nhĩpêx anhÿr kêt nẽ. Kêr ka mẽ axpẽn kôt ri amnhĩ nhĩpêx rãhã ho ri apa. Nẽ axpẽn kôt ri ajamaxpêr rãhã nẽ. Te ixkre tipxi kamã mẽ ri apa pyràk o mãn kêt mẽ axpẽn nhĩpêx o ri axpẽn kôt apa. Nẽ mẽ axpẽn kutã anojarêt rãhã ho ri apa. No mẽmoj tă axpẽn mã axàkjêr pê axpẽn pê apigrành kêt nẽ. Na pa Pahihti Jejus Kris nhÿ hã mẽ amã ã ja hã karõ anẽ.

¹² Nẽ na ka xep htem ahpÿnhã ri mẽ apê mẽ ixkwÿ hã amnhĩ jarênh o ri apa. Jao mẽ akwÿjaja pa ixkôt ri amnhĩ nhĩpêx xwÿnh ã amnhĩ jarê. Nẽ mẽ akwÿjaja axtem Apor kôt ri amnhĩ nhĩpêx xwÿnh ã amnhĩ jarê. Nẽ mẽ akwÿjaja axtem Simãw Pêtre hkôt amnhĩ nhĩpêx xwÿnh ã amnhĩ jarê. Nẽ mẽ akwÿjaja axtem Kris kôt amnhĩ nhĩpêx o ri apa xwÿnh ã amnhĩ jarê. ã na ka xep htem ahpÿnhã amnhĩ jarênh anhÿr o ri pa.

13 Kwa nà ka mẽ ã ahpÿnhã amnhĩ jarēnh anē nē te mẽ ate Kris o apigrānh pyrāk o hipêx. Kwa mon ka hte mẽ akwÿjaja apê ixkwÿ hã amnhĩ jarē? Xà pa na pa pre pĩ kahpa hã ajêt nē mẽ anē ty? Nà Kris pix na pre mẽ panê hã ajêt nē ty. Xà mẽ apê pa ixkwÿ hã amnhĩ jarēnh kaxyw na prem mẽ akrã kumrã? Nà mẽ apê Kris kwÿ hã amnhĩ jarēnh kaxyw na prem ã mẽ anhĩpêx anē. Mẽ kot ja hã mẽ apumunh xwÿnhjaja kot mẽ apê Kris kwÿ hã mẽ apumunh kaxyw. Tã na ka xep htem axtem nē ã ri ahpÿnhã mẽ kãm amnhĩ jarēnh anhÿr o ri apa.

14-15 Kop ãm ixte amnhĩ kôt mẽ axunhwÿr prãm ronhÿx pa mẽ ato mẽ axohtô nē mẽ akrã kumrã nē mẽ amã: “E ra mẽ apê ixkwÿ na ka mẽ.” Anē. Nom na pa pre ã mẽ amã ixkapēr anhÿr kêt nē. ãm hãmri na pa pre ãm mẽ ato grêre nē mẽ akrã kumrã. ãm Kripti mẽ Gajre wa pix. 16 Ku nē xep mãânēn Estepti nē kaxyw mẽ hkwÿjaja. ãm jajê pixjaja. Nom ko apu axte mẽ hkwÿ ko. Ixte mẽ hkrã kumrãr xwÿnhjê mã ijamaxpēr tÿx kêt. 17 Na pre Kris ixte mẽ hkrã kumrãr o ri ixpa kaxyw ixãm kêt nē. ãm ixte mẽ kãm kapēr jarēnh o ri mẽ hkôt ixpa pix kaxyw na pre ixãm.

Nē na pa hte amnhĩ krã hkôt ri ixujarēnh o ri mẽ akôt ixpa hkêt nē. Kot pa ã amnhĩ nhĩpêx anē nhũm mẽ ixkapēr mex ã inhma nē pa ixkôt amnhĩ xunhwÿ. Ja pymaj na pa hte amnhĩ krã hkôt ri tanhmã ixujarēnh to ho ri ixpa hkêt nē. Na pa hte ãm ixprĩ hã Kris kot tanhmã mẽ panê amnhĩ nhĩpêx to hã harēnh o ri mẽ hkôt ixpa. Mẽ pahpiitã mẽ panê htyk ã harēnhja pa hte mẽ kãm harē. Mẽ kot hprĩ hã mar nē hkôt amnhĩ xunhwÿr kaxyw.

Jao amnhĩ krãm mẽ ujarënh mexta jagjênh nê hã no htỳx kaxyw. Pa ja hã mẽ omu nê ixkĩnh nê ijamaxpêr o:

—Na htem ixkapêr ma nê Jejus kôt amnhĩ xunhwỳr kurê kumrêx. Nà ãm hãmri na pa hte mẽ kãm ixkapêr kaprỳ ho ri ixpa hkêt nê. Anê.

¹⁸ No kêt mẽ pahte Tĩrtũm kot mẽ pahto hkra xwỳnhjaja ra mẽ pahte Kris pĩ kahpa hã mẽ panê htyk ã harënh mar nê pahkĩnh nê papa xwỳnh na pu mẽ. Jakamã na pu htem pajamaxpêr o:

—Nà ãm hãmri na Tĩrtũm Kraja htyk kukwak ri mẽ ixto mex nê mẽ ixto hkra. Mẽ ujarënhja mex kumrêx. Anê.

No kêt mẽ kêp hkra hkêt xwỳnhjaja na htem tee ri Kris tyk ã harënh ma nê hamaxpêr o:

—Tk. Tanhmã kot kêt we amnhĩ to nê mẽ panê ty? ãm amarĩ mẽ kot amnhĩ krã hkôt pĩ kahpa hã nhôr nê hpĩr kênã. Anê.

Tĩrtũm kra hkêt xwỳnhjê jarënh

Matêwre 11.25-26; Wam Korît 3.19

¹⁹ Nê Tĩrtũm kapêr ã kagà htũm kot mẽ kêp hkra hkêt xwỳnhjê jarënh kot:

Mẽ kot htỳx ri àhpumunh tỳx ã amnhĩ to jarkrar o pa htã kot paj mẽ kêp ja ho ijapêx pa nhũm mẽ ã amnhĩ jarënh anhỳr kaprỳ. Anê.

²⁰ Jakamã mẽ àhpumunh tỳx ã mẽ kot amnhĩ to jarkrar xwỳnhjaja nê mẽ kot Mojes kapêr o mẽ ahkre ho ri mẽ pa xwỳnhjaja nê mẽ kapêr rũnh xwỳnhjaja. Mẽ kot Tĩrtũm Kra hkôt amnhĩ xunhwỳr kêt jakamã te mẽ àhpumunh kêt pyràk. Tĩrtũm kra hkêt xwỳnhjaja kot mẽ àhpumunh tỳx ã mẽ harënh tã no ãm Tĩrtũm noo mã te mẽ àhpumunh

kêt pyrâk. Nê te htÿx ri mẽ kot amnhĩ nhĩpêx o pa pyrâk. ²¹ Tĩrtũm àhpumunh o àhpumunh jakamã na pre ra mẽ hkukamã hamaxpêr o:

—Nà kot paj mẽ àhpumunh tÿx ã mẽ omunh xà hkôt mẽ ho ixkra hkêt nê. ãm mẽ kot ixkra Jejus kot mẽ nê htyk ã harênh mar nê amnhĩ kaxyw hkôt hamaxpêr pix ã mẽ omunh xà hkôt kot paj mẽ ho ixkra. Anê.

²²⁻²⁴ No Ijaewjaja kãm amnhĩ krã hkôt pix mã amnhĩ nhĩpêx prãm jakamã na pa hte mẽ ixpê Jejus kwÿjaja mẽ hwÿr mra nê mẽ kãm Kris kapêr jarênh o ri ixpa nhũm mẽ inhma nê ãm mẽ inhma. Nê te mẽ kot mẽ inhmar kêt pyrã nê mẽ inhmã:

—Tk. Nà kot paj mẽ tokyx axujarênh kôt amnhĩ nhĩpêx kêt nê. Kot kaj mẽ inhmã mẽ ixte aa mẽmoj pumunh kêt õ ho anê pa mẽ ja hã apumu nê axihtÿx ã apumu nê rĩ kormã hkôt amnhĩ nhĩpêx.

Anhÿr o inhmã kapêr. Tã no pa mẽ kãm ã amnhĩ nhĩpêx anhÿr kêt nê. ãm Kris kot mẽ panê pĩ kahpa hã htykja pix pa htem mẽ kãm harênh o ri ixpa. Ja kamã nhũm mẽ hkwyjaja mẽ inhma nê ãm mẽ inhma nê Kris xihitÿx kêt ã ãm amarĩ htyk ã harê. No mẽ hkwyjaja. Tĩrtũm kot amnhĩ kaxyw mẽ unhwÿr xwÿnhjaja na htem mẽ kurom mẽ inhma nê ra mẽ inhmar tÿx kurê kumrêx. Nê mẽ inhmã kapêr o:

—Nà ãm hãmri na Krisja Tĩrtũm pyrã nê hihtÿx o hihtÿx. ãm hãmri na ka ã harênh anê. Anê.

No Ijaew kêt xwÿnhjaja na Ijaew pyrã nê kãm amnhĩ krã hkôt amnhĩ nhĩpêx o pa hprãm kêt nê. Nê mẽ kãm mẽ àhpumunh tÿx pix prãm o pa. Jakamã na pa htem mẽ kãm Kris kapêr jarênh o

ri mẽ hkôt ixpa nhũm mẽ hkwỳjaja mẽ inhma nẽ
Ijaew kwỳjê pyrà nẽ ãm mẽ inhma nẽ mẽ inhmã:

—Tk. Nà na ka htem ãm ri axêx o ri apa. Kot
pa mẽ akapêr mar kêt nẽ. Kot paj mẽ axàhpumunh
tỳx ã mẽ apumu nẽ rĩ kormã mẽ ama nẽ mẽ akôt
amnhĩ nhĩpêx.

Anhỹr tã pa mẽ ãm arĩ Kris kot mẽ panê htykja
pix pa mẽ kãm harênh o ri mẽ hkôt ixpa. Nhũm mẽ
hkwỳjaja mẽ inhma nẽ mẽ inhmã:

—Nà mẽ axàhpumunh kêt jakamã na ka htem
atỳx ri ã ja jarênh anẽ.

Anhỹr tã no nhũm mẽ hkwỳjaja. Tĩrtũm kot
amnhĩ kaxyw mẽ unhwỳr xwỳnhjaja na htem mẽ
inhma nẽ mẽ inhmã kapêr o:

—Nà ãm hãmri na ka mẽ ã Krisja jarênh anẽ.
Tĩrtũm pyrà nẽ àhpumunh o àhpumunh kênã. Anẽ.

²⁵ Tĩrtũm mẽ Jesus wa mẽ pakurom àhpumunh o
àhpumunh nẽ hihtỳx o hihtỳx.

Tĩrtũm mẽ parom hihtỳx o hihtỳx ã harênh

Matêwre 11.25; Sikũn Korõt 12.7-10; Xiakre 2.5

²⁶ E Kris kôt ixtõ nẽ ixtõxjaja. Amnepê mã Tĩrtũm
kot amnhĩm mẽ axunhwỳrta ã tanhmã na ka prem
amnhĩ nhĩpêx to ho ri apa? Nà na ka prem axohtõ
nẽ jar mẽ noo mã axàhpumunh kêt nẽ ri apa. Nẽ
mẽ apê pahi hkêt nẽ ri apa. Mẽ axohtõ nẽ amnhĩ
to hkryre nẽ ri apa. ²⁷ Tã nhũm Tĩrtũm amnhĩ
kôt mẽ ate amnhĩ to hkryre xwỳnhjê xunhwỳ.
Koja nhỹrmã kot tanhmã mẽ pahpiitã mẽ pajarênh
to xà hã arĩgrota kato hãmri nhũm mẽ àhpumunh
tỳx ã amnhĩ to jarkrar xwỳnhjaja Tĩrtũm kot mẽ
kurom mẽ pahto hkra hã mẽ pahpumu hãmri nẽ
tee ri amnhĩ kukamã hamaxpêr nẽ amnhĩ kamã

hpijaàm tỳx nē. Nē mẽ hihtỳx ã amnhĩ to jarkrar xwỳnhjaja haxwỳja. Nhũm Tĩrtũm kot mẽ kurom mẽ pahto hkra hã mẽ pahpumu nē tee ri amnhĩ kukamã hamaxpēr nē amnhĩ kamã hpijaàm tỳx nē.

²⁸ Na hte Tĩrtũm amnhĩ kaxyw mẽ kot amnhĩ to hkryre xwỳnhjê xunhwỳ. Nē mẽ kot mẽ kamã kahak o pa xwỳnhjê xunhwỳ. Jar pyka ja kamã mẽ hkwy kot mẽ hkaga htã nhũm Tĩrtũm amnhĩ mã mẽ unhwỳ. Mẽmo kaxyw na hte ã amnhĩm mẽ unhwỳr anē? Nà mẽ kot nhỹrmã tee ri mẽ àhpumunh tỳx ã amnhĩ jarēnh xwỳnhjê pumunh nē axpēn mã mẽ harēnh o:

—Kwa mẽ pahte mẽ àhpumunh tỳx ã mẽ harēnh tã nhũm Tĩrtũm mẽ pahpyrà nē amnhĩ kaxyw mẽ unhwỳr kêt nē. Nà te mẽ àhpumunh kêt pyràk.

Anhỹr o axpēn mã mẽ harēnh kaxyw na pre Tĩrtũm amnhĩm mẽ kot amnhĩ to hkryre xwỳnhjê xunhwỳ. ²⁹ Jakamã kot puj mẽ nhỹrmã Tĩrtũm mã amnhĩ to jarkrar pē tanhmã kãm amnhĩ jarēnh to hkêt nē. Rỳ kãm:

—Kwa ga ixpumu Tĩrtũm. Na pa hte ã amnhĩ nhĩpêx anē nē ã amnhĩ nhĩpêx anē. Kwa ja hã ixpumu nē ixto akra nà?

Anhỹr o amnhĩ to hwỳr kêt nē. ³⁰ ãm Jejus pix kukwak ri na hte Tĩrtũm mẽ pahto hkra. Tãm na pre Tĩrtũm noo mã amnhĩm mẽ paxunhwỳ. Mẽ pahte uràk nē pahpê hkra kaxyw. Jakamã na pu htem ãm pix kukwak ri amnhĩ nhĩpêx mex o ri papa. Nhũm mẽ pamã àhpumunh tỳx xà hkwy gō. Tã ra kot mẽ pahte amnhĩ tomnuj pē mẽ papytār jakamã kot puj mẽ nhỹrmã pahtyk tã no ãm akupỹm pahtĩr nē Tĩrtũm mẽ wa kuri pahtĩr tũm

nē pamex kumrēx nē papa ho papa. ³¹ Tā ã Jejus kot mē panhīpēx kot anhÿr jakamã Tirtũm kapēr ã kagà htũm kot ja jarēnh kot:

Kot ka mē amã mēmoj tā jarkrar prãm nom kêr ka mē kamjaja amnhĩ to jarkrar kêt nē. Mē panhō Pahihtu ra kot mē panē tanhmã amnhĩ nhīpēx toja pix ã tanhmã ho jarkrar to ho ri apa. Anē.

2

*Pawre kot tanhmã Kris jarēnh to hã harēnh
Sikũn Korīt 4.1-7; Wam Pētre 3.15*

¹⁻² E Kris kôt ixtō nē ixtōxjaja. Amnepē mã ixte mē awÿr inhmōrta ã na pa pre inhnojarēt nē ijamaxpēr o:

—Kot paj ma mē hwÿr mō nē mē kãm Kris kapēr jarē. Kot amnhĩ grōnh kôt mē inhnē htykja pa mē kãm harē. ãm ja pix jarēnh o ri mē hkôt ixpa. Nom kot paj mē kapēr japjē xwÿnhjē pyrã nē mē kãm ixkapēr japjē hkêt nē. Rÿ mē urak nē te ixãhpumunh tÿx o ri ixkapēr japjē pyrãk o ri mē kãm ixkapēr japjē hkêt nē. Kot paj ãm ixkatat kôt ri mē kãm tanhmã Jejus jarēnh to pix o ri mē hkôt ixpa.

Anhÿr o mē akukamã ijamaxpēr. Hãmri nē ma mē awÿr mō nē mē awÿr pōj nē mē amã Jejus kot mē panē htyk nē akupÿm htírja pix jarēnh rãhã ho ri ixpa. ³ Na pa pre tee ri amnhĩ kukamã ijamaxpēr nē ijamaxpēr o:

—Hêxta waa nē. Tanhmã kot pa we mē kãm Tirtũm kapēr jarēnh to nhũm mē inhmar tÿx nē hkôt amnhĩ xunhwÿr kurê kumrēx wehe? Kot paj amnhĩ krã hkôt mē kãm harēnh kêt nē. Ja kaxyw

ijamaxpēr tỳx kêt kênã. Kot paj amnhĩ krã hkôt mẽ kãm harẽ nhũm mẽ ãm inhma nẽ hkôt amnhĩ xunhwỳr kêt nẽ. Nà kot paj Tĩrtũm nhỹ hã mẽ kãm tanhmã ixkapēr to kê tãm tanhmã mẽ hkrã hto kê mẽ inhma nẽ hkôt amnhĩ xunhwỳr japêr.

Anhỹr o ijamaxpēr. ⁴ Nẽ mẽ ate inhmar kaxyw na pa pre ixêx rom tanhmã mẽ ano kupyw to ho ri ixpa hkêt nẽ. Rỳ mẽ pajaja mẽ ixàhpumunh xà hkôt tanhmã mẽ amã ixkapēr to hkêt nẽ. Na pa pre ãm Tĩrtũm Karõ nhỹ hã mẽ amã awjarẽ. Mẽ ate mar nẽ hihtỳx o hihtỳx ã omunh kaxyw. ⁵ Jakamã na ka prem Tĩrtũm xihtỳx ã omu nẽ amnhĩ kaxyw hkôt ajamaxpēr kurê kumrêx. No pa ixàhpumunh tỳx ã ixpumunh kôt ixkôt ajamaxpēr kêt nẽ. Na ka prem ixkapēr ma nẽ ajamaxpēr o:

—Nà Tĩrtũm na mẽ parom àhpumunh o àhpumunh nẽ hihtỳx o hihtỳx.

Anhỹr o ajamaxpēr kôt ajamaxpēr kurê kumrêx.

Tĩrtũm Karõ kot mẽ pamã àhpumunh xà nhõr ã harẽnh

Matêwre 7.6; Juãw 14.22, 16.13-15; Xiakre 3.13-18

⁶ Nẽ na hte Tĩrtũm kra hkwyjaja Tĩrtũm kot amnhĩ nhĩpêx ã omunh mex. Nẽ hamaxpēr ã omunh mex. Jakamã na pa hte mẽ ahkre japjê ho mẽ hkôt ixpa. Nom jar pika ja kamã mẽ pajamaxpēr tỳx xà ho mẽ ahkre hkêt nẽ. Rỳ pika piitã hkôt mẽ utàr xwỳnhjê jamaxpēr tỳx xà ho ri mẽ ahkre ho ri ixpa hkêt nẽ. Kojã nhỹrmã mẽ àhpumunh xàja mẽ kêp hapêx pa. ⁷ Jakamã na pa hte ãm Tĩrtũm xàhpumunh xà pix o mẽ ahkre o ri ixpa.

Amnepê mã kormã mẽmoj piitã hkêt ri na pre Tirtũm amnhĩ kukamã amnhĩ jarẽnh o:

—Mẽ kot amnhĩ kaxyw Ixkra hkôt mẽ hamaxpěr o mẽ pa xwýnhjaja kot paj mẽ ho ixkra nhũm mẽ mex kumrẽx nẽ pa ho pa.

Anhỹr o mẽ harẽ. Nom mẽ kot hkôt amnhĩ xunhwýr kêt xwýnhjaja nhũm kormã mẽ kãm ja ho amnhĩrĩt kêt nẽ. Tã ja na pa hte ra mẽ kãm harẽnh rãhã ho ri mẽ hkôt ixpa nhũm mẽ Tirtũm kãm mẽ pahto hkra hprãm hã harẽnh ma. ⁸ Nom pika piitã hkôt mẽ ho amnhĩptàr xwýnhjaja na mẽ kormã ja mar kêt nẽ. Kêp apu mẽ kot mar ronhỹx prem pĩ kahpa hã mẽ panhõ Pahihti nhôr nẽ hpĩr kêt nẽ. Mex o mex tã nhũm prem axtem nẽ ã hipêx anẽ. ⁹ Mẽ kot mẽmoj mex pumunh kêt tã Tirtũm kapěr ã kagà htũm kot mẽmoj mex jarẽnh kot:

Na pre Tirtũm mẽ kãm hkĩnh xwýnhjê kutêp mẽmoj mex kwý jaxwý nhũm mex o mex nẽ mẽ ahã hikwỹ.

Aa mẽhõ kot mẽmoj mex o mexja pumunh kêt.

Nẽ aa mẽhõ kot ã mẽmoj kot anhỹr pumunh kêt.

Nẽ aa ã mẽmoj mex kot anhỹr kukamã hamaxpěr kêt.

Tã nhũm Tirtũm mẽ kutêp hkwy jaxwý.

Anhỹr o kot harẽnh tã no nhũm mẽ kot hkôt amnhĩ xunhwýr kêt xwýnhjaja ã kapěr anhỹrja mar kêt nẽ.

¹⁰ Mẽ pamã na pre Tirtũm ja ho amnhĩrĩt. Na pre ra mẽ pamã Karõ gõ nhũm mẽ pamã gjêx o mẽ pamã mẽmoj to amnhĩrĩt mex nẽ. Tirtũm Karõja àhpumunh týx o àhpumunh týx. Nẽ kot hprĩ hã Tirtũm jamaxpěr pumunh par. ¹¹ No mẽ papajaja na pu htem axpẽn jamaxpěr kôt axpẽn pumunh kêt nẽ. Na pu htem papam amnhĩ jamaxpěr ã

amnhĩ pumu. Ja pyrà nê Tĩrtũm Karõ pix na hte Tĩrtũm jamaxpêr pumunh. ¹² No mẽ pahpê hkrajaja na hte mẽ pahkarõja pix mẽ pakamã pa hkêt nê. Na hte mãânên Tĩrtũm Karõja mẽ pakamã pa nê mẽ pamã tanhmã mẽmoj to amnhĩrĩt to ho mẽ pahkõt pa. Nê Tĩrtũm kot mẽ pakutêp mẽmoj mex jaxwýrja nhũm ja kukamã mẽ pamã harênh o amnhĩrĩt.

¹³ Jakamã na pa htem amnhĩ krã hkõt ri mẽ kãm ixujarênh kêt nê. ãm Tĩrtũm Karõ nhỹ hã na pa hte ixprĩ hã mẽ kãm kapêr jarênh o ri mẽ hkõt ixpa. Ra Tĩrtũm Karõ kot mẽ amã gjêx xwýnhjê mã pa ý hã ixkapêr. ¹⁴ No mẽ kãm Tĩrtũm Karõ kapêr mar prãm kêt xwýnhjaja na htem Tĩrtũm kot amnhĩ nhĩpêx pumu nê hprĩ hã omunh kêt nê. Mẽ kãm kapêr mar prãm kêt jakamã na htem ri kot tanhmã mẽ pahto mex to hã harênh ma nê hamaxpêr o:

—Tk. Kwa mo kaxyw na htem ri ã Tĩrtũm jarênh anê? Tanhmã kot we amnhĩ to nê mẽ pahto mex? Nà kot anhýr kêt. Anê.

¹⁵ Nom mẽ pahpê Tĩrtũm kra hkwy hã mẽ pahte Karõ kapêr mar mex xwýnhjaja na pu hte mẽ kurom Tĩrtũm kot amnhĩ nhĩpêx ã omunh mex nê. Nê Karõ xô ri mar mex nê nhũm mẽ kot Karõ kapêr mar kêt xwýnhjaja tee ri ã mẽ pahte amnhĩ nhĩpêx anhýr ã mẽ pahpumu. Nom hprĩ hã mẽ pahte Tĩrtũm kõt amnhĩ nhĩpêx pumunh kêt nê. ¹⁶ Tĩrtũm kapêr ã kagà htũm kot ja jarênh kot:

Mêhõ na kot Tĩrtũm jamaxpêr pumunh?

Nê mêhõ na pre we kãm hamaxpêr gõ?

Nà amrakati kumrêx. Tapxipix na àhpumunh tỳx o àhpumunh tỳx. Anê.

Tã mẽ papajaja mẽ pahte Tĩrtũm Karõ kapěr mar tỳx xwỳnhjaja na pu htem Kris xõ ri pahprĩ hã hamaxpěr kõt omunh mex nẽ.

3

Mẽ kot Tĩrtũm mã tanhmã amnhĩ nhĩpêx to xwỳnhjê jarênh

Wam Korîť 14.20; Karatas 5.16-21; Epes 4.14; Eprêw 5.11

¹ E Kris kõt ixtõ nẽ ixtõxjaja. Pa mẽ amã mẽmoj jarê ka mẽ inhma nẽ kãm ajamaxpěr. Nà amnepê mã kormã mẽ ate Kris kõt amnhĩ nhĩpêx tohtuj anhỹrta ã tanhmã na ka prem amnhĩ nhĩpêx to ho ri apa wehe? Na ka prem arĩ ajamaxpěr tũm kõt pix mã amnhĩ nhĩpêx. Kormã mẽ ate Tĩrtũm Karõ hkõt amnhĩ nhĩpêx mex kêt jakamã na ka pre htem mẽhprĩre kot amnhĩ nhĩpêx pyræk o amnhĩ nhĩpêx. Nẽ mẽ uræk nẽ kormã mẽmoj piitã omunh kêt nẽ. Jakamã na pa pre mẽ amã ixujarênh kaxyw nẽ te mẽ ate kormã Tĩrtũm kapěr mar kêt xwỳnhjê pyræk o mẽ anhĩpêx nẽ mẽ amã tanhmã ixujarênh to. ² Mẽ hkaràre na htem mẽ hkà kagô pix kaô nẽ kormã mẽ apkur xà mex kur kêt nẽ. Ja pyrà nẽ na pa pre te ixte mẽ ato hpijaôr pyrà nẽ mẽ amã Tĩrtũm kapěr piitã harênh par kurê kumrêx kêt nẽ. ãm mẽ amã hkwỳ pix jarê ka prem ama nẽ Jejus kõt amnhĩ xunhwỳ. Tã na pa hte arĩ mẽ amã hkwỳ pix jarênh o ri ixpa nẽ kormã piitã ho mẽ ajahkre jatur xàm mẽnh kêt nẽ. ³ Na ka htem arĩ te mẽ apê Kris kwỳ hkêt pyræk o amnhĩ nhĩpêx o apa. Nẽ mẽmoj kõt axpẽn kãm agryk axpẽn mã axàkjêr o

apa. ã amnhĩ nhĩpêx anhỹr jao arĩ mẽ ate amnhĩ nhĩpêx tũm kôt amnhĩ nhĩpêx rãhã nẽ.

⁴ Na hte mẽ akwỳjaja amnhĩ jarẽnh o: “Ixpê Pawre hkwỳ na pa.” Anẽ. Nẽ mẽ akwỳjaja amnhĩ jarẽnh o: “Pa na ixpê Apor kwỳ na pa.” Anẽ. Kwa na ka htem ã amnhĩ jarẽnh anhỹr o te mẽ apê Kris kwỳ hkêt pyræk. ⁵ Apor mẽ pa ãm wa ixte Tĩrtũm kapêr o mẽ ajahkre xwỳnh pix na pa wa. Wa ixpê mẽ anhõ pahĩti hkêt kênã kot ka kêt mẽ axtem nẽ mẽ apê ahpỹnhã wa ixkwỳ hã amnhĩ jarẽ. Na pa pre wa mẽ amã Tĩrtũm kapêr jarẽnh o ri mẽ akôt ixpa ka prem wa inhma nẽ amnhĩ kaxyw hkôt ajamaxpêr tỳx nẽ. Nẽ hkôt amnhĩ xunhwỳ nom wa pa wa ixkôt amnhĩ xunhwỳr kêt nẽ. Na pa wa ãm Tĩrtũm kapêr o mẽ ajahkre nom amnhĩ kôt mẽ axunhwỳr kêt nẽ.

⁶⁻⁹ E pa ixprĩ hã mẽ amã war amnhĩ jarẽ ka mẽ inhma. Te wa ixpê Tĩrtũm pur kãm wa ixàpênh xwỳnh pyræk no mẽ kajaja te mẽ apê hpur pyræk. Na htem hpur karê nhũm hirã nhũm mẽ kamã ahkre ho pa. Ja pyrà nẽ na pa pre ixkumrêx mẽ awỳr ixpa nẽ mẽ amã Tĩrtũm kapêr jarẽnh o ri mẽ akôt ixpa. Te mẽ kot pur kãm ahkre ho ri pata pyræk. Tã nhũm Apor ixpãnhã ma mẽ awỳr pa nẽ te mẽ kot pur karêta pyræk o mẽ anhĩpêx nẽ mẽ amã Tĩrtũm kapêr o mẽ ajahkre mex o ri pa. Xà na hte pur karêr xwỳnhja rỳ kamã ahkre xwỳnhja tãm tanhmã mẽmo hy hto nhũm ra higrôt nẽ hprêk nẽ ô? Nà na htem ãm ahkre hpa nhũm arĩ hikwỳ. Nhũm Tĩrtũm tãm tanhmã hyta to nhũm higrôt nẽ hprêk nẽ ô. Ja pyrà nẽ na hte Tĩrtũm mẽ ho hkra nẽ tanhmã mẽ ho nhũm mẽ amnhĩ kaxyw hkôt hamaxpêr tỳx nẽ hkôt amnhĩ nhĩpêx mex o

pa. Nom mẽ kãm harẽnh o pa xwỳnhhta kôt amnhĩ xunhwỳr kêt nẽ.

Nẽ na hte pur karêr xwỳnh rỳ kamã ahkre xwỳnhja tãm tanhmã hyta to nẽ ho htĩr kêt nẽ. Tĩrtũm pix na hte tanhmã ho nhũm higrõt. Ja pyrà nẽ na pa hte Tĩrtũm kapẽr o mẽ ajahkre o ri mẽ akôt ixpa nom pa tanhmã mẽ ato ka mẽ apê Tĩrtũm kra nẽ ri apa hkêt nẽ. Tanhmã kot pa mẽ ato ka mẽ apê hkra? Tapxipix na kot mẽ pahto hkra kaxyw àhpumunh. Nẽ tapxipix na hte tanhmã mẽ pahkrã hto pu mẽ kãm hprãm xà hkôt amnhĩ nhĩpêx mex o ri papa.

Nẽ pur karêr xwỳnh mẽ pur kãm ahkre xwỳnhja wa. Hamẽ wa àpênh mex jakamã koja hamẽ wa kot pur kãm àpênh pãnhã amnhĩm ujamỳnh rax nẽ. Ja pyrà nẽ kot paj mẽ ixte Tĩrtũm kapẽr o mẽ ajahkre ho ri mẽ akôt ixpa xwỳnhjaja nhũm Tĩrtũm nhỹrmã mẽ ixàpênh pãnhã mẽ inhmã amnhĩrer mex nẽ.

Nẽ te mẽ ate Tĩrtũm nhõ ixkre pyràk. ¹⁰ Nẽ pa te ixpê Tĩrtũm mã ixkre hã ixàpênh xwỳnh pyràk jakamã na pre Tĩrtũm mẽ akaxyw tanhmã ixto pa mẽ amã tanhmã kot amnhĩ nhĩpêx to hã harẽnh o ri mẽ akôt ixpa. Te ixte õ ixkre kaxyw âm xà maati xãm pyràk o mẽ anhĩpêx. Jao mẽ amã kapẽr jarẽnh o ri mẽ akôt ixpa. Mẽ ate amnhĩ kaxyw hkôt ajamaxpẽr nẽ hkôt amnhĩ xunhwỳr kaxyw. Tã na ka prem hkôt amnhĩ xunhwỳ nhũm ixpãnhã Tĩrtũm kapẽr o mẽ ahkre ho mẽ pa xwỳnh kwỳjaja mẽ awỳr mra nẽ mẽ amã kapẽr jarẽnh jatur xãm kurẽ. Nẽ hprĩ hã ho mẽ ajahkre ho ri mẽ akôt pa. Te ho mẽ kot ixkre krax nhĩpêx pyràk o mẽ anhĩpêx.

Ně kwa mẽ ate mẽ ahkre o mẽ apa xwỳnhjaja kêt ka mẽ akatàť kôt mẽ ahkre mex rãhã ho ri mẽ hkôt apa.

¹¹ Ně Jejus Kris tapxipix na pu htem hkôt amnhĩ xunhwỳ nhũm mẽ pané mẽ pahte amnhĩ tomnuj o hapêx. Jakamã te kêp kỳxpê ixkre nhĩmők ã nőr xà maatita pyràk.

¹² Ně na htem tōhã ixkre nhĩpêx kaxyw nẽ pĩ htỳx jakà nẽ ho hipêx nhũm kritpêm mẽ kãm mex ry nẽ kuhê. No na htem tōhã nojarêt kãm ixkre hã apê nẽ pĩ rerek o hipêx nhũm mẽ kãm mex ry hkêt nẽ. Koja rôr nhyre hwỳr mra nẽ mẽ kêp hapôk nẽ homnu. Ja pyrà nẽ na hte Tĩrtũm kapêr o mẽ ahkre ho ri mẽ pa xwỳnh kwỳjaja te mẽ kot katàť kôt pĩ htỳx o ixkre nhĩpêxta pyrà nẽ katàť kôt mẽ ahkre ho ri mẽ hkôt pa. No nhũm mẽ hkwỳjaja axtem nẽ te mẽ kot pĩ rerek o ixkre nhĩpêxta pyràk o amnhĩ nhĩpêx nẽ htỳx ri Tĩrtũm kapêr kwỳm ri tanhmã mẽ ahkre hto ho pa. Jao hkwỳm ri amnhĩ nhĩpêx rãhã ho ri pa.

¹³ Ně koja mẽhõ pĩ htỳx pix o amnhĩm òrkwỳ nhĩpêx hãmri nhũm mẽmo arĩgro hã tanhmã amnhĩ to nẽ kêp pôr. No ãm hã pỏja pix xêt pa nhũm kãm hikwỳ xà nẽ òkwa êja arĩ piitã mex nhũm ixkre hpãm axte hã pỏ janhôr o nyw. No koja pĩ rerek o hipêx nhũm mẽmo arĩgro hã kêp pôr hãmri nẽ piitã kêp kaxàr pa. Ja pyrà nẽ koja nhỹrmã Krisja akupỳn mẽ pahwỳr wrỳ hãmri nẽ mẽ pahte kãm tanhmã amnhĩ nhĩpêx to ho papaja piitã hã mẽ pahpumunh kôt tanhmã mẽ pajarênh to. Koja mẽ pahkwỳjaja mẽ pahte mẽ kot pĩ htỳx o ixkre nhĩpêxta pyrà nẽ Tĩrtũm mã mẽ pahte amnhĩ nhĩpêx mex o mẽ papa xwỳnhjê xàpênh pumu nẽ

mê pahte amnhĩ to mex xwÿnh ã mẽ pajarê. Hãmri nê hpãnhã mẽ kot pĩ rerek o ixkre nhĩpêxta pyrã nê mẽ kot kãm amnhĩ nhĩpêx mex kêt xwÿnhjê pumu nê mẽ kot amnhĩ to mex kêt xwÿnh hã mẽ harê.

¹⁴ Nê pĩ htÿxja na hte tanhmã amnhĩ to nê hpôr no ãm arĩ mex nê kuhê nhũm mẽ piitã arĩ mex ã omu. Ja pyrã nê koja Krisja mẽ kot kãm tanhmã amnhĩ nhĩpêx mex to ho mẽ pa xwÿnhjê pumu nê mẽ kot tanhmã kãm amnhĩ nhĩpêx to hpãnhã mẽ kãm amnhĩre nhũm mẽ piitã mẽ kot amnhĩ to mex ã mẽ omu. ¹⁵ No pĩ rerekja na hte pôr nê kaxàr pa. Ja pyrã nê mẽ kot Kris mã amnhĩ nhĩpêx mex hkêt xwÿnhjaja koja Tĩrtũm mẽ kãm amnhĩrer kêt nê. Nom arĩ mẽ kêp hkra jakamã koja mẽ arĩ kuri htĩr tũm nê pa. No ãm mẽ kot Tĩrtũm mã amnhĩ nhĩpêx mex kêt jakamã koja mẽ hkwyjê hkĩnh ã amnhĩm mẽmoj mex kwÿ jamÿnh kêt nê. Te mẽhõ nhõrkwy kêp hpôr nhũm mẽ hkukrêx kwÿ jamÿnh kêt nê ÿ kamã kurũm hapõx pyrãk.

¹⁶⁻¹⁷ E pa mẽ amã mẽmoj jarê. Ra mẽ ate mar tã mãn ka mẽ ra tanhmã amnhĩ to nê hã ano hkêt rÿ ko. Nà te mẽ pahpê Tĩrtũm nhõrkwy pyrãk. Tĩrtũm nhõrkwyja õ na. Tã mẽ pahpê hkra nhũm Karõ kot mẽ pakaxwÿnh mã gjêx jakamã te mẽ pahpê õrkwy pyrãk. Jakamã mẽ kot kapêr kwÿm ri mẽ ajahkre o ri mẽ pa xwÿnhjaja te mẽ kot Tĩrtũm nhõrkwy grãnh xwÿnh pyrãk. Koja mẽ nhÿrmã amnhĩ xà htÿx kamã hamak o pa.

*Mê pahte amnhĩ to jarkrar kêt ã mẽ pamã karõ
Wam Korît 1.10-25*

¹⁸ Nê kot kaj mẽ atõ axàhpumunh tÿx o amnhĩ to jarkrar o ri apa japêr. Kwa mẽ jam anhũre nê

axte ri ã amnhĩ nhĩpêx anhÿr kêt nê. Nê te mẽ ate amnhĩ nê axàhpumunh tÿx xàja nhãm rēnh par pyràk o amnhĩ nhĩpêx. Mẽ paxàhpumunh xàja pika kamã mẽ àhpumunh pix jakamã kêr ka mẽ te amnhĩ nê nhãm rēnh pyrà nê hpãnhã Tĩrtũm xàhpumunh xà hkôt pix mã amnhĩ nhĩpêx o ri apa. ¹⁹ No pika kamã mẽ àhpumunh xwÿnhjaja Tĩrtũm noo mã te mẽ hkrã pipãnh nê htÿx ri pata pyràk. Tĩrtũm kapêr ã kagã htũm kot mẽ harēnh kot:

Pika ja kamã mẽ àhpumunh tÿx ã mẽ kot amnhĩ to jarkrar xwÿnhjaja Tĩrtũm noo mã te mẽ kot amnhĩ to hêx o pa pyràk. Anê.

²⁰ Nê mãânēn mẽ harēnh kot:

Mẽ kot amnhĩ xàhpumunh tÿx ã amnhĩ to jarkrar o ri mẽ pa xwÿnhjaja na hte Tĩrtũm mẽ omu nê mẽ kot ã amnhĩ jarēnh anhÿr kaprÿ hã mẽ harê. Anê.

²¹⁻²² Jakamã kwa kêr ka mẽ axte mẽ apê ixkwÿ rÿ mẽ apê Apor kwÿ hã amnhĩ jarēnh o ri apa hkêt nê. Mẽ apê wa ixkwÿ hkêt kênã. Nê mẽ apê nhãm mēhō hkwÿ hkêt. Mẽ pahpiitã mẽ pahpê Kris kwÿ na pu mẽ.

Nê kot puj mẽ nhÿrmã pahtyk tã akupÿm pahtĩr nê Tĩrtũm mẽ Jesus wa kuri pamex nê pahtĩr tũm nê ri papa. Jakamã kwa mẽ tee ri amnhĩ kukamã ajamaxpêr kêt nê.

Nê jarãhã mẽmoj piitã mẽ panhōō. Nê kormã mẽmoj kot amnhĩrĩt kêt xwÿnhjaja haxwÿja mẽ panhō na. ãm mẽmoj piitã mẽ panhō jakamã te mẽ pahpê mẽmoj piitã mẽō pahi pyràk. ²³ No mẽ papajaja axtem Kris kêp mẽ panhō Pahihti. Nê Tĩrtũm kêp Kris nhō Pahihti.

4

Tirtũm pix kot tanhmã mẽ pajarẽnh to xwýnh ã harẽnh

Eprẽw 13.17

¹ Nẽ mẽ pajaja mẽ ixpê mẽ anhõ pahi hkêt. ãm mẽ ixte Kris mã tanhmã amnhĩ nhĩpêx to ho ixpa xwýnh pix jakamã Tirtũm kormã kapêr kwý ho amnhĩrit kêtja na pa htem mẽ amã ho amnhĩrit o ri mẽ akôt ixpa. Ja kaxyw na pre mẽ ixunhwý. ² Na pre Kris tanhmã mẽ inhmã kapêr to nẽ mẽ inhmã:

—E kêr ka mẽ ixkapêr pix o mãn mẽ ahkre ho ri mẽ hkôt apa. Anẽ.

³⁻⁴ Kumã pix mã ixte amnhĩ nhĩpêx o ri ixpa jakamã koja tapxipix ixte kãm amnhĩ nhĩpêx ã ixpumunh kôt tanhmã ijarẽnh to. Ixte kãm amnhĩ nhĩpêx mex ã ijarẽ rý ixte kãm amnhĩ nhĩpêx mex kêt ã ijarẽ. ãm tapxipix koja tanhmã ijarẽnh to. No koja nhãm mẽhõ rý mẽ atõ ã ijarẽnh anẽ pa ama nẽ ãm ama. Rý papam tanhmã kãm ixte amnhĩ nhĩpêx mex to hã kãm amnhĩ jarẽnh japêr hãmri nẽ ãm ixtýx kãm ã amnhĩ nhĩpêx anhýr ã amnhĩ jarẽnh kaprý. Pahihti Kris pix kot hprĩ hã mẽ pahte amnhĩ nhĩpêx kôt pahpumunh jakamã tapxipix koja tanhmã mẽ pajarẽnh to.

⁵ Jakamã kwa kêr ka mẽ ri mẽ kot Tirtũm mã tanhmã amnhĩ nhĩpêx to hã mẽ omunh xà hkôt tanhmã mẽ harẽnh to hkêt nẽ. Koja nhýrmã Pahihti Krisja akupýn mẽ pahwýr wrý nẽ rĩ tãm tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarẽnh to. Nẽ mẽ kot hpimxur pê tanhmã amnhĩ tomnuj to ho mẽ pa xwýnhjaja nhũm mẽ piitã mẽ noo mã mẽ kãm ja ho

amnhĩrĩt nhũm mẽ ja hã mẽ omu. Nẽ mẽ pahpiitã mẽ pajamaxpěr xà ho amnhĩrĩt nhũm mẽ piitã hprĩ hã ja hã axpẽn pumu. Hãmri nhũm Tĩrtũm rĩ kormã mẽ pahte kãm tanhmã amnhĩ nhĩpêx mex to ho pa xwỳnhjê jarẽ.

⁶ E Jejus kôt ixkwỳjaja. Nà na pa ã mẽ amã Apor mẽ wa amnhĩ jarẽn anẽ. Mẽ ate inhmar nẽ Tĩrtũm kapěr ã kagà hkôt tanhmã wa ijarẽn to kaxyw. Kot kaj mẽ ã amnhĩ nhĩpêx anẽ hãmri nẽ ahpỳnhã tanhmã mẽ ixte Kris kapěr jarẽn xwỳnhjê jarẽn to hkêt nẽ. Nẽ axpẽn mã mẽ ijarẽn o:

—Nà tãm kot Kris kapěr jarẽn mex o kot hkwỳjê jakrenh jakamã kot paj hkôt pix mã mãn ri ixpa.

Anhỹr o axpẽn mã mẽ ixtõ jarẽn kêt nẽ. Kot kaj mẽ ã mẽ ixtõ jarẽn anẽ nẽ te mẽ ixto jarkrar pyræk o amnhĩ nhĩpêx. ⁷ Kwa mẽhõ na pre mẽ amã tanhmã ri mẽ ijarẽn to ka mẽ mar xà hkôt ã mẽ ijarẽn anẽ? Nẽ mẽ ixkapěr mex ã mẽ ixkwỳjê jarẽn nẽ mẽ ixkapěr mex kêt ã mẽ ixkwỳjê jarẽn. Nà na ka mẽ ãm amnhĩ krã hkôt ã mẽ ijarẽn anẽ nom Kris xàhpumunh xà ho ã mẽ ijarẽn anhỹr kêt nẽ. ãm mẽ ixte Tĩrtũm kapěr o mẽ ajahkre xwỳnhjaja na pa prem mẽ amã mẽmoj jarẽn ka mẽ ama nẽ mẽ inhỹ hã hkôt axàhpumunh mex nẽ. No amnhĩ krã hkôt mẽ axàhpumunh kêt kênã kot ka kêt mẽ ã ahpỳnhã tanhmã mẽ ixto jarkrar anhỹr to ho ri apa.

⁸ Te mẽ ate Apor mẽ wa ixrom Tĩrtũm kapěr mar par nẽ hkôt amnhĩ nhĩpêx mex pyræk. Te wa ixrom mẽ ate Jejus nhĩhkô hã mẽ ho amnhĩptàr pyræk. Hêxta waa nẽ. Kop apu ãm hãmri mẽ ate ãhkô hã mẽ ho amnhĩptàr ronhỹx pa ijaxwỳja mẽ apyrà nẽ

ã amnhĩ nhĩpêx anê. Hãmri nê ixkĩnh tỳx kumrêx.
 9 Nom ja kot anhỹr kêt.

Jejus nhỹ hã mẽ ahkre xwỳnhjê jarênh
Sikũn Korit 4.8-10; Eprêw 12.1

Nê mẽ ixpê Jejus nhỹ hã mẽ ajahkre ho mẽ ixpa xwỳnhjaja te Tĩrtũmja axtem tanhmã mẽ inhĩpêx to pyræk pa mẽ inhmex kêt nê ixpa. Te mẽ ixte gyw kãm amnhĩ rênh nhũm mẽ kot mẽ ixkamã ôkre kahak pyræk o na htem mẽ inhĩpêx. Jakamã na hte mẽ hkwỳjaja mẽ ixpumu nê mẽ ixkapêr ma nê ãm mẽ inhma nê axpên mã mẽ ijarênh o:

—Tk. Kot mẽ ahkreja mexti hã. Kwa pu mẽ himex ri.

Anhỹr jakamã te ra mẽ ixtyk nê mẽ inhĩkwỹ nhũm mẽ piitã mẽ ixtã htu nê mẽ ixpumunh nê ma pa pyræk o amnhĩ nhĩpêx. Jakamã na htem mẽ ixte mẽ ahkre ma nê ãm kuma nê ma pa. Nom Tĩrtũm kapêr o mẽ wrỳk xwỳnhjaja na htem ja hã mẽ pahpumu nê axpên mã mẽ pajarênh o:

—Kwa mẽ kot Jejus ã mẽ hipêx kati htã nhũm mẽ arĩ hkôt amnhĩ nhĩpêx mex nê aa hkaga hkêt nê. Hêxta waa nê. Nà ãm hãmri na htem ã amnhĩ nhĩpêx anhỹr o pa. Anê.

10 Na hte mẽ kot mẽ ixkapêr mar xwỳnh kwỳjaja kãm mẽ ixkĩnh kêt nê tanhmã mẽ ixto kapêr punuj to. No mẽ kajaja nhũm mẽ ã mẽ ato kapêr anhỹr kêt nê. Na htem mẽ ixkrã pipãnh ã mẽ ijarê no mẽ kajaja nhũm mẽ Kris nhỹ hã mẽ axãhpumunh tỳx ã mẽ ajarê. Nê mẽ ixte Tĩrtũm kapêr kôt amnhĩ nhĩpêx mex kêt ã mẽ ijarê no mẽ kajaja na htem Tĩrtũm kôt mẽ ate amnhĩ nhĩpêx mex ã mẽ ajarê. Nê mẽ kot mẽ ixkamã ôkre kahak tỳx tã mẽ akamã

õkre kahak kêt nê mẽ kãm mẽ akapêr mar prãm nê.
¹¹ Na pa htem arĩ Kris ã ixpunuj nê ixpa. Nê mẽ inhmã prãm nê mẽ inhmã kôr nê ri ixpa. Nê mẽ ixê pikaxônhre nê ri ixpa. Nhũm htem Kris ã mẽ ixtak rũnh nê. Pa mẽ inhõrkwỹ hkêt nê nhãm ri ixpa nê nhãm ri ixpa. Na pa htem arĩ ã amnhĩ nhĩpêx anhỹr o ri ixpa. ¹²⁻¹³ Nê ixàpkur xà kaxyw ixàpênh rũnh o ri ixpa. Nhũm hte mẽ kãm Jejus prãm kêt xwýnhjaja mẽ ijapry ho pa htã pa mẽ amnhĩ kurom mẽ kãm ixkapêr mex nê mẽ kãm:

—E kê Tĩrtũm mẽ ato mex nê ka mẽ amex nê apa. Anê.

Nê mẽ kot mẽ inhĩpêx kati htã pa htem mẽ kutã amnhĩ to htýx nê arĩ mẽ hkôt ixpa. Na htem te mẽ kot ahpunuj nhĩpêx pyrãk o mẽ inhĩpêx nê mẽ ixwýr mrrar kêt nê. Á na htem mẽ ixte Jejus nhỹ hã mẽ ahkre o mẽ ixpa xwýnhjê nhĩpêx anê.

*Pawre te kêp mẽ hpãm pyrãk ã kot amnhĩ jarênh
 Wam Tesarõn 2.11-12*

¹⁴⁻¹⁵ E Kris kôt ixkwýjaja. Na pa ã mẽ amã kagà nê mẽnh anê. Nom mẽ ate inhmar nê amnhĩ kamã apijaàm kaxyw kêt. Inhmã mẽ ajapê jakamã na pa ã mẽ amã ixkapêr nê hã kagà nê mẽnh anê. Na mẽ ra ohtô nê ixpãnhã mẽ awýr pa nê mẽ amã Tĩrtũm kapêr o mẽ ajahkre. Nom ixkumrêx na pa pre mẽ amã kapêr jarê ka prem inhma nê Kris hkôt amnhĩ xunhwý nê amnhĩ kaxyw hkôt ajamaxpêr týx nê. Jakamã paxipix te ixpê mẽ apãm nhũm te mẽ apê ixkra pyrãk. ¹⁶ Jakamã kwa mẽ ixte amnhĩ nhĩpêx kôt ixpumu nê ixkôt mãn kêt mẽ amnhĩ nhĩpêx o ri apa. ¹⁷ Á mẽ ate amnhĩ nhĩpêx anhỹr kaxyw na pa pre ijamaxpêr nê ma mẽ awýr Ximotre mẽ.

Haxwÿja Kris kôt te kêp ixkra pyrâk. Nê inhmã hapêê. Na hte jar Kris mã tanhmã amnhĩ nhĩpêx mex to ho pa. Tã pa pre mẽ awÿr kumê. Koja ma mẽ awÿr mō nê pōj nê mẽ amã Kris kapêr jarênh o ri mẽ akôt pa. Nê mẽ amã tanhmã ijarênh to nê mẽ amã:

—Nã Pawre na hte Jejus Kris jamaxpêr kôt hamaxpêr o pa. Nê kot amnhĩ nhĩpêx kôt amnhĩ nhĩpêx o pa. Nê krĩ piitã hkôt mẽ kot urâk nê ã amnhĩ nhĩpêx o pa anhÿr kaxyw mẽ ahkre mex o pa. Anê.

¹⁸ Nê na xep mẽ akwÿjaja te ra àhpumunh tÿx pyrà nê tanhmã ijarênh to nê ijarênh o:

—Pawreja akupÿn mẽ pahwÿr mōr ã amnhĩ jarênh tã koja akupÿn mōr kêt nê kãm ga. ãm kapêr kati xwÿnh na.

¹⁹ Anhÿr ã ijarênh tã koja Tĩrtũm kãm tokyx ma mẽ awÿr inhmōr prãm hã kot pa ma mẽ awÿr inhmōr kurê kumrêx. Hãmri nê pōj nê ixprĩ hã ã mẽ kot ixto kapêr anhÿr xwÿnhtajê pumu. Nê mēhō kot ã mẽ kãm ijarênh anhÿr xwÿnhta ã ahkukja. ²⁰ Tĩrtũm krajaja na htem hkôt pix mã amnhĩ nhĩpêx jakamã na htem hkôt tanhmã amnhĩ nhĩpêx to hã mẽ omu nê rĩ kormã kêp hkra hã mẽ harê. Tã kot paj nhÿrmã mẽ awÿr pōj nê ã ixto kapêr anhÿr xwÿnhjê pumu nê ixprĩ hã mẽ kot amnhĩ nhĩpêx ã mẽ omu nê rĩ kormã tanhmã mẽ harênh to. Jao Tĩrtũm nhÿ hã mẽ kot mẽ ajahkre hã mẽ omu rÿ amnhĩ krã hkôt mẽ kot mẽ ajahkre hã mẽ omu nê rĩ kormã tanhmã mẽ harênh to. ²¹ Jakamã kwa mẽ tokyx ixkutêp tãm amnhĩ nhĩpêx o ri apa. Kêr pa mō nê mẽ awÿr pōj nê mẽ ate tãm amnhĩ nhĩpêx ã mẽ apumu nê ixkĩnh nê. Nê mẽmoj

tã mẽ amã ixàkjêr kêt nê. Nê mẽ amã ixkapêr mex pix o ri mẽ amã ixkapêr. Te mẽ hipêêxà kot hkrajê mã kapêr mex pyræk o mẽ amã ixkapêr mex nê. Hãmri pu mẽ axpên pumu nê pahkĩnh nê.

5

Mêhõ kot tanhmã amnhĩ tomnuj to hã harênh Sikũn Korît 2.5-11

¹ Nê kwa na pa pre tee ri mẽ anhĩõja jarênh ma nê ixkaprĩ htỳx nê. Na xep hte amnhĩ tomnuj tỳx pê nã puro hã hpijaàm kêt o pa. Kwa mẽ pahpê Kris kwỳjaja mẽ pahte ã amnhĩ nhĩpêx anhỹr kêt nhũm mẽ kot Kris kôt amnhĩ xunhwỳr kêt xwỳnhjaja haxwỳja ã amnhĩ nhĩpêx anhỹr kêt tã nhũm ra mẽ anhĩõja kot Kris kôt amnhĩ xãm tã ã amnhĩ nhĩpêx anê. Kwa ja omnuj tỳx kumrêx.
² Na xep ri ã amnhĩ nhĩpêx anhỹr o pa ka mẽ ja hã omu nê ãm omu nê nê tanhmã kãm nê hkêt nê. Amarĩ hã omunh o ri hkôt apa. Mẽ ate Tĩrtũm kôt axàhpumunh tỳx ã amnhĩ jarênh tã no ãm ja hã omu nê ãm hã omu nê nê tanhmã kãm nê hkêt nê. Kwa nà. Mẽ tee ri kot ã amnhĩ nhĩpêx anhỹrja ã omu nê akaprĩ nê hkêt wehe. Nê mẽ tokyx amnhĩ nê hano kê mẽ akôt Tĩrtũm mã amnhĩ jarênh xà hã ixkre hwỳr axte mrar kêt nê.

³⁻⁵ Ixte mẽ apê awry htã ã kot amnhĩ nhĩpêx anhỹr ã harênh ma nê hkukamã tanhmã ija-maxpêr to. Nà ra ixte mẽ awỳr ixpôx ronhỹx pa mẽ ato akuprõ. Pahihti Jejus nhỹ hã mẽ ato akuprõ nê mẽ amã kot amnhĩ tomnuj xwỳnhhta jarê nê mẽ anê hanor kurê kumrêx. Jakamã e kêr ka mẽ mãmri ã amnhĩ nê hipêx anê. Mẽ panhõ Pahihti Jejus nhỹ hã amnhĩ nê hano nê te Satanasti mã rer pyræk

kê tee ri ja hã amnhĩ pumu nê tokyx kãm urer japêr. Hãmri nê akupÿm tãm amnhĩ nhĩpêx. Kê nhÿrmã Pahihtĩ akupÿn mẽ pahwÿr wrÿ nhũm ma mẽ pahkôt ô krĩ hwÿr api.

⁶ Mẽ ate Tĩrtũm kapêr jarênh mar mex ã amnhĩ jarênh tã kormã amnhĩ nê ã kot amnhĩ nhĩpêx anhÿr xwÿnhnta janor kêt nê. Kwa mẽ tokyx amnhĩ nê hano. Na htem pãwti nhĩpêx kaxyw nê kamã kot ho hikot xà ho hkryre nê kamã kurê nê gaa nê rĩ ho piitã hikot pa. Ja pyrã nê kot ka mẽ amnhĩ nê kot amnhĩ tomnuj xwÿnhnta janor kêt nê hãmri nê gaa nê ra urak nê apiitã ã amnhĩ nhĩpêx anhÿr o ri apa.

⁷ Kwa mẽ tokyx amnhĩ nê hano. Kêr ka mẽ arĩ amnhĩ to mex pix o ri axpên kôt apa nê tãm ri amnhĩ nhĩpêx o ri axpên kôt apa. Na pre ra Jejus Kris mẽ pahte amnhĩ to mex o papa kaxyw mẽ panê ty. Mẽ pahpiitã mẽ panê ty. ⁸ Jakamã na pu htem ãm amnhĩ to mex pix o ri papa. Nê tãm amnhĩ nhĩpêx o ri papa. Jao tanhmã amnhĩ tomnuj to ho ri papa hkêt nê.

⁹ Nê wam ixte mẽ awÿr kagã nê mênhta kamã na pa pre mẽ amã:

—Kêr ka mẽ nhãm mẽ kot mênijê kamã hpijaàm kêt o mẽ pa xwÿnhjê hkôt ri apa hkêt nê. ãm ri mẽ hkàx ã apa.

Anhÿr o mẽ amã hã karõ. ¹⁰⁻¹¹ Nom na pa pre mẽ piitã ã mẽ nê mẽ akurê anhÿr kêt nê. ãm mẽ kêp Kris kwÿ hã amnhĩ jarênh tã ã ri amnhĩ tomnuj anhÿr xwÿnh pixjaja na pa pre mẽ nê mẽ akurê. Koja mēhõ kêp Kris kôt mẽ pahtõ rÿ mẽ pahtõx ã amnhĩ jarênh tã mẽ kamã hpijaàm kêt o ri pa ka mẽ ja hã omu nê hkôt ri apa hkêt kurê kumrêx.

Ně mẽ kãm nhãm mẽ hkukrêx kĩnh o kãm ho õ hprãm o ri mẽ pa xwỳnhjaja.

Ně sãnti kutã hkõn krã ho rôrôk nẽ hkrĩ nẽ kãm mex ã harẽnh o ri mẽ pa xwỳnhjaja.

Ně mẽ kot axpẽn to kapêr punuj o ri mẽ pa xwỳnhjaja.

Ně mẽ pipãnh o ri mẽ pa xwỳnhjaja.

Ně axpẽn pẽ ri mẽ àhkĩnh o mẽ pa xwỳnhjaja.

Koja mẽhõ kêp Kris kwỳ hã amnhĩ jarẽnh tã ã amnhĩ nhĩpêx anhỹr o ri pa ka mẽ ja hã mẽ omu nẽ hkôt ri apa hkêt kumrêx. Ně mẽ kutã axàpkur kêt nẽ. ãm mẽ hkàx ã ri mra.

No mẽ kêp Kris kwỳ hkêt xwỳnhjê nẽ na pa pre ã mẽ akurê anhỹr kêt nẽ. Mẽ piitã ã mẽ kot amnhĩ nhĩpêx anhỹr o pa kênã. Na htem axpẽn kãm hpijaàm kêt o ri pa.

Ně mẽ kãm axpẽn kukrêx kĩnh o kãm ho õ hprãm o ri pa.

Ně sãnti kutã hkõn krã ho rôrôk nẽ hkrĩ nẽ kãm amnhĩ jagrer pẽ amnhĩ to hwỳr o pa.

Ně mẽ axpẽn pẽ àhkĩnh pix o pa.

Kris kwỳ hkêt xwỳnhjaja na htem ã amnhĩ nhĩpêx anhỹr o pa. Tã tanhmã kot ka wem amnhĩ to nẽ mẽ hkàx ã ri apa? Mẽ piitã ã mẽ kot amnhĩ nhĩpêx anhỹr kênã. Kot puj mẽ nhỹrmã Tĩrtũm nhõ krĩ mex wỳr api nẽ rĩ kormã mẽ hkàx ã ri papa.

¹²⁻¹³ Ně mẽ kêp Kris kwỳ hkêt xwỳnhjaja na pa hte mẽ kot amnhĩ tomnuj ã mẽ omu nẽ ãm mẽ omu nẽ tanhmã hã mẽ kãm nẽ hkêt nẽ. Tĩrtũm tãm koja nhỹrmã ja hã tanhmã mẽ hipêx to. No koja Kris kôt mẽ pahtõ rỳ mẽ pahtõxjê hõ tanhmã amnhĩ tomnuj to ho pa pu mẽ pahtõ ja hã omu nẽ

nê tanhmã kãm pakapêr to kurê kumrêx. Tĩrtũm kapêr ã kagà htũm kot ja jarênh kot:
 Kêr ka mẽ amnhĩ nê Kris kôt akwỳjê hõ kot tanhmã amnhĩ tomnuj to ho pa xwỳnhjê jano. ã harênh kot anhỹr.

6

Mẽ pahte Kris kwỳjê ho pakapêr kêt

Matêwre 5.38-40

¹ Nê na ka xep htem Kris kôt atõ rỳ atõxjê hõ mẽ ka wa tanhmã axpên tomnuj to nê axtem nê juisti hwỳr axpên to mra. Mẽ apyrà nê kêp Kris kwỳ hkêt tã ka htem ma hwỳr amnhĩ to mra nhũm war axpên tã war ama nê tanhmã war ajarênh to. Kwa mon ka htem axtem nê ã Kris kwỳ hkêt xwỳnhjê hwỳr mẽ amnhĩ to amrar anê? Kêt mẽ Kris kôt anhĩõ hwỳr mãn kêt mẽ amnhĩ to mra nê kumã mãn amnhĩ jarê kê axpên tã war ama nê axpên tã tanhmã war amã kapêr to.

² Ra mẽ ate ja mar tỳx tã hkôt amnhĩ nhĩpêx kêt nê. Mẽmoj ãm grire htã ka wa tokyx akupỹm hã tãm axpên xãm kêt nê. Rỳ Kris kôt war atõjê hõ hwỳr wa amnhĩ to atêm nhũm akupỹm tãm axpên tã war axãm kêt nê. ãm axtem nê mẽ kêp Kris kôt mẽ atõ hkêt xwỳnhjê hwỳr amnhĩ to mra. Kwa mẽ ã amnhĩ nhĩpêx anhỹr kêt nê. Mẽ pahpê Kris kwỳjaja kot puj mẽ nhỹrmã Kris nhĩhkô hã mẽ kêp hkwỳ hkêt xwỳnhjê tanhmã mẽ harênh to. ³ Nê Tĩrtũm kapêr o mẽ wrỳk xwỳnhjaja kot puj mẽ mãânên nhỹrmã tanhmã mẽ harênh to ho pahkrĩ. Jakamã kwa mãmrĩ ã mẽ pahte amnhĩ nhĩpêx anhỹrja kukamã akupỹm tanhmã axpên

xunhwÿr to ho apa. Měmoj tă mẽ atôjê hõ wa kot tanhmã axpẽn to hã wa omu nẽ tokyx akupÿm axpẽn tă wa kãm akapěr kê wa tokyx akupÿm tãm axpẽn nhĩpêx. Ā mẽ kot axpẽn nhĩpêx anhÿr o paja na kêt mex. ⁴ No na ka xep htem arĩ Kris kôt mẽ akwÿ hkêt xwÿnhjê hwÿr axpẽn to mra nẽ mẽ kãm amnhĩ jarê. Kwa mẽ ri ã amnhĩ nhĩpêx anhÿr kêt nẽ. ⁵ Mě tokyx tee ri ja hã amnhĩ pumu nẽ amnhĩ kamã apijaàm kêt wehe. Xà mẽ akamã Kris kôt mẽ atôjê hõ pixire nẽ kot tãm akupÿm mẽ axunhwÿr kaxyw amrakati kumrêx? ⁶ Na ka xep htem mẽmoj tă axpu. Kris kôt mẽ atôjê hõ mẽ mẽmoj tă axpu nẽ ra mẽ kêp Kris kwÿ hkêt xwÿnhjê hwÿr amnhĩ to mra. Kot tãm akupÿm mẽ unhwÿr xwÿnhjê hwÿr amnhĩ to mra.

⁷ Mě apijapu ho apa jakamã na ka mẽ amnhĩ tomnuj tÿx nẽ. Hãmri nẽ te mẽ apê Kris kwÿ hkêt xwÿnh pyrà nẽ mẽ hwÿr amnhĩ to mra. Kwa kwār Kris kôt anhĩõ mãmri apê ahkĩ rÿ tanhmã anhĩpêx to. Ka mẽ ãm amnhĩ tă omu kê tapxipix tanhmã amnhĩ tomnuj to. ⁸ Ja mex tă mẽ ate ã amnhĩ nhĩpêx anhÿr kêt. Na ka htem axpẽn pé ahkĩ. Mě ate Kris kôt axpẽn to atõ nẽ atõx tă axtem nẽ ã axpẽn nhĩpêx anẽ. Te mẽ apijaàm kêt pyràk o amnhĩ nhĩpêx o ri apa. ⁹⁻¹⁰ Mě kot tanhmã amnhĩ tomnuj to xwÿnhjaja koja mẽ nhÿrmã ma Tirtũm nhõ krĩ mex wÿr àpir kêt nẽ. Ra mẽ ate ja jarênh mar tÿx.

Měmyjê hõ kot nhãm mēnijê hõ ho amnhĩ kati xwÿnhjaja.

Nẽ mēnijê hõ kot nhãm mẽmyjê hõ ho amnhĩ kati xwÿnhjaja.

Ně mēnijaja axtem ně mē kot amnhĩõ ho mjên o
ri mē pa xwỳnhjaja.

Ně mēmyjaja haxwỳja axtem ně amnhĩõ ho hprõ
ho ri mē pa xwỳnhjaja.

Ně mē àhkính o ri mē pa xwỳnhjaja.

Ně mē kãm nhãm mē hkukrêx kính o kãm ho õ
hprãm o ri mē pa xwỳnhjaja.

Ně ri mē pipãnh o mē pa xwỳnhjaja.

Ně ri axpẽn to kapěr punuj o mē pa xwỳnhjaja.

Ně mē kot amnhĩ to sãnti hwỳr o mē pa
xwỳnhjaja.

Ã mē kot amnhĩ nhĩpêx anhỹr xwỳnh piitã koja mē
Tĩrtũm nhõ krĩ hwỳr àpir kêt nẽ.

¹¹ Kormã mē ate Kris kôt amnhĩ xunhwỳr kêt
ri na ka pre mē akwỳjaja ã amnhĩ nhĩpêx anhỹr o
ri apa. Tã amnhĩ kaxyw Jejus kôt ajamxpěr nẽ
hkôt amnhĩ xunhwỳ. Hãmri nhũm Tĩrtũm Karõ
mē Pahihti Jejus Krisja wa mē anê mē ate amnhĩ
tomnuj piitã rênh pa nẽ mē apê Tĩrtũm kra hã mē
axunhwỳ nẽ amnhĩm mē ate amnhĩ to mex xwỳnh
ã mē ajarẽ.

*Mě pahte tãm amnhĩ nhĩpêx o papa hã mē pamã
karõ*

*Matêwre 5.27; Rõmãn 12.1-2; Epes 5.3; Korosẽ
3.5; Wam Tesarõn 4.1-8*

¹² Ně na ka hte mē akwỳjaja amnhĩ jarẽn h o:

—Nà na pa hte pa inhmã tanhmã amnhĩ nhĩpêx
to hprãm xà hkôt amnhĩ krã hkôt amnhĩ nhĩpêx o
ri ixpa. Anẽ.

Mě ate ã amnhĩ jarẽn anhỹr tã no ãm mē ate
amnhĩ jarẽnhja mex kêt. Mějmoj piitã mē pamã
mex kêt. Na pu htem pamã hprãm xà hkôt mějmoj

to aně ně gaa ně ra ho amnhĩ pyrà ně ho anhÿr pix o papa. Ně gaa ně kãm panhũrer kêt kumrêx. Jao ra pahpipãnh pix o ri papa. Rÿ paxêx pix o ri papa. Rÿ paxàhkĩnh pix o ri papa. Jakamã kêr pu mẽ pamã tanhmã amnhĩ nhĩpêx to hprãm xà hkôt tanhmã amnhĩ nhĩpêx to ho papa hkêt ně. Ām amnhĩ mẽ amnhĩ kaxyw Jesus mã pajamxpěr pix ně.

¹³ Ně na htem amnhĩ jarěnh o:

—Nà kot paj inhmã prãm ně mãmri mẽmoj ku. Ně inhmã nhãm mēhō kamã ixpijaàm kêt prãm ně mãmri ģ amnhĩ nhĩpêx aně. Ja tanhmã inhmã kute hkêt. Aně.

Tã koja nhÿrmã Tĩrtũm mẽ panhĩja o hapêx pa. Na pre mẽ pahte nhãm mẽ kamã pahpijaàm kêt o papa kaxyw mẽ panhĩpêx kêt ně. Ām mẽ pahte mẽ panhĩpêx xwÿnh maatija mã tanhmã amnhĩ nhĩpêx mex to ho papa pix kaxyw na pre mẽ panhĩpêx.

¹⁴ Ně na pre Pahihtija ty nhũm Tĩrtũm akupÿm ho htĩr. Ja pyrà ně kot puj mẽ nhÿrmã mẽ pajaxwÿja ty nhũm akupÿm mẽ pahto mẽ pahtĩr. Ja kaxyw tapxipix pix na àhpumunh tÿx o àhpumunh tÿx. ¹⁵ Na pu htem Kris kôt amnhĩ xunhwÿr kôt pahpê hkwÿ ně te pahpê ĩ pyràk. Jakamã kwa mẽ ja hã anohtÿx ně axte nhãm mẽ hkuprÿjê hwÿr amrar ně mẽ ho amnhĩkati hkêt ně. Tĩrtũm kêp ja omnuj. Te mẽ pahte Kris nhĩ pyràk jakamã kot kaj mẽ ģ amnhĩ nhĩpêx anhÿr jao te Kris tãm kot ģ amnhĩ nhĩpêx anhÿr o pa pyràk. Kwa ja mex kêt. Xà kot we Krisja ģ amnhĩ nhĩpêx aně? Nà koja ģ amnhĩ nhĩpêx anhÿr kêt ně. ¹⁶ Tĩrtũm kapěr ģ kagà htũm kot ja jarěnh kot:

Kot ka mẽ atõ mẽnijê hõ ho aprõ nhũm kêp aprõ kumrẽx. Hãmri nẽ te ra war atipxi pyræk o axpẽn nhĩpêx. Anẽ.

Ã kot aprõ mẽ wa ajarẽnh anhỹr jakamã kwa kêr ka mẽ atỳx ri nhãm mẽ hkuprỳjê hwỳr apa hkêt nẽ. Kot kaj mẽ ã amnhĩ nhĩpêx anẽ nẽ Tĩrtũm noo mã te ate aprõ kuhpa hã hkuprỳta o aprõ pyræk. Te wam aprõta kuhpa hã war atipxi pyræk. ¹⁷ Na pu htem Pahihti Jejus Kris kõt amnhĩ xunhwỳ nhũm amnhĩ tã mẽ pahpumu nẽ mẽ pamã Karõ gõ nhũm mẽ pamã agjê. Pu mẽ ra Karõja kõt te ra Jejus mẽ wa pahtipxi nẽ ri papa pyræk o axpẽn nhĩpêx. Jao Kris jamaxpěr mẽ mẽ pajamaxpěrja te wa kot axpẽn pyræk. Nẽ Kris kot amnhĩ nhĩpêx mẽ mẽ pahte amnhĩ nhĩpêxja te kot axpẽn pyræk.

¹⁸ Jakamã kwa kêr ka mẽ amnhĩ prõ pix tãnopxar o ri apa. Nẽ mẽ anijaja amjên pix tãnopxar o ri apa. No mẽ nhãm mẽmyjê ho amnhĩkati ho ri apa hkêt nẽ. Nẽ mẽ amyjaja nhãm mẽnijê ho amnhĩkati ho ri apa hkêt nẽ. Kot ka mẽ nhãm mẽmoj tanhmã omnuj kute ho anẽ no ãm amnhĩ nhĩ homnu hkêt nẽ. Nom kot kaj mẽ nhãm mẽnijê ho amnhĩkati rỳ nhãm mẽmyjê ho amnhĩkati hãmri nẽ ra amnhĩ nhĩ homnu hpa. ¹⁹ Mẽ panhĩ kamã na hte Tĩrtũm Karõ agjê nẽ kamã hkrĩ. Tĩrtũm na pre mẽ pahwỳr kurẽ nhũm mẽ pahkarõ mã agjê pu mẽ te mẽ pahpê õrkwỹ pyræk. Jakamã na pu htem amnhĩ krã hkõt pahtỳx ri mẽmoj tanhmã ho ho papa hkêt nẽ. ãm Tĩrtũm jamaxpěr xà hkõt pix mã na pu htem tanhmã mẽmoj nhĩpêx to ho papa. ²⁰ Na pre ra Jejus mẽ pahte amnhĩ tomnuj pãnhã amnhĩrer kaxyw mẽ pahpiitã mẽ panê ty. Te htyk o amnhĩm

mě pajaprôr pyrâk o mẽ panhîpêx. Jakamã kwa kêr pu mẽ ãm hkôt pix mã mãn ri amnhî nhîpêx rãhã ho ri papa. Kê mẽ pahkwÿjaja ja hã mẽ pahpumunh kôt Tĩrtũm mã mex o mex ã harênh o ri pa.

7

Mě mjên mẽ mẽ hprô wa kot axpên to mex ã mẽ pamã karô

Epes 5.22; Korosê 3.18; Eprêw 13.4

¹ Nê ota mẽ ate ixwÿr kagã nê mênhta na pre ixwÿr pôj pa omu. Nê kamã mẽ ate mẽ aprô hã ixkukjêr xwÿnhta pa kamã harê nê omu. Tã kot paj mẽ amã tanhmã harênh to ka mẽ inhma.

Nà kot ka mẽ amyjê hõ amã aprô hkêt nê ahte ri apa hprãm nê kam nê aprô hkêt apa. Ja tanhmã kute hkêt. Nom kêr ka mẽ hkuprÿjê ho presija ho ri apa hkêt nê. ² Na htem tõhã kãm hprô hprãm kêt nê ri pa nê gaa nê mẽ hkuprÿjê hõ pumu rÿ mẽ kêp mẽ hprôjê hõ pumu nê kamã hpijaàm kêt o ri pa. Ja pymaj kêr ka mẽ amyjaja mãmrĩ aprô nê mẽ anijaja mãmrĩ amjên.

³ Nê mẽ anijaja. Koja mẽ amjên akamã hkurê ka mẽ mãmrĩ kãm amnhî gõ kê mẽ anĩ. Nê mẽ amyjaja mããnên. Koja mẽ aprô mẽ akamã hkurê ka mẽ mãmrĩ mẽ anĩ. ⁴ ãm ka amã tanhmã amnhî nhîpêx to hprãm xà hkôt pix mã amnhî nhîpêx kêt nê. Mããnên amã aprô kot kãm tanhmã amnhî nhîpêx to hprãm xà hkôt mããnên hkôt kãm amnhî nhîpêx.

⁵ Nê kot kaj mẽ mẽmo arĩgro hã amã Tĩrtũm mã amnhî jarênh rÿy hprãm japêr. Hãmri nê aprô mã:

—E kot puj jarāhã axpẽn to amnhĩkati hkêt nẽ. Kot puj ãm Tĩrtũm pix mã amnhĩ jarẽn h o amỹkry. Anẽ.

Hãmri nẽ mãmrĩ ã amnhĩ nhĩpêx anẽ. No kwa kêr ka mẽ ãm ja ho anhỹr o apkati pixi nẽ kãm anhũre. Nhũm jãã ka mẽ amã axpẽn to amnhĩkati hprãm nẽ mãmrĩ tanhmã axpẽn nhĩpêx to. No kot kaj mẽ ã amnhĩ nhĩpêx anhỹr kêt o hã atã apkati xohtô nẽ gaa nẽ ra akurẽ xàj axtem nẽ Satanasti jamaxpêr o ajamaxpêr. Jao nhãm mẽhõ ni hwỳr mra nẽ aprõ kuhpa hã kamã akurẽ ho kamã apijaàm kêt. Rỳ nhũm mẽnijaja nhãm mẽmyjê hõ hwỳr mra nẽ mjên kuhpa hã kamã hkurẽ ho war axpẽn kamã hpijaàm kêt.

⁶ E mẽ ate ja hã ixkukjêr jakamã na pa ã ixprĩ hã mẽ amã ja jarẽn h anẽ. Ka mẽ akwỳjaja amã aprõ hprãm nẽ mãmrĩ aprõ nẽ ri apa. Nẽ mẽ akwỳjaja amã aprõ hprãm kêt nẽ mãmrĩ aprõ hkêt nẽ ri apa. Nom kot pa paa mẽ amã mẽ aprõ hã ixamnên h kêt nẽ. Ka mẽ kam amnhĩ krã hkôt ajamaxpêr xà hkôt tanhmã amnhĩ nhĩpêx to. ⁷ Na pa hte ixprõ hkêt nẽ ri ixpa nom inhmã ja mex pa hte ahte ixpa.

Mẽ mjên kêt nẽ mẽ hprõ kêt xwỳnhjê jarẽn h

Nẽ kormã mẽ aprõ hkêt xwỳnhjaja. Ka mẽ ixpyrà nẽ aprõ hkêt nẽ ri apa ronhỹx inhmã ja mex nẽ. Na hte mẽmy hkwỳjaja hprõ kêt nẽ ri pa nhũm Tĩrtũm ja hã mẽ omu nẽ tanhmã mẽ ho nhũm mẽ mex nẽ ri pa nẽ mẽnijê kamã hkurẽ ho mẽ kamã hpijaàm kêt o ri pa hkêt nẽ. No na hte mẽ hkwỳjaja hprõ hkêt nẽ ri pa nẽ gaa nẽ ra hkurẽ xàj mẽnijê kamã hpijaàm kêt. ã mẽ ate amnhĩ nhĩpêx anhỹr pymaj

kêr ka mẽ amã aprõ hprãm nẽ mãmrĩ aprõ. Tirtũm mã ja mex kẽnã.

⁸ E mẽ aprõ hkêt nẽ mẽ amjên kêt xwỳnhjaja. Nẽ ra mẽ apê mẽ aprõ htyk rỳ mẽ amjên htyk xwỳnhjaja. Pa mẽ amã mẽmoj jarẽ. Nà kot kaj mẽ ixpyrà nẽ mẽ aprõ hkêt nẽ ri apa rỳ mẽ amjên kêt nẽ ri apa nhũm ja inhmã mex nẽ. ⁹ No kot ka mẽ atõ ra akurẽ japêr nẽ mãmrĩ aprõ rỳ mãmrĩ amjên. Ja mããnẽn tanhmã kute hkêt.

*Mẽ pahte axpẽn kaga hkêt ã mẽ pamã karõ
Matêwre 5.31, 19.3-9; Makre 10.2*

¹⁰ E kot paj hpãnhã ra mẽ ate axpẽn to amjên nẽ axpẽn to aprõ xwỳnhjê mã ixkapêr. Nom kot paj amnhĩ krã hkõt tanhmã ixkapêr to hkêt nẽ. Pahihti Jejus Kris kapêr xà hkõt kot paj mẽ amã ixkapêr. Jakamã e kêr ka mẽ anijaja mẽ amjên kaga hkêt nẽ. ¹¹ Nom kot kaj mẽ tanhmã ajamaxpêr to nẽ hkaga japêr hãmri nẽ ahte ri apa nẽ axte nhãm mẽhõ ho amjên kêt nẽ. Rỳ tee ri amnhĩ kukamã ajamaxpêr nẽ mãmrĩ akupỹm amjênta wỳr tẽ nẽ akupỹm hkõt ri apa. No kêr ka mẽ axte nhãm mẽhõ ho amjên kêt nẽ.

Nẽ ra mẽ amyjaja kêr ka mẽ ajaxwỳja ã amnhĩ nhĩpêx anẽ nẽ mẽ aprõ kaga hkêt nẽ. E kêr ka mẽ ã amnhĩ nhĩpêx anhỹr o ri apa.

¹² Nẽ mẽ ate ixwỳr kagà mẽnh kamã axpẽn tã ixkukjêrta kot paj hpãnhã mẽ amã harẽ. Na Pahihti Jejusja ja hã tanhmã inhmã nẽ hkêt nẽ. ãm amnhĩ krã hkõt kot paj mẽ amã tanhmã harênh to ka mẽ inhma.

Ka mẽ amyjê hõ ra Kris kõt amnhĩ xãm nom nhũm aprõ kormã hkõt amnhĩ xãm kêt japêr. Nom

koja kãm arĩ ri akôt pa hprãm ka hkaga hkêt nê. Kê arĩ ri akôt pa. ¹³ Nê mẽ anijaja. Ka mẽ ajaxwýja ra apê Kris kwý hã ri apa nhũm amjên kêp hkwy hkêt tã arĩ ri akôt pa hprãm nê arĩ ri akôt pa ka hkaga hkêt nê. ¹⁴ Kêp Kris kwý hkêt tã koja akôt Kris kwýjê hkôt ri pa. Rý mẽ aprõ kêp Kris kwý hkêt tã koja akôt Kris kwýjê hkôt ri pa. Jao Tirtũm kapêr mar o pa nê gaa nê apyrà nê hkôt amnhĩ xãm japêr. Nê mẽ akra kêp Kris kwý hkêt xwýnhjaja haxwýja mẽ akôt Kris kwýjê hkôt ri pa nê Tirtũm kapêr mar o pa nê gaa nê akôt Jejus kôt amnhĩ xunhwýr japêr.

¹⁵ Nom koja aprõ kêp Kris kwý hkêt ã kãm akaga hprãm nê rĩ tãm mãmrĩ akaga. Rý amjên kêp Kris kwý hkêt ã kãm akaga hprãm nê rĩ tãm mãmrĩ akaga. Kêr ka mẽ kot akaga nê tee ri kãm tanhmã akapêr to hkêt nê. Kwâr mãmrĩ akaga ka ahte ajamakêtkati nê axàmnhĩx ri apa. Mẽ pajamakêtkati nê mẽ pamex nê ri papaja na Tirtũm kãm hprãm.

¹⁶ No koja amjên kêp Kris kwý hkêt tã kãm mẽ akaga hprãm kêt nê ka mẽ hkaga hkêt nê. Rý aprõ kêp Kris kwý hkêt tã ka mẽ kam hkaga hkêt nê. Koja arĩ ate amnhĩ nhĩpêx ã apumunh o ri akôt pa nê gaa nê rĩ apyrà nê Kris kôt amnhĩ xãm japêr.

¹⁷ Jakamã kot ka mẽ aprõ rý amjên ra Kris kôt ahte amnhĩ xãm. Hãmri nê wa arĩ ri axpên kôt ri apa ho apa. Na pa hte krĩ piitã hkôt Jejus kôt mẽ pahkwýjê mã ã ixujarênh anhýr o ri ixpa. Tã kêr ka mẽ ã amnhĩ nhĩpêx anhýr o ri apa.

Kris kôt amnhĩ xunhwýr kêt ri tanhmã mẽ pakute hã mẽ pajarênh

¹⁸ Ja pyrà nê kot kaj mẽ ra amy kwýrèt kà jakàr japêr. Tã ra Kris kôt amnhĩ xãm nê arĩ arãhã ri

apa. Rỳ amnhĩ jakàr kêt rãhã hkôt amnhĩ xãm japêr nê arĩ arãhã ri apa. Mo kaxyw kot ka kêt amnhĩ jakà? ¹⁹ Tĩrtũm na hte mẽ pahte amnhĩ my kwryt kà jakàr ã mẽ pahpumunh kôt tanhmã mẽ pajarênh to hkêt nê. Rỳ mẽ pahte amnhĩ jakàr kêt ã mẽ pahpumunh kôt mãânẽn tanhmã mẽ pajarênh to hkêt nê. ãm mẽ pahte hkôt amnhĩ nhĩpêx pix ã mẽ pahpumunh kôt na hte tanhmã mẽ pajarênh to. ²⁰ Jakamã kêr pu mẽ pahte Kris kôt amnhĩ xunhwỳr kêt ri tanhmã mẽ pakuteja arĩ rãhã ri papa. ²¹ Ka mẽ akwỳjaja ate nhãm mẽ kãm mẽ axàpênh o apa htã Jejus kôt amnhĩ xunhwỳ. Tã kêr ka mẽ mãmrĩ mẽ kãm axàpênh o ri apa. Nom koja anhõ patrãwja amnhĩ nê mẽ ajano ka mẽ mãmrĩ ma mra nê amnhĩ mã tanhmã axàpênh to ho ri apa.

²² Nê koja mẽhõ Kris kôt amnhĩ xãm. Tanhmãn kêp mẽ õ patrãw rỳ kot mẽ kãm mẽ àpênh xwỳnhjê hõ. Tã Kris kôt amnhĩ xãm hãmri nê arĩ amnhĩ nhĩpêx tũm kôt ri amnhĩ nhĩpêx o pa hkêt nê. Ra Kris kôt amnhĩ nhĩpêx nyw o amnhĩ nhĩpêx o pa. Jao ra tanhmã amnhĩ tomnuj to hkêt nê. Te kot õ patrãw punuj kaga nê hpãnhã õ patrãw mex kapêr kôt amnhĩ nhĩpêx pix o pa pyræk.

²³ Na pre Jejus mẽ pahte amnhĩ tomnuj piitã hpãnhã amnhĩrer kaxyw mẽ panê ty. Te htyk o kot amnhĩm mẽ pajaprôr pyræk o mẽ panhĩpêx. Jakamã kwa kêr ka mẽ jar mẽ anhõ patrãw kôt pix mã amnhĩ nhĩpêx o ri apa hkêt nê. Mẽ mãânẽn Tĩrtũm kapêr kôt amnhĩ nhĩpêx o ri apa. ²⁴ Jakamã kêr pu mẽ pahte Kris kôt amnhĩ xunhwỳr kêt ri tanhmã mẽ pakuteta pu mẽ arĩ rãhã ri hã papa.

Ra mẽ pahte amnhĩ jakà rỳ mẽ pahte amnhĩ jakàr

kêt.

Rỳ ra mẽ pahte nhãm mēhõ mã paxàpênh o papa
rỳ amnhĩ mã paxàpênh o papa.

Rỳ ra mẽ pahprõ nē ri papa rỳ mẽ pahprõ hkêt nē
ri papa.

Pu mẽ pahte Kris kôt amnhĩ xunhwỳr kêt ri
tanhmã mẽ pakuteta ãm arĩ rãhã hã ri papa. Jao
Tĩrtũm kãm hprãm xà kôt pix mã amnhĩ nhĩpêx o
ri papa.

Mẽ hprõ nē mẽ mjên kêt xwỳnhjê jarēnh

Matêwre 19.10-12

²⁵ Nē mẽ ate ixwỳr kaga mēnh̄ta kamã na ka mẽ
mããnēn kormã mẽ hprõ hkêt xwỳnhjê hã ixkukja.
Tã kot paj mẽ amã tanhmã mẽ harēnh to. Nom
Pahihti Jejus Kris na pre ja hã tanhmã inhmã nē
hkêt nē. ãm pa kot paj ãm amnhĩ krã hkôt tanhmã
hã mẽ amã ixkapēr to. Na pre Pahihti mẽ akaxyw
tanhmã ixkrã hto pa hte ỹ hã tanhmã mẽ amã
mēm̄oj tã karõ hto ho ri ixpa. Jakamã e mẽ inhma
nē inhmar tỳx nē.

²⁶⁻²⁷ Nà ra mẽ kãm mẽ pahkurê xwỳnhjaja Kris
ã mẽ pahtomnuj o pa jakamã koja ixpyrà nē mẽ
hprõ hkêt rãhã mẽ pa xwỳnhjaja ahte ri pa nhũm
ja mex nē. Nhũm mẽ umaj amnhĩ pix tãnopxar o
ri pa. Nē mẽ aprõ xwỳnhjaja kēr ka mẽ kãm mẽ
pahkurê xwỳnhjê pymaj mẽ aprõ kaga hkêt nē. ãm
pix tãnopxar o ri apa.

²⁸ Tã kot ka mẽ atõ amã aprõ hprãm nē mãmri
aprõ. Ja mããnēn tanhmã ixpê kute hkêt. Nē mẽ
anijaja mẽ amã amjên prãm nē mãmri amjên. Ja
tanhmã ixpê kute hkêt. Nom kot ka mẽ akwỳjê
pyrà nē aprõ rỳ amjên. Nē gaa nē akra. Hãmri nē

tanhmã mẽmoj kute kamã ka tee ri wa mẽ amnhĩ kukamã ri ajamaxpěr o ri apa. Ja pymaj na pa hte mẽ amjên kêt nẽ mẽ aprõ hkêt ă mẽ amã awjarẽ.

²⁹ Nẽ Kris tokyx akupỹn mẽ pahwỳr wrỳk kaxyw jakamã kwa ra mẽ aprõ nẽ apa xwỳnhjaja. Kêr ka mẽ amnhĩ prõ nẽ amnhĩ kra pix kukamã ajamaxpěr o ri apa hkêt nẽ. Te ho mẽ hprõ hkêt nẽ mẽ pa xwỳnhjaja kot amnhĩ nhĩpêx pyrã nẽ Kris kutêp kumrêx mã ajamaxpěr pê tanhmã amnhĩ nhĩpêx to ho apa nẽ arĩ kormã aprõ nẽ akrajê ho hapu nẽ tanhmã mẽ kutã anojarêt to ho apa.

³⁰ Kris kot tokyx akupỹn mẽ pahwỳr wrỳk jakamã kwa mẽ ri amỳr o ri mẽ apa xwỳnhjaja. Kêr ka mẽ kutêp tee ri amnhĩ kaprĩ pix mã ajamaxpěr o akaprĩ nẽ ri apa hkêt nẽ. Nẽ mẽ akĩnh nẽ ri apikunhar o ri mẽ apa xwỳnhjaja kêr ka mẽ Kris kutêp amnhĩ kĩnh xà pix mã ajamaxpěr o ri apa hkêt nẽ. Nẽ ri mẽ axujaprôr o ri mẽ apa xwỳnhjaja kêr ka mẽ Kris kutêp tanhmã axujaprôr to pix kukamã ri ajamaxpěr kêt nẽ. ³¹ Nẽ mẽ apê mẽ ate mẽmoj to wênê ho ri mẽ apa xwỳnhjaja Kris kutêp ăm ri mẽ akukrêx pix kukamã ajamaxpěr kêt nẽ. Koja mẽ panhõ pika piitã hkôt mẽ pakukrêxja nẽ mẽmoj piitã arĩ rãhã hkêt nẽ. ³² Jakamã kot kaj mẽ akukrêx pix kukamã ajamaxpěr nẽ amnhĩ pix kukamã ajamaxpěr nhũm ja apê omnuj nẽ. Kris kwỳ pê mẽ hprõ hkêt xwỳnhjaja na htem Pahihti Jejus Kris kãm hprãm xà hkôt pix mã kãm tanhmã amnhĩ nhĩpêx to ho ri pa hprãm. Jao ăm pix kutã tanhmã nojarêt to rãhã ho ri pa. ³³ No kêt ra mẽ hprõ nẽ mẽ pa xwỳnhjaja na htem hprõ pix kukamã kãm tanhmã amnhĩ nhĩpêx to ho pa

hprãm. Jao pix kukamã amnhĩ nhĩpêx o pa. ³⁴ Mẽ kãm Tĩrtũm kapêr kôt amnhĩ nhĩpêx prãm tã no ãm mãnẽn kãm hprõ kapêr mar nẽ hkôt kãm tanhmã amnhĩ nhĩpêx to ho ri pa hprãm.

Nẽ mẽnijaja kot Jejus kôt amnhĩ nhĩpêx nẽ kormã mẽ mjên kêt xwỳnhjaja na htem kãm Pahihti Jejus kãm hprãm xà hkôt pix mã kãm tanhmã amnhĩ nhĩpêx to ho pa hprãm. Nẽ ãm pix mã hamaxpêr o pa. Nẽ ãm hkôt pix mã amnhĩ nhĩpêx o pa. No ra mẽ mjên nẽ mẽ pa xwỳnhjaja na htem arĩ ri mẽ hikukrêx tãnopxar o pa. Nẽ mjên mã hprãm xà hkôt tanhmã kãm amnhĩ nhĩpêx to ho pa. Jakamã tanhmã kot wem amnhĩ to nẽ Jejus kãm prãm xà hkôt pix mã amnhĩ nhĩpêx o pa?

³⁵ E ixte mẽ ato ajuta kaxyw na pa ã mẽ amã ixkapêr anẽ. Jakamã na pa mẽ ate mẽhõ ho aprõ nẽ mẽ akurê hkêt nẽ. ãm mẽ ate Tĩrtũm kapêr kôt pix mã amnhĩ nhĩpêx o apa hã na pa mẽ amã karõ. Mẽ ate kumã pix mã ajamaxpêr o ri apa pix kaxyw. Nẽ kumã pix mã tanhmã ri amnhĩ nhĩpêx to ho apa kaxyw na pa mẽ amã tanhmã mẽmoj tã karõ hto.

Mẽ kot mẽ hprõ mã xwỳnhjê jarênh

³⁶ E kot paj hpãnhã mẽ ate mẽhõ ho aprõ mã xwỳnhjê mã ixkapêr ka mẽ ixkapêr ma. Nà kot kaj mẽ atõ ate ho aprõ mã xwỳnhta kukamã ajamaxpêr o:

—Nà kot paj ho ixprõ hkêt nẽ. Inhmã hkĩnh tỳx tã kot paj ho ixprõ hkêt nẽ. Kot paj ãm ixprõ hkêt nẽ ahte ri ixpa. Anẽ.

Hãmri nẽ ahte ri apa. Tã ra tee amnhĩ kurẽ kamã ama nẽ ajamaxpêr o:

—Hêxta waa nê. Mon pa pre ho ixprô hkêt nê ahte ri ixpa? Anê.

Hâmri nê māmri ma hwÿr tē nê kām amnhĩ jarē nê ho aprō. Ra ate aprō hkêt nê ahte ri apa hã amnhĩ jarēnh tã no ãm māmri ho aprō. Ja tanhmã kute hkêt kēnã. ³⁷ Nom kot kaj ho aprō hkêt ã amnhĩ jarē nê mǎǎnēn akurē hkêt nê ri apa. Hâmri nê māmri ho aprō hkêt nê ri ahte ri apa. Ja mǎǎnēn tanhmã kute hkêt. ³⁸ Kot ka ho aprō nê war amex nê apa. Rÿ kot ka ho aprō kêt nê mǎǎnēn amex kumrēx nê ri apa. Ja na mex o ate mēhō ho aprō nê ho apata jakrenh.

Mē kēp mē mjên tyk xwÿnhjê jarēnh

³⁹ E kot paj hpānhã mē apê mē amjên tyk xwÿnhjê mǎ ixkapēr. Nà koja amjên arĩ htĩr ri ka ãm hkôt pix mǎ axkamē nê hkaga hkêt nê. No koja nhÿrmã apê ty hāmri ka tee ri amnhĩ kukamã ajamaxpēr hāmri nê amã axte amjên prām nê māmri axte amjên. Nom kwa kēr ka mē amnhĩ pyrã nê Kris kôt akwÿjê hō pix o amjên. No mamri nhām mēhō ho amjên kêt nê. ⁴⁰ No kot ka mē axte amjên kêt nê ahte ri apa hāmri nê axamnhĩx ri ajamakêtkati nê apa. No na pa ãm amnhĩ krã hkôt mē amã ã ja jarēnh anê. Mǎn Tĩrtũm Karō mǎ mǎǎnēn ja mex nê.

8

Sãnti hã mē apkur xà jarēnh

Rōmǎn 14.13-23; Wam Korîť 10.14-22, 13.2; Karatas 5.13; Wam Pêtre 4.8; Wam Juãw 3.18

¹ Nē mẽ ate ixwỳr kagà mēnhṯa kamã na ka prem mǎānēn sǎnti hǎ mẽ apkur xà hǎ ixkukja. Tǎ kot paj mẽ amǎ tanhmǎ ja jarēnh to ka mẽ inhma.

Nà na hte Kris kôt pahkwỳ hkêt xwỳnhjaja mẽmo karō ho sǎnti nhĩpêx mã mẽõ hkwỳ nhĩpêx nē hwỳr o mra. Hǎmri nē hpar pē haxwỳ nē kutǎ hkõn krǎ ho rôrôk nē hkrĩ nē kǎm mex o mex ǎ harē nē kǎm amnhĩ jagrer pē amnhĩ to kuwỳ. Hǎmri nē kǎm amnhĩ jagrer pa nē akupỳm amnhĩm mẽõta jamỳ nē ma o mra nē hkwỳjê mã ho wēnê. Na htem ǎ amnhĩ nhĩpêx anhỳr o pa. Tǎ na ka prem kagàta kamã mẽ ate mẽ kêp mẽõ japrôr nē hkur ǎ ixkukja. Nà ra mẽ ate sǎnti pumunh mex. ǎm mẽ kot ìhkra pix o hipêx ǎ omunh mex jakamã na pu htem hǎ pamã mẽ apkur xàta hkur prǎm nē mǎmrĩ paxàmnhĩx ri kuku. Ja tanhmǎ Tĩrtũm pē kute hkêt. Ra mẽ pahte ja pumunh mex. Tǎ nom kwa kêr pu mẽ ja hǎ Kris kôt mẽ pahkwỳjê mã amnhĩ to jarkrar o ri papa hkêt nē. Nē ja hǎ mẽ kurom paxàhpumunh tỳx ǎ mẽ kǎm amnhĩ to jarkrar hkêt nē. Kot pu mẽ ǎ amnhĩ nhĩpêx anhỳr o mẽ hamaxpēr o hihtỳx hkêt nē. Kêr pu mẽ ǎm mẽ kamã paxukapĩ pē tanhmǎ mẽ ho mex to ho papa. Nē Kris kôt mẽ hamaxpēr o hihtỳx o papa. ǎ mẽ pa hte amnhĩ nhĩpêxja na Tĩrtũm kǎm hprǎm.

² No koja mẽhõ mẽmoj pumunh tỳx ǎ amnhĩ to jarkrar o ri pa nē ǎm tee ri ǎ amnhĩ jarēnh anhỳr kaprỳ. ³ No koja mẽhõ àhpumunh tỳx kêt tǎ kǎm Tĩrtũm kĩnh nhũm amnhĩ tǎ omu nē kǎm hapê nē ho hkra. Kêt ja na mex o mex.

⁴ E kot paj ixprĩ hǎ mẽ amǎ tanhmǎ sǎnti hǎ mẽ apkur xàta jarēnh to ka mẽ inhma. Nà Mēpahpãmja

pixii. Axtem hõ hkêt. Nom mẽ kot sãnti nhĩpêxta ãm mẽ kot ïhkra o hipêx jakamã htĩr kêt. Ra mẽ pahte ja jarênh mar tỳx nê omunh mex. ⁵ Na htem ohtô nê ri sãnti kêp Mẽpahpãm ã hkamnhĩx o pa. Kaxkwa kamã mẽmo karõ nhĩpêxja nê pika kamã mẽmo karõ nhĩpêxja nhũm htem kêp Mẽpahpãm ã harênh ho pa. Nom ja kot anhỹr kêt. ⁶ Mẽpahpãmja ãm pixi ho pixi mex. Mẽ panhõ Tĩrtũmja. Tãm na pre mẽmoj piitã ho kator pa. Jakamã na pu htem kapêr kôt pix mã amnhĩ nhĩpêx o ri papa.

Nê mẽ panhõ Pahihti haxwỳja pixii. Pahihti Jejus Krisja. Na pre Tĩrtũm nhĩhkô hã mẽmoj piitã ho kator pa. Na pu htem ja hã omunh xà hkôt ri pamex nê ri papa. Ra mẽ pahte ja jarênh mar tỳx nê omunh mex. Jakamã na pu htem paxàmnhĩx ri mẽmoj piitã hkur o papa. Tĩrtũm kot mẽmoj piitã ho kator par kênã. ⁷ Tã no ãm ham mẽ kot Kris kôt amnhĩ xunhwỳr xwỳnhjaja na htem mẽ pahkĩnhã kãm sãnti hã mẽ apkur xà hkur puma nê. Ham mẽ kot sãnti kaga nê amnhĩ kaxyw Kris kôt amnhĩ xunhwỳr jakamã kormã Tĩrtũm kôt amnhĩ nhĩpêx tohtuj anê. Jakamã na htem tee ri sãnti hã mẽ apkur xàja pumu nê hamaxpêr o:

—Nà kot paj ja kur kêt nê. Kot paj anê nhũm apu Tĩrtũmja pê ja omnuj nê. Anê.

⁸ Nom na kêt hte Tĩrtũm mẽ paxàpkur xà hã mẽ pahpumunh kôt mẽ pahte amnhĩ to mex xwỳnh ã mẽ pajarênh kêt nê. Kot puj mẽ mẽmoj ku rỳ mẽmoj kur kêt nê nhũm ja hã mẽ pahpumunh kôt tanhmã mẽ pamex ã pajarênh to hkêt nê. Jakamã na pu htem mãmri paxàmnhĩx ri mẽmoj tã mẽ apkur xà hkur o papa nê tanhmã amnhĩ to hkêt nê. ⁹⁻¹⁰ Nom

kwa mẽ okora. Kêr ka mẽ sânti mã amnhĩ jarênh xà hã ixkre hwÿr agjêx nê kamã axàpkur hkêt nê. Kot kaj mẽ atõ ã amnhĩ nhĩpêx anê nhũm mēhõ kormã kot Kris kôt amnhĩ xãm tohtuj anhÿr xwÿnhja ja hã mẽ apumu nê tee ri hamaxpêr. Axàhpumunh tÿx ã ate amnhĩ jarênh tã sânti nhõrkwÿ kamã axàpkur o nhÿ nhũm ja hã apumu nê tanhmã amnhĩ nhĩpêx to wehe? Koja ja kêp omnuj tã apyrà nê tē nê axà nê mẽ kutã apku. Hãmri nê apkur pa nê tee ri amnhĩ kukamã hamaxpêr o:

—Hêxta waa nê. Kwa mon pa axtem nê ri ã mẽmojja kur anê? Nà na pa anê nê ra amnhĩ tomnuj tÿx nê. Anê.

Hãmri nê hkaprĩ nê pa. ¹¹ Ate axàhpumunh tÿx ã amnhĩ jarênh tã amnhĩ kôt atõja mex kukamã ajamaxpêr kêt nê. Kris ra mÿrapê htyk tã nhũm ã ate sânti hã mẽõ hkur ã apumu nê tee ri hamaxpêr o Jejus hkôt amnhĩ nhĩpêx mex kêt nê. ¹² Kormã kot Kris kôt amnhĩ xãm tÿx kêt tã tee ri ja hã mẽ apumu nê hamaxpêr mex kêt nê. Jakamã ka Kris noo mã amnhĩ tomnuj nê. ¹³ Tã ã ixte Kris kôt ixkwÿjê nhĩpêx anhÿr pymaj koja ixtõjê hõ kãm mẽmoj kur puma nê. Nê htÿx ho Tĩrtũm kêp omnuj ã hkamnhĩx. Pa ja hã omu nê ijaxwÿja axte hkur kêt nê. Ixte mex ã omunh tã no ãm kot tee ri ja hã ixpumunh nê hamaxpêr o:

—Kwa Tĩrtũm kêp ja mex kêt tã nhũm Pawreja ri kuku. Jakamã kot paj ijaxwÿja uràk nê kuku. Omnuj tãã.

Anhÿr o hamaxpêr pymaj kot paj uràk nê mẽmota kur kêt nê. Na pa hte ã Kris kôt ixtõjê mex kukamã ri ijamaxpêr anhÿr o ixpa.

9

Pawre kot amarî Tîrtûm kapêr o mẽ ahkre hã amnhî jarênh

Atre 9.1-18, 20.33-35; Sikûn Korît 11.7-9

¹ Nê ixte Jejus nhÿ hã mẽ ahkre ho mẽ pa xwÿnhjê hõ jakamã na pa hte Tîrtûm kapêr o mẽ ajahkre ho ri ixpa. Na pa pre inhno ho mẽ panhõ Pahihtî Jejus pumu nê mẽ amã harênh o ri mẽ akôt ixpa ka prem inhma nê hkôt amnhî xunhwÿ. ² Mẽ hkwÿjaja kot axpên mã ixpê Jejus nhÿ hã mẽ ahkre xwÿnh kêt ã ijarênh tâ mẽ kajaja mẽ ate ja hã ixpumunh mex. Ixte mẽ amã mẽ ujarênh mexja jarênh nhÿm mẽ ate mar nê hkôt amnhî xunhwÿrja kukwak ri na ka mẽ apê Jejus kwÿÿ. ³ Jakamã koja mẽ atã ixto kapêr japêr kot paj ã mẽ kãm mẽ ajarênh anê. ⁴ Nê ixte Jejus nhÿ hã kapêr jahkre o ixpa xwÿnh jakamã kot paj inhmã Kris kwÿjê kutã amarî ixàpkur prãm nê mãmrî mẽ kutã apku. Ja tanhmã kute hkêt tâ kot paj ã amnhî nhîpêx anhÿr kêt nê. Kot paj ixàpkur kaxyw nê amnhî pãnhã amnhîre nê rî kormã apku. Na pa hte ã amnhî nhîpêx anhÿr o ri mẽ akôt ixpa. ⁵ Rÿ kot pa ixkwÿjê pyrã nê inhmã Kris kôt ixkwÿjê hõ ho ixprõ hprãm nê mãmrî ho ixprõ. Nê wa ma krî piitã hkôt Kris kwÿjê kukwak ri ixàpkur o ixpa hprãm nê wa mãmrî ã amnhî nhîpêx anhÿr o ixpa. Ja mex kênã. Na hte ã Simãw Pêtre mẽ Jejus tõi kot hapujaja amnhî nhîpêx anhÿr o pa nhÿm ja tanhmã kêp kute hkêt. No ãm mẽ hkînhã ixprõ hkêt na pa hte ri ixpa.

⁶ Nê ixkwÿjaja na htem apkur xà hpãnhã àpênh o pa hkêt nê. Na htem Jejus nhÿ hã kapêr jarênh o ri pa nhÿm hte Jejus kwÿjaja mẽ kãm mẽ apkur xà

gõ nhũm mẽ amarĩ hkur o pa. Tã no pa na pa hte Panãpe mẽ wa ã amnhĩ nhĩpêx anhỹr kêt nẽ. Na pa hte wa mry kà ho ixkre nhĩpêx nẽ mẽ kãm ho wênê nẽ hpãnhã amnhĩm awjaprô. Na pa hte wa ã amnhĩ pa kukwak ri ixujaprô nẽ ho ixàpkur o ri ixpa anẽ.

⁷ Mẽ kãm pur kãm harôj jamýnh o mẽ pa xwýnhjaja na htem amarĩ hkwý jamý nẽ ho apkur o pa. Nẽ motre jamār o mẽ pa xwýnhjaja haxwýja amarĩ hkà kagô janê nẽ ho hkôm o pa. Nẽ pôristijaja na hte mẽ õ pahija mẽ àpênh pãnhã mẽ kãm amnhĩrer o pa. Jajê piitã na htem mẽ àpênh pãnhã mẽ kãm amnhĩrer o pa. Ja pyrã nẽ te ixpê mẽ amã ixàpênh o ixpa xwýnh pyrãk jakamã ixte mẽ ajahkreta pãnhã kot ka mẽ inhmã inhõ ho apa nhũm ja mããnên mex nẽ. ⁸ No ãm papxipix na pa hte ja mex ã harênh kêt nẽ. Tĩrtũm kapêr ã kagà htũm haxwýja kot ja mex ã harênh. ⁹ Kamã na pre finat Mojesja Tĩrtũm nhỹ hã harênh kot:

Koja akrit amã àpênh o pa ka omu nẽ ho mex nẽ.

Kãm õ mex nẽ.

Anhỹr o kot harênh. Xà na pre Tĩrtũmja ãm mẽ pahkrit pix kukamã ukaprĩ nẽ ã harênh anẽ nà? Nà kot anhỹr kêt. ¹⁰ Mããnên mẽ pahpê panhĩ kaxyw na pre ã ja jarênh anẽ. Mẽ pahte mẽ hpur kãm paxàhkre xwýnhjaja nẽ mẽ pahte kamã paxujamýnh o papa xwýnhjaja. Jajê kaxyw mẽ pahte pur kukwak ri amarĩ paxàpkur o ri papa kaxyw ã pre ã ja jarênh anẽ. ¹¹ Tã ja pyrã nẽ na pa hte mẽ awýr mō nẽ mẽ amã Tĩrtũm kapêr jarênh o ri mẽ akôt ixpa. Nẽ mẽ akôt ho mẽ ajahkre ho ri ixpa ka htem inhmã ixàpênhta pãnhã amnhĩrer kêt nẽ. Ixkwýjaja kot Tĩrtũm kapêr o mẽ ajahkre hpãnhã

mê ate mê kãm amnhîrer tâ pa inhmã amnhîrer kêt nê. Na pa pre mê ajahkreta pãnhã mëmoj tâ mê awÿr kêt nê. Æm nhãm ixàpênh ôta kukwak ri na pa hte ixàpkur o ri ixpa.

¹² Nê na hte mê ixkwÿjaja mê awÿr mra nê Tîrtûm kapêr o mê ajahkre o ri mê akôt pa. Hãmri nê hpãnhã mê apkur xà hã mê awÿ ka mê kãm mëmoj gô. No kêt pa na pa hte mê urak nê ixàpkur xà hã mê awÿr kêt nê. Kot pa apu hã mê awÿ ka mê tanhmã ixto akapêr to nê axpên mã ijarênh o:

—Pêr ãm mê pahte kãm amnhîrer pix kaxyw na hte Pawre mê pahwÿr mra nê mê pamã Jejus Kris kot tanhmã mê panê amnhî nhîpêx to hã harênh o pa. Pêr ãm apkur xà pix prãm xàj ã kot mê pamã ujarênh anhÿr o pa. Jakamã kot puj mê kuma nê ãm kuma.

Anhÿr o axpên mã ijarênh pymaj na pa hte mê ajahkre hpãnhã mëmoj tâ mê awÿr kêt nê. Na pa hte ãm mry kà ho ixkre nhîpêx nê ho wênê nê ja pix kukwak ri ixàpkur o ri ixpa. Nê amarî ri mê ajahkre ho ri mê akôt ixpa.

¹³ Nê Tîrtûm mã amnhî jarênh xà hã ixkre kamã mê àpênh xwÿnhjaja na htem hwÿr mê mrar xwÿnhjaja mê àpênh pãnhã mê kãm amnhîre. Nê mê kot mê kãm Tîrtûm mã mëmoj nhôr o kuhê xwÿnhjaja na htem mãânên mê àpênh pãnhã mê kãm amnhîre. ¹⁴ Nê Pahihti Krisja na pre ja hã mê pakukamã pahtã karõ kot:

—Kêr ka mê kot tanhmã mê amã ijarênh to ho ri mê pa xwÿnhjê mã amnhîrer o ri apa. Anê.

¹⁵ Tã no na pa hte aa mëmoj tâ ixàhwÿr kêt nê. Nê mê ate inhmã amnhîrer kaxyw pa mê amã ja jarênh kêt nê. Aa ixte mëmoj tâ mê awÿr kêt. Kot

paj apu anē nē ixpijaàm nē. Rỳ kot pa apu anē nē mẽ akukwak ri ixàpkur o ri ixpa hāmri nhũm mẽ akwỳjaja ja hã ixpumu nē hã ijarēnh o:

—Tk. Na hte amarĩ mẽ pajahkre o ri pa hkêt nē. ãm mẽ apkur xà pix prãm xàj na hte ã mẽ pajahkre ho pa anē. Anē.

Jakamã na pa hte mẽmoj tã mẽ awỳr kêt nē. ¹⁶ Ixte mẽ amã mẽ ujarēnh mexja jarēnh o ri ixpa htã na pa hte ja hã amnhĩ to jarkrar o ri ixpa hkêt nē. Pahihti Jejus na pre ja hã inhmã karõ pa hte kãm ho anhỳr o ri ixpa. Kot paj kãm ho anhỳr kêt nē ixpunuj nē ri ixpa. ¹⁷ Kêp ãm amnhĩ krã hkôt mãn tanhmã mẽ amã ixujarēnh to ho mẽ akôt ri ixpa ronhỳx pa hpãnhã ixàmnhĩx kàxpore hã mẽ awỳ. No ãm ã ixte amnhĩ nhĩpêx anhỳr kêt. Tĩrtũm tãm kot inhmã ja hã karõ jakamã na pa hte amarĩ ixàmnhĩx ri mẽ amã kapêr jarēnh o mẽ ajahkre ho ri mẽ akôt ixpa nē mẽmoj tã ixàhwỳr o ri ixpa hkêt nē. ¹⁸ Ixte amarĩ ri mẽ amã mẽ ujarēnh mexta jarēnh o ri ixpaja na inhmã hprãm. Ja na inhmã mex. Na pa hte ã amnhĩ nhĩpêx anhỳr o ri ixpa nhũm ja inhmã mex pa ixkĩnh nē ri ixpa. Jakamã na pa hte hpãnhã ixàhwỳr kêt nē. Nē inhmã mẽmoj prãm o ri ixpa hkêt nē. ¹⁹ Nē nhãm mẽ kãm tanhmã ixàpênh to ho ixpa hkêt tã pa hte mẽ piitã tanhmã mẽ kãm amnhĩ nhĩpêx to ho ri ixpa. Pê mẽ kãm Jejus kapêr jarēnh o ri ixpa. Jakamã na mẽ ra ohtõ nē ixujarēnh ma nē amnhĩ kaxyw Jejus kôt hamaxpêr nē hkôt amnhĩ xunhwỳ.

Pawre kot tãm mẽ piitã mẽ hipêx o pa hã amnhĩ jarēnh

Wam Korīt 10.33

20 Nē na pa hte Ijaewjê hwÿr ixpa nē mẽ kot amnhĩ nhĩpêx kôt amnhĩ nhĩpêx o ri mẽ hkôt ixpa. Ixte mẽ kurom Tĩrtũm kot finat Mojes mã mẽmoj tã karō hkôt amnhĩ nhĩpêx o ixpa hkêt tã mẽ hkôt ri ixpa nē mẽ uràk nē hkôt amnhĩ nhĩpêx o ri ixpa. Mẽ kot ja hã ixpumunh nē ixte mẽ kãm Jejus jarēnh mar nē ixpyrà nē amnhĩ kaxyw hkôt hamaxpēr kaxyw.

21 Tã pa hpãnhã mẽ kêp Ijaew kêt xwÿnhjê hwÿr ixpa nē mẽ kot amnhĩ nhĩpêx kôt amnhĩ nhĩpêx o ri mẽ hkôt ixpa. Mẽ kot ja hã ixpumunh nē ixkapēr mar nē ixpyrà nē amnhĩ kaxyw Jejus kôt hamaxpēr kaxyw. Tĩrtũm mẽ Kris wa hamaxpēr xà hkôt na pa hte ahpÿnhã mẽ kot amnhĩ nhĩpêx xwÿnhjê hwÿr mra nē ã amnhĩ nhĩpêx anhÿr o ri mẽ hkôt ixpa.

22 Nē na pa hte kormã mẽ kot Kris kôt amnhĩ xunhwÿr tohtuj anhÿr xwÿnhjê hkôt ri ixpa nē te ixte ho mẽ uràk nē kormã hkôt amnhĩ xãm nyw pyràk o amnhĩ nhĩpêx o ri mẽ hkôt ixpa. Mẽ kot ja hã ixpumunh nē ixkapēr mar nē hkôt amnhĩ nhĩpêx mex kaxyw. ã na pa hte mẽ piitã mẽ hkôt ri ixpa nē mẽ hkôt amnhĩ nhĩpêx o ri ixpa anē. Mẽ kot ja hã ixpumunh nē inhmar nē ixpyrà nē Kris kôt amnhĩ nhĩpêx tÿx kaxyw. 23 Mẽ kot mẽ ujarēnh mex mar kaxyw na pa hte mẽ piitã mẽ hkôt ã amnhĩ nhĩpêx anhÿr o ri ixpa. Tĩrtũm kot mẽ ho hkra nē mẽ ho mex kaxyw. Nē mãänēn pa kot mẽ hã ixto mex kaxyw.

Pawre kot htÿx ri amnhĩ nhĩpêx kêt ã kot amnhĩ jarēnh

Sikũn Ximotre 4.7; Eprêw 12.1-3

²⁴ Mě hprôt xwýnhjaja na htem hprôt tỳx no nhũm mēhõ pixi nē wam hkwyjê re nē wam tēn pōj nhũm htem ja hã omu nē kām mẽ hkĩnhxà gō. Ja pyrà nē kēr ka mẽ apiitã tãm amnhĩ nhĩpêx mex rãhã ho ri apa kê Tĩrtũm mẽ apumu nē nhỹrmã ja pãnhã mẽ amã mẽmoj mex gō.

²⁵ Nē mẽ hprôt xwýnhjaja na htem mẽ hkĩnhxà hpyr prãm xàj mẽ hprôt xà hã arĩgro hwýr apkati mẽ hprôt o kuhê. Prôt tỳx prãm xàj. Tã mẽ hprôt xà hã arĩgrota ã nhũm hkwyjê pē amnhĩ to wa nē amnhĩm hkĩnhxà py. Nom koja hkĩnhxàja kritpēm kām mex ry hkêt nē. Koja gaa nē hapêx tokyx anē. Tã nom kot puj mẽ Tĩrtũm kapēr kôt amnhĩ nhĩpêx mex o ri papa. Nē mẽ hprôt xwýnhjê kot hkĩnhxà hpyr prãm xàj apkati mẽ hprôt o kuhêta pyrà nē apkati mẽ hkôt amnhĩ nhĩpêx mex o ri papa. Hãmri nhũm amnhĩ tã mẽ pahpumu nē nhỹrmã mẽ pamã hkĩnhxà mex õ gō. No ãm jar hkĩnhxà kurom koja aa mẽ pahpê hapêx kêt nē. Koja mẽ pamã mex rãhã ho rãhã.

²⁶ Nē na hte mẽ hprôt xwýnhjaja htỳx ri tanhmã hprôt to ho pa hkêt nē. Na htem hkwyjê pē amnhĩ to wa kaxyw hprôt nē nhỹri mẽ àhuk xàta pix pumunh pē hwýr hprôt nē mra hãmri nē kamã ahtwý. Nē kamã àhuk pix kukamã hamaxpēr o hprôt tỳx nē mra. Ja pyrà nē na pa hte apkati mẽ Tĩrtũm kôt pix mã amnhĩ nhĩpêx o ri ixpa. Nhỹrmã kot inhmã mẽmoj mex nhõr kaxyw.

Nē mẽ pijapu mex xwýnhjaja na htem htỳx ri nhỹhỹnh axpēn tak kêt nē. Na htem nhỹhỹnh kot mẽ htak o mẽ rēnh xà pix kamã mẽ htak o mẽ rēnh kukamã hamaxpēr pē kamã mẽ htak. Ja pyrà nē na pa hte ixtỳx ri tanhmã amnhĩ nhĩpêx to ho ri

ixpa hkêt nê. Na pa hte Tîrtûm mã ijamaxpêr pê tanhmã amnhĩ nhĩpêx to rãhã ho ixpa. Kot nhỹrmã inhmã mẽmoj mex nhõr kaxyw. ²⁷ No na pa hte ixtýx ri amnhĩ jamaxpêr xà hkôt tanhmã amnhĩ nhĩpêx to ho ri ixpa hkêt nê. Kot pa ã amnhĩ nhĩpêx anê nê ixte mẽ kãm Jejus kapêr jarênh o ri ixpa htã ãm ri ixtýx ri ã amnhĩ nhĩpêx anhỹr kaprý nhũm Tîrtûmja tee ri ja hã ixpumu nê inhmã mẽmoj mex nhõr kêt nê.

10

Ijaew kot amnhĩ nhĩpêx

Rômãn 15.4; Eprêw 3.8-11; Jutre 5

¹ E Kris kôt ixkwýjaja. Kot paj mẽ amã amnepê mã mẽ ixpê Ijaew hkukamã mẽ inhĩgêtjaja tanhmã mẽ harênh to ka mẽ inhma. Mẽ kot pahi finat Mojes kôt ri mẽ pa xwýnhjaja kot paj mẽ amã harê. Mẽ pahte mẽ uràk nê pahtýx ri amnhĩ nhĩpêx pymaj kot paj mẽ amã tanhmã mẽ harênh to ka mẽ inhma. Mãn ka mẽ arĩ mẽ harênh ã anohtýx japêr. Na prem piitã pika pê Ejit kamã pa htã kurũm kator pa. Hãmri nê ma kapôt ã kakrã pumunh o hkôt pa ho pa. Pry hkêt jakamã nhũm pre Tîrtûm tanhmã kakrã hto nhũm ma mẽ hkukamã pa nhũm mẽ omu nê hkôt pa. Hãmri nê ra gô xujanâr mẽ kot kãm: “Gô kamrêk” anhỹr xwýnhja wýr pøj nê tee ri rêr prãm xàj amnhĩ kukamã hamaxpêr. Hãmri nhũm Tîrtûm mẽ kãm hkôt ã ho amgrà nhũm mẽ hkôt mex pê rêr pa nê axte kakrã hkôt pa ho pa. ² Finat Mojes kot mẽ o pa jakamã nhũm prem kêp hkwy hã amnhĩ jarê nê kãm amnhĩ jarênh o:

—Nà kot paj mẽ akapêr ma nê akôt ri amnhĩ nhĩpêx o ixpa. Anê.

Te mẽ pahpê Kris kwỳ hã amnhĩ jarênh kaxyw mẽ kot gôx kãm mẽ pahkrã kumrãr nhũm mẽ pahte Kris mã amnhĩ jarênhhta pyrãk. ³ Na prem kapôt ã ri pa nhũm Tĩrtũm tãm kaxkwa rũm mẽ hwỳr mẽ apkur xà rê nhũm mẽ hkawrà nê ho apkur o pa. ⁴ Tã ra kôh xàj hirot nhũm Tĩrtũm tanhmã mẽ kãm kên prêkja to nhũm kurũm mẽ kãm gô axkapĩ nhũm mẽ ho ixkô nê akupỹm hihtỳx. ã Krisja mẽ hkôt mẽ ho mẽ hihtỳx o pa anê. Mẽ kot no ho omunh kêt tã nhũm mẽ hkôt mẽ ho mẽ hihtỳx o pa.

⁵ Tã no nhũm mẽ ohtô nê Tĩrtũm kôt amnhĩ nhĩpêx kêt nê. Kot mẽ ho mex kumrêx tã nhũm mẽ ãm amnhĩ tã omu nê ãm omu nê kapêr kôt amnhĩ nhĩpêx kêt nê. ãm kapêr kwỹm ri tanhmã amnhĩ tomnuj to ho pa nhũm tee ri amnhĩ tã mẽ omu nê tanhmã mẽ ho nhũm mẽ hkwỳja hpikaprãr pa. Hãmri nhũm arĩ mẽ htĩr xwỳnhjaja kapôt ã mẽ hãgênh pa nê axte ma pa.

⁶ Jakamã kwa kêr pu mẽ kot ã amnhĩ nhĩpêx anhỹr ã mẽ harênh ma nê hã pano htỳx nê ho papa hãmri nê ho mẽ uràk kêt nê. Mẽ uràk nê pahtỳx ri tanhmã amnhĩ nhĩpêx to ho ri papa hkêt nê.

⁷ Nê na pre mẽ hkwỳjaja sãnti kutã hkôn krã ho rôrôk nê hkrĩ nê kãm amnhĩ jagrer pê amnhĩ to kuwỳ. Tĩrtũm kapêr ã kagà htũm kot mẽ kot amnhĩ nhĩpêx anhỹr ã mẽ harênh kot:

Na prem sãnti kutã apkur o hkrĩ nê kãm amnhĩ jagrer o hkrĩ nê gaa nê pipãnh pix o pa. Jao axpên kamã hpijaàm kêt o pa.

Anhÿr jakamã kwa kêr pu mẽ ã mẽ kot amnhĩ nhĩpêx anhÿrja ã pano htÿx nê ho mẽ uràk hkêt nê.

⁸ Nê na pre mẽ hkwÿjaja htÿx ri mjên nê hprô kuhpa hã nhãm ri mẽ kamã hpijaàm kêt o pa. Mÿrapê nhũm arĩgro pixi hã mẽ ohtô rax kumrêx nê axkaprã. Mẽ kêp 23.000 nê pikaprãr pa. Tã ã Tĩrtũm kot mẽ panhĩpêx anhÿr pymaj kêr pu mẽ ja hã pano htÿx nê ho mẽ uràk kêt nê. Æm kwarĩ ho kwarĩ.

⁹ Nê na pre mẽ hkwÿjaja axtem nê htÿx ri tanhmã axpên mã Tĩrtũm jarênh to nê harênh o:

—Nà Tĩrtũmja gryk tokyx anhÿr kêt jakamã kwa pu mẽ ã amnhĩ tomnuj anhÿr o papa. Kojã mẽ pahpumu nê tanhmã mẽ pahto hkêt nê.

Anhÿr tã nhũm tee ri ja hã mẽ kuma nê mẽ omu nhũm ja kãm mex kêt nê nhũm mẽ hwÿr kagã xoprê nhõ wenên xihtÿx kwÿ rê nhũm mẽ hwÿr mra nê mẽ hkamnhar o mẽ hkwÿjê pa. Tã ã kot mẽ panhĩpêx anhÿr pymaj kwa kêr pu mẽ ja hã pano htÿx nê mẽ uràk nê amnhĩ tã Tĩrtũm kamã pajamak o papa hkêt nê. Kwarĩ ho kwarĩ.

¹⁰ Nê na pre mẽ hkwÿjaja axtem nê Tĩrtũm o kapêr punuj nê nhũm tee ri amnhĩ tã mẽ kuma nê mẽ hwÿr kapêr o wrÿk xwÿnh mẽ nhũm ma mẽ hwÿr wrÿ nê ÿ hã mẽ hkwÿjê nhĩmex. Tã ã kot mẽ panhĩpêx anhÿr pymaj kwa kêr pu mẽ ja hã pano htÿx nê ho mẽ uràk nê Tĩrtũm o pakapêr punuj kêt nê.

¹¹ Na pre mẽ ixpê Ijaew nhĩgêjtaja ã htÿx ri amnhĩ nhĩpêx o pa anê. Tĩrtũm kapêr ã kagã htũm kot ã mẽ kot amnhĩ nhĩpêx anhÿr piitã harênh par. Mẽ panhõ ejêp kaxyw. Mẽ pahte kamã harênh nê mẽ harênh mar tÿx nê mẽ uràk nê ã amnhĩ nhĩpêx

anhÿr kêt kaxyw. Ra Jejus akupÿn mẽ pahwÿr wryk xà hã arĩgro hkukamã grêre jakamã kwa kêr pu mẽ kutêp mẽ kurom kapêr kôt pix mã ri amnhĩ nhĩpêx mex rãhã ho ri papa.

Mẽ pahte mẽmoj punuj nê amnhĩ to htÿx ã mẽ pamã karõ

Matêwre 4.1, 6.9-13; Wam Korît 1.8; Sikũn Pêtre 2.9; Jutre 24

¹² Tã kêr ka mẽ ã Ijaew kot amnhĩ nhĩpêx anhÿr ã mẽ harênhja ma nê ã ajamexpêr anhÿr kêt nê. Rÿ mẽ ajamexpêr o:

—Nà mẽmoj piitã kutã ixihtÿx kênã kot pa hkêt mẽ uràk nê ã amnhĩ nhĩpêx anhÿr o ri ixpa.

Anhÿr o mẽ ajamexpêr kêt nê. Kot kaj mẽ ã amnhĩ jarênh anê nê ra mẽ uràk nê tanhmã amnhĩ tomnuj to.

¹³ Nê na prem kapôt ã pare ri omnuj nê ri pa. Nhũm mẽkarõmnuti tanhmã mẽ hkrã hto nhũm mẽ tanhmã amnhĩ tomnuj to ho pa. Ja pyrã nê na hte arĩ mẽ pahte amnhĩ tomnuj hprãm xaj tanhmã mẽ pahkrã hto ho pa. Mẽ pahpiitã ã mẽ pahto anhÿr o ri mẽ pahkôt pa. Nom nhũm Tirtũm ra kot mẽ pamã amnhĩ jarênh xà hkôt mẽ panê omunh mex rãhã ho pa. Jakamã na pu htem tanhmã amnhĩ tomnuj to hkukamã pajamexpêr nhũm ja hã mẽ pahpumu nê mẽ panê mẽkarõmnuti mã kapêr. Nê kutã mẽ pahto paxihtÿx nê pu mẽ ý hã amnhĩ tomnuj kêt nê. Nê ãm kôt pix mã amnhĩ nhĩpêx mex o ri papa.

*Mẽ kot sãnti mã mẽmoj nhõr xwÿnhjê jarênh
Wam Korît 8.1-13; Karatas 4.8; Apokarip 9.20*

14 Jakamã e Kris kôt ixkwỳjaja. Kêr ka mẽ amnhĩ kaxyw sãnti hkôt ajamaxpêr o ri apa hkêt nê. Nê amnhĩ to hwỳr kêt nê. ãm kwarĩ ho kwarĩ.

15 E mẽ axàhpumunh tỳx ã amnhĩ jarênh jakamã kot paj mẽ amã mẽmoj jarê ka mẽ aprĩ hã inhmar tỳx japêr. 16 Nà na pu htem tōhã Jejus kot mẽ panê htyk mã pajamaxpêr kaxyw axpên wỳr akuprō. Hãmri nê mẽmo kagô hkwy ru nê Tĩrtũm mã mex ã harê nê mẽmoj o pahkôm pê Jejus kot mẽ panê hkamrō pikapĩr mã pajamaxpêr. Nê hpãnhã pãwti hō py nê axpên mã ho hkry nê mẽ kot Kris pĩr nê ĩ kamã hkamnhwỳr nhũm mẽ panê htykja mã pajamaxpêr pê kuku. 17 Pãwtita ãm pixire htã pu htem axpên mã ho hkry nê pahpiitã kuku. Mẽ pahpê Kris kwỳ hã mẽ pahte amnhĩ jarênh nhũm mẽ pahkwỳ kot ja hã mẽ pahpumunh kaxyw. Te mẽ pahtipxi nê ri mẽ papa pyràk nê pãwti pixire htã pu mẽ pahpiitã kuku.

18 E kot paj hpãnhã mẽ amã amnepê mã Ijaew kot tanhmã amnhĩ nhĩpêx to jarê ka mẽ inhma. Na pre htem Tĩrtũm mã mex ã harênh nê kãm amnhĩ nhõr ã kot amnhĩ tã mẽ omunh kaxyw nhũm prem tanhmã amnhĩ nhĩpêx to. Jao kãm mẽ apkur xà hkwy gō nê kãm mex o mex ã harê. Hãmri nê amnhĩ mã mẽmojta kwỳ xà nê hkur o hkrĩ. Jao ra Tĩrtũm mã mex o mex ã harê nê kãm kêp hkra hã amnhĩ jarê.

19 Nom mẽ kot sãnti mã mẽmoj nhõr xwỳnhjaja na htem kãm mẽmo mẽ apkur xà hkwy gō nom ãm kãm òr kaprỳ. Tanhmã kot we amnhĩ to nê amnhĩ tã mẽ omu? Mo rĩt kaxyw no? ãm mẽ ĩhkra ho mẽ kot amnhĩm hipêx kênã. Jakamã na htem ãm kãm

mě apkur xà hkwỳ nhõr kaprỳ. ²⁰ Mě kot sãnti mã mẽmoj nhõr xwỳnhjaja na htem Tĩrtũm mã õr kêt nẽ. Měkarõmnuti mã na htem kugõ. Jakamã kot kaj mẽ uràk nẽ sãnti mã mẽmoj gõ nẽ apê mẽkarõmnuti hkwỳ hã amnhĩ to amnhĩrĩt nẽ apê hkwỳ hã ri apa. Jakamã mẽ ate sãnti mã mẽmoj nhõrta na inhmã hprãm kêt kumrẽx. ²¹ Kot kaj mẽ panhõ Pahihti Jejus kot mẽ panê htyk ã mẽmoj kagõ hkwỳ ho ixkõ hãmri nẽ ma mra nẽ hpãnhã sãnti pẽ mẽkarõmnuti hã mẽmoj to ixkõ. Hãmri nhũm Tĩrtũmja tee ri ja hã mẽ apumu nhũm ja kệp omnuj tỳx nẽ. Rỳ ka mẽ Pahihti Jejus kot mẽ panê htyk ã pãwti hkwỳ hku nẽ hpãnhã ma mra nẽ sãnti pẽ mẽkarõmnuti hã mẽmoj hku. Hãmri nhũm Tĩrtũm kệp ja omnuj tỳx nẽ. Mě pahte ã amnhĩ nhĩpêx anhỳrja na axpẽn kuhpa hã. ²² Jakamã kot ka mẽ ã amnhĩ nhĩpêx anẽ nẽ te ra mẽ amã mẽkarõmnuti hkĩnh nẽ mããnẽn amã Tĩrtũm kĩnh pyràk o amnhĩ nhĩpêx. Nẽ te Tĩrtũm kurom mẽ kajaja mẽ axàhpumunh tỳx pyràk o amnhĩ nhĩpêx. Nhũm tee ri amnhĩ tã mẽ apumu nẽ mẽ akamã gryk tỳx nẽ. Kwa mẽ okora. Kojã Tĩrtũm akamã gryk ka amex kêt kumrẽx.

Mě pamã Kris kõt mẽ pahkwỳjê hkĩnh pẽ mẽ ho mex ã mẽ pamã karõ

Matêwre 20.28; Rõmãn 14.1–15.7; Piripos 2.1-4

²³ Nẽ na htem tõhã amnhĩ jarẽnh o:

—Nà kot pa inhmã mẽmoj to anhỳr prãm nẽ ixãmnhĩx ã amnhĩ nhĩpêx anhỳr o ri ixpa. Anẽ.

Tã no ãm mẽmoj piitã mẽ pamã mex kêt. Na htem kãm mẽmoj to anhỳr prãm xà hkõt mẽmoj piitã tanhmã ho ho ri pa nẽ tanhmã amnhĩ tomnuj to. Hãmri nhũm mẽ hkwỳjaja ja hã mẽ omu nẽ mẽ uràk

nē tanhmã ri amnhĩ tomnuj to. Jao Kris kôt amnhĩ xunhwÿr tÿx kêt nē. ²⁴ Jakamã kwa kêr pu mẽ amnhĩ pix kukamã pajamaxpêr pê tanhmã amnhĩ nhĩpêx to ho papa hkêt nē. Mãññen amnhĩ kwÿjê hkukamã pajamaxpêr pê tanhmã mẽ ho mex to ho ri papa pê tãm ri amnhĩ nhĩpêx o papa.

²⁵ Nē kot kaj mẽ amnhĩ xàpkur xà japrôr kaxyw ma nhÿhÿm mra nē mãmrĩ axàmnhĩx ri amã mẽmoj prãm xà hkôt mẽmoj japrô. Nom kêr ka mẽ axujaprôrja kêp sãnti xàpkur xà hã mẽ hkukjêr kêt nē. ãm axàmnhĩx ri mẽ kêp mẽmoj japrôr o ri apa.

²⁶ Tĩrtũm kapêr ã kagà htũm kot ja jarênh kot: Pika piitã hkôt mẽmoj piitã kêp Tĩrtũm nhõ na. Anē. Jakamã mẽ mãmrĩ axàmnhĩx ri mẽmoj piitã haprô nē mẽmoj piitã hkur o apa.

²⁷ Tã koja mẽ kêp Kris kwÿ hkêt xwÿnhjê hõ ate kutã axàpkur kaxyw amnhĩ wÿr awÿ ka amã hwÿr amôr prãm nē mãmrĩ ma hwÿr mō. Nhũm mẽmoj to amã anhõ ka axàmnhĩx ri mãmrĩ aku. No ri tee ri amnhĩ kukamã ajamaxpêr nē tanhmã hã hkukjêr to hkêt nē. Rÿ kãm:

—Kwa xà we mryja sãnti hã mẽ apkur xà na nà?

Anhÿr o hã mẽ hkukjêr kêt nē. ãm mãmrĩ axàmnhĩx hkur o akrĩ. ²⁸⁻²⁹ Nom koja Kris kôt mẽ kot amnhĩ xãm tohtuj anhÿr xwÿnhjê hõ mẽ awÿr axà nē tee ri ja hã apumu nē amã:

—Kwa sãnti hã mẽ apkur xà na ka ri mẽ kutã hkur o akrĩ.

Anhÿr o amã kapêr ka ama nē hkaga kurê kumrêx nē hkur kêt nē. Amã mex tã Kris kôt atõja kêp omnuj jakamã ka hkaga nē hkur kêt nē. No kot ka ãm ama nē arĩ hkur o anhÿr japêr. Kot amã harênh xwÿnhnta kêp omnuj tã ka arĩ noo mã hkur

japêr. Nhũm ja hã apumu nê tee ri Tĩrtũm kapêr kukamã tanhmã hamaxpêr to. Hãmri nê apyrã nê kuku nê gaa nê tee ri amnhĩ kukamã hamaxpêr nê amnhĩ mã:

—Hêxta waa nê. Sãnti nhõja mex kêt tã pa ri kuku. Kwa na pa pêr hkurja o amnhĩ tomnuj nê. Hêxta waa nê. Anê.

Hãmri nê tee ri amnhĩ kukamã hamaxpêr o hkaprĩ nê. Ā kot amnhĩ nhĩpêx anhỹr pymaj koja mēhō ā mēmo mē apkur xà nē amã kapêr anē ka ama nē hkaga kurē kumrêx. Jao amnhĩ pix kukamã ajamaxpêr kêt nê. Mããnēn Kris kôt atō nê atōxjê mex kukamã ajamaxpêr. Nom koja amã kēp sãnti hã mē apkur xà hã harē ka ama nē ā ajamaxpêr anhỹr japêr nê ajamaxpêr o:

—Nã kēp omnuj tã kot paj mamrĩ kuku. Ja inhmã mex kēnã. ³⁰ Ra ixte Tĩrtũm mã harēnh nê ixãmnhĩx hkur o inhỹr kēnã kot kêt ā nē inhmã kapêr anē. Anê.

Kwa mē ā ajamaxpêr anhỹr kêt. Kot kaj mē ā ajamaxpêr anē hãmri nê Kris kôt atō rỳ atōx mex kukamã ajamaxpêr kêt nê.

³¹ Jakamã kêt ka mē tãm tanhmã amnhĩ nhĩpêx to ho ri apa. Nê axàpēnh mex nê. Kêt kē mē piitã ja hã mē apumu nê mē apumunh kôt amnhĩm Tĩrtũm mex ā harē. ³² Nê kêt ka mē piitã mē noo mã tãm ri amnhĩ nhĩpêx o apa. Ijaew noo mã nê Ijaew kêt xwỳnhjê noo mã. Nê Jejus kwỳjê noo mã. Mē piitã mē noo mã tãm ri amnhĩ nhĩpêx rãhã ho ri apa. Mē kot tee ri mēmoj tã mē apumunh nê hpijaam pymaj ka mē tãm ri mē piitã mē noo mã tanhmã amnhĩ nhĩpêx mex to ho ri apa. ³³ Na pa hte ā amnhĩ nhĩpêx anhỹr o ri ixpa. No na pa hte pa amnhĩ

pix kukamã ijamaxpêr kêt nê. Mê piitã mẽ mex kukamã na pa hte ijamaxpêr o ri ixpa. Pê tanhmã amnhĩ nhĩpêx to ho ri ixpa. Mê kot ja hã ixpumunh nê ixpyrà nê Jejus kôt amnhĩ xunhwÿr nê ãm kôt pix mã ri amnhĩ nhĩpêx o pa kaxyw.

11

¹ Na pre hte Kris ã ã amnhĩ nhĩpêx anê nê mẽ piitã mẽ mex kukamã hamaxpêr rãhã ho ri pa. Tã na pa hte uràk nê ã amnhĩ nhĩpêx anê. Jakamã kwa kêr ka mẽ ixpyrà nê ã amnhĩ nhĩpêx anhÿr o mãn ri apa.

*Mẽnijaja mẽ mjên ã hpijaàm ã mẽ kãm karõ
Epes 5.22; Wam Pêtre 3.1-6*

² Nê na ka xep htem arĩ ra ixte tanhmã mẽ amã ixkapêr toja mã ajamaxpêr tÿx o ri apa. Na pa pre Kris kôt mẽ pahtõ nê mẽ pahtõxjaja axpên wÿr pikuprõnh nê tanhmã amnhĩ nhĩpêx to hã mẽ amã karõ ka prem inhma nê mẽ uràk nê ã amnhĩ nhĩpêx anê. ãm hãmri na ka htem ã amnhĩ nhĩpêx anhÿr o apa. Ja na inhmã mex.

³ Na pa pre krĩ hõ kamã mẽnijaja kot amnhĩ krã hpro hã mẽ amã mẽ harê. Ka prem inhma nhũm mẽ akwÿjaja kãm ja mex nê nhũm mẽ akwÿjaja tee ri ja kukamã ajamaxpêr. No mẽmo kaxyw na hte mẽnijaja amnhĩ krã hpro? E kot paj ixprĩ hã mẽ amã ja jarê ka mẽ inhma. Nà Tĩrtũm kêp Kris jamãr xwÿnh nhũm Kris kêp Tĩrtũm mã mẽ inhmyjê jamãr xwÿnh. No mẽ anijaja mẽ amjên kêp Kris mã mẽ ajamãr xwÿnh. Na hte mẽnijaja ohtõ nê ra mẽ mjên ã amnhĩ to amnhĩrĩť kaxyw amnhĩ krã hpro nê ri pa. No mẽ inhmyjaja na pa

htem ã amnhĩ nhĩpêx anhÿr kêt nê. Na pa htem amarĩ ixkrã hkênh nê ixpa. ⁴ Jakamã na pa htem Tĩrtũm kapêr mar xà hã ixkre hwÿr axpên wÿr akuprõ nê Tĩrtũm nhÿ hã mē anijê mã kapêr jarênh o ixkuhê. Rÿ Tĩrtũm mã tanhmã mē pajarênh to. No ãm amnhĩ krã hpro hkêt rãhã kãm mē ajahkre rÿ kãm mē pajarê. Kot pa mē amnhĩ krã hpro nê te mē apê ixprõjaja mē apê mē ijamãr xwÿnh ã mē ajarênh pyrãk. Jao te mē ixte mē ijamãr xwÿnh Kris ã ixpijaàm kêt pyrãk o amnhĩ nhĩpêx. ⁵ No mē anijaja mē ixte Kris mã mē ajamãr xwÿnh jakamã na ka htem Tĩrtũm nhÿ hã mē inhmã kapêr jarênh rÿ kãm mē pajarênh kaxyw nê amnhĩ krã hpro. Mē ixte Kris mã mē ajamãr xwÿnhjê hã apijaàm kaxyw ã amnhĩ nhĩpêx anê nê mē amnhĩ krã hpro. Kot ka mē ã amnhĩ nhĩpêx anhÿr kêt nê te mē ate mē ixtã apijaàm kêt pyrãk o amnhĩ nhĩpêx nhũm mē amjên tee ri ja hã apumu nê hpijaàm nê. Te ate amnhĩ krã hkênh nê ri apa nhũm tee ri apumunh nê hpijaàm pyrãk. ⁶ Kot kaj mē amnhĩ krã hkênh nê ri apa nê amnhĩ kamã apijaàm nê ri apa. Mē anijaja na ka htem akrã hkĩ japjê nê kamã amex nê ri apa. No kot ka mē amnhĩm akrã hkênh nê apunuj nê amnhĩ kamã apijaàm nê ri apa. Jakamã kêt ka mē Tĩrtũm mã amnhĩ jarênh kaxyw nê amnhĩ krã hpro. Nom kot ka mē amjên ã apijaàm kêt nê ri apa hprãm japêr nê mamrĩ amnhĩm akrã hkênh nê ri amnhĩ kuk ã apijaàm kêt nê ri apa.

⁷ No mē inhmyjaja na pa htem amnhĩ krã hpro hkêt nê. Te mē ixpê Tĩrtũm pyrãk nhũm mē anijaja te mē apê Tĩrtũm kra pyrãk o na pu htem axpên nhĩpêx. Tĩrtũm krajaja na htem mēmoj tã Tĩrtũm

mã karõ hkêt nẽ. Ja pyrã nẽ mẽ anijaja na ka htem mẽ inhmyjê mã mẽmoj tã karõ kamã axihtỳx o apa hkêt nẽ. Na ka htem mẽ ixtã apijaàm kãm mẽmoj tã mẽ ixwỳ.

⁸ Amnepê mã Tĩrtũm kot mẽmoj to kator krax rũm na pre myja kumrẽx nhĩpêx hãmri nẽ kêp õkwa i hõ kapa nẽ ho kãm hprõ nhĩpêx. No na pre nija kumrẽx nhĩpêx nẽ õkwa i ho kãm mjên nhĩpêx kêt nẽ. ⁹ Myja mã na pre hprõ nhĩpêx. No nija mã mjên nhĩpêx kêt nẽ. ¹⁰ Jakamã kêr ka mẽ anijaja amjên ã apijaàm ã amnhĩ to amnhĩrĩť kaxyw hãmri nẽ mẽ inhmã Tĩrtũm nhỹ hã tanhmã akapêr jarênh to kaxyw rỳ kãm amnhĩ jarênh kaxyw hãmri nẽ amnhĩ krã hpro nẽ akuhê. Hãmri nhũm Tĩrtũm kapêr o mẽ wrỳk xwỳnhjaja ja hã mẽ apumu nẽ hkĩnh nẽ tee ri mẽ akukamã hamaxpêr kêt nẽ.

¹¹⁻¹² Nẽ wam ni kator xwỳnhhta na pre myja rũm kato. Tã na pa htem jarãhã mẽ inhmyjaja hpãnhã mẽ anijê rũm ijapõj. Tĩrtũm jamaxpêr xã hkõt. Tãm na pre ã mẽ pahte amnhĩ nhĩpêx anhỹr kaxyw ã mẽ panhĩpêx anẽ. Tã mẽ ixpê Pahihti Kris kwỳ hã mẽ inhmyjaja nẽ mẽ anijaja na pu htem ri ahte papa hkêt nẽ. Na pu htem axpên kutã pamã axpên hkĩnh o papa nẽ mẽmoj to axpên kutã panojarêt o ri papa. Nẽ axpên to presija ho papa. Na hte mẽ anijaja mẽ amjên o presija ho apa. Nẽ mẽ amyjaja na ka htem mẽ aprõ ho presija ho apa. Tã kêr ka mẽ anijaja mẽ amjên ã apijaàm o ri hkõt apa. ¹³ Jakamã kwa mẽ kot amnhĩ krã hproja kukamã ajamaxpêr tỳx nẽ. Xã mẽ anhõ krĩ kamã mẽnijaja mẽ mjên ã hpijaàm ã amnhĩ to amnhĩrĩť kaxyw amnhĩ krã hpro nã? Koja mẽ ja kaxyw ã amnhĩ

nhîpêx anhÿr japêr kê mẽ rĩ mẽ anoo mã Tĩrtũm mã amnhĩ jarênh kaxyw nê kupê xê hkwỹ ho amnhĩ krã hprõ nê rĩ kãm amnhĩ jarê. Nom koja mẽ ã amnhĩ nhîpêx anhÿr kêt nhũm mẽmyjaja tee ri ja hã mẽ omunh nê ho kapêr hkêt japêr hãmri kê mẽ rĩ amnhĩ krã hpro hkêt nê ri pa.

¹⁴ Mẽ kot mẽ pahte amnhĩ nhîpêx ã mẽ pah-pumunh nê hkĩnh kaxyw na pu htem tanhmã amnhĩ nhîpêx to ho ri papa. Na htem mẽ pahkrã hkĩ jarênh o: “Koja mẽmyjaja hkrã hkĩ japjê nê ri pa nê ra kamã omnajti.” Anhÿr jakamã na pa htem amnhĩ krã hkênh nê ri ixpa. ¹⁵ No mẽ anijaja na htem mẽ ajarênh o: “Mênijaja na htem hkrã hkĩ japjê nê ri pa nê kamã muxti.” Anhÿr jakamã na ka htem akrã hkĩ japjê nê ri apa. Mẽ akĩ te kêp mẽ akrã hpro xà pyrãk. Na ka htem ã amnhĩ nhîpêx anhÿr o apa.

¹⁶ E na pa ra mẽ amã krĩ hkwỹ kamã Kris kwỳ nijaja kot mjên ã hpijaàm ã amnhĩ to amnhĩrĩt kaxyw tanhmã amnhĩ nhîpêx to hã mẽ harê. Tã koja mẽhõ nija tee ri ja ma nhũm ja kêp omnuj japêr. Nhũm amnhĩ jarênh o:

—Kêt. Kot paj tanhmã inhmã amnhĩ nhîpêx to hprãm xà hkôt tanhmã ri amnhĩ nhîpêx to ho ri ixpa. Koja inhmjên ja hã ixpumu nê hpijaàm nê rĩ tãm.

Anhÿr ã amnhĩ jarê ka mẽ tee ri ã kot amnhĩ jarênh anhÿrja ã ama nê kãm:

—Kwa nà ã ri ajamaxpêr anhÿr kêt nê. Na hte Kris kwỳjaja ã hamaxpêr anhÿr kêt nê. Anê.

*Jejus tyk mã mẽ pajamxpěr pê tanhmã mẽ
pahte amnhĩ to hã mẽ pajarēnh*

Matêwre 26.26-30; Makre 14.22-26; Rukre 22.19-20

¹⁷ Nẽ na ka xep htem Tirtũm mã amnhĩ jarēnh xà hã ixkre hwỳr axpẽn wỳr akuprõ nẽ kamã amnhĩ to mex kêt nẽ. Na ka htem tanhmã amnhĩ tomnuj to pa tee ri mẽ ajarēnh ma nẽ ixkaprĩ nẽ. Nẽ amnhĩm mẽ amex ã mẽ ajarēnh kêt nẽ. ¹⁸ Na ka xep htem axpẽn wỳr akuprõ nẽ mẽmoj tã axpẽn mã akir nẽ axpẽn pê anhgrà. Nẽ ahpỹnhã mẽmoj mã ajamxpěr jao ra mẽ amã axpẽn kĩnh kêt nẽ. Na pa tee ri ã mẽ ajarēnh anhỹrja ma nẽ ixkaprĩ htỳx nẽ. ¹⁹ Xà na hte Tirtũm ahpỹnhã tanhmã mẽ pahte amnhĩ anhĩpêx to hã mẽ pahpumunh kôt kãm mẽ pajapê hkêt ã amnhĩ jarẽ? Nà na hte ã amnhĩ nhĩpêx anhỹr kêt nẽ. Kãm mẽ pajapê ho axpẽn pyræk kênã.

²⁰ Nẽ na hte Kris kwỳjê piitã tõhã axpẽn wỳr akuprõ nẽ Jejus tyk mã hamxpěr kaxyw pãwti hkwy hku. Tã mẽ kajaja na ka xep htem ja kaxyw axpẽn wỳr akuprõ nom axtem nẽ Jejus tyk mã ajamxpěr pê axàpkur kêt nẽ. ãm mẽ axàpkur pix kukamã ajamxpěr nẽ axtem nẽ axàpkur rũnh o akrĩ. ²¹ Jao amnhĩ pix kukamã ajamxpěr. Mẽ akwỳjaja wam mrrar nẽ hpôx nẽ mẽ apkur xà hã mẽ hkrĩ xwỳnhjaja na xep htem hkwyjê rom mẽõta pinh pa. Nẽ wĩhtija nhũm mẽ mãânẽn hpenh pa nẽ axtem nẽ ho xpã. Jakamã nhũm mẽ akwỳjaja kot amnhĩ to hapu nẽ hpôx xwỳnhjaja mẽmojta ã hprãr pa. ²² Kwa mon ka mẽ amã hprãm nẽ anhõrkwỳ kamã axàpkur kêt nẽ? Mẽ kot Tirtũm mã amnhĩ jarēnh xà hã ixkre kamã na htem apkur rũnh hkêt

ně. Ka mẽ ã amnhĩ nhĩpêx anê nhũm mẽõ hkêt xwỳnhjaja amnhĩ to hapu nê mra nê mẽõ hã prã nê amnhĩ kamã hpijaàm nê. Kwa xà kot pa ã mẽ ate amnhĩ nhĩpêx anhỹr ã mẽ ajarênh ma nê ixkĩnh nê mẽ ate amnhĩ nhĩpêx mex ã mẽ ajarê? Nà kot paj ã mẽ ajarênh anhỹr kêt nê.

²³ Pahihti Jejus na pre ja hã tanhmã inhmã kapêr to nê inhmã:

—Kêr ka mẽ tõiã axpên wỳr akuprõ nê axàpkur pê ixtyk mã măn mẽ ajamaxpêr pê ã amnhĩ nhĩpêx anê nê ã amnhĩ nhĩpêx anê. Anê.

Jakamã kot paj ixprĩ hã amnhĩ xô ri mẽ amã kot tanhmã inhmã kapêr tota jarê ka mẽ inhma. Nà Jejus kormã htyk kêt ri Jut Kariot ra kot pôristi mã hã àmnênh kaxyw nhũm kamàt nhũm Jejus mẽ ý hã mẽ ahkre xwỳnhjê mẽ apkur kaxyw hkrĩ hpa. Hãmri nhũm Jejus pãwti hõ py nê o xa ²⁴ nê Tĩrtũm mã harê nê kãm:

—Pa Papaj. Nà ãm hãmri na ka hte mẽ inhmã mẽ inhõ mex o apa. Anê.

Nê hpãnhã pãwja o hkry pa nê ho mẽ kot ý hã mẽ ahkre ho mẽ pa xwỳnhjê nhĩpêx pa nê mẽ kãm:

—E na pa ã pãwti ho hkry nê mẽ amã òr anê. Koja mẽ ã inhĩpêx anê nê te mẽ kot ixto hkry hpar pyràk o inhĩpêx pa amnhĩ xà htỳx kamã ijamak kãm ty. Nom mẽ anê kot paj ty. Jakamã e kêr ka mẽ ixwakre kamã tõiã axpên wỳr akuprõ nê ixte mẽ ate amnhĩ tomnuj pãnhã amnhĩrer kaxyw mẽ anê ixtyk mã ajamaxpêr pê akĩnh nê pãwta kur o akrĩ. E mẽ mãmri axàmnhĩx aku. Anê.

²⁵ Hãmri nê hpãnhã kop kãm wĩhtita py nê o xa nê mẽ kãm:

—E kop kãm wĩhtija te kêp Tĩrtũm kot mẽ atã amnhĩ jarẽnh nyw xà jarẽnh pyræk. Ixtyk kukwak ri koja mẽ ato hkra. Kot paj ty nhũm ixkamrô mẽ anê axkapĩ. Jakamã e. Mẽ kopja kamã wĩhti ho akõm o axpẽn nhĩpêx. Nê ho akõm pẽ ixte mẽ anê ixtyk mã ajamaxpêr. Anê.

²⁶ Tã ã kot amnhĩ jarẽnh anhỹr jakamã na pu htem axpẽn wỹr akuprõ nê pãwti hkwỹ hku nê mẽmo kagô hkwỹ o ixkõ. Nê ho pahkõm pẽ axpẽn mã Jejus tyk jarẽnh o pahkrĩ. Tã kêr pu mẽ arĩ ã amnhĩ nhĩpêx anhỹr o ri papa rãhã nhũm Jejus akupỹn mẽ pahwỹr wrỹ. ²⁷ Jakamã kot kaj mẽ tõhã mẽmo arĩgro hã kot mẽ panê htykja mã ajamaxpêr kaxyw axpẽn wỹr akuprõ. Hãmri nhũm mẽ anhĩõ mẽ awỹr axà nê nhỹ. Nom axtem nê Jejus tyk mã hamaxpêr kêt japêr. Nê htỹx pãwti kur o nhỹ. Nê hkõt amarĩ mẽmo kagô ho hkõm o nhỹ. Koja ã htyk mã hamaxpêr kêt rãhã amnhĩ nhĩpêx anê nê te Jejus o kapêr pyræk o amnhĩ nhĩpêx. Te ho kapêr o:

—Nà Jejus amarĩ htyk nhũm hkamrô amarĩ hpikapĩr kênã. Na pre mẽ panê htyk kêt nê.

Anhỹr o ho kapêr pyræk. ²⁸ Jakamã kwa kêr ka mẽ ate pãwta kur kaxyw nê taxy kormã tanhmã ate amnhĩ nhĩpêx to mã ajamaxpêr nê ajamaxpêr o:

—Kwa mãn pa Tĩrtũm kapêr kõt amnhĩ nhĩpêx mex rãhã ho ri ixpa nà?

Anhỹr o mãn ajamaxpêr. Hãmri nê ate hkõt amnhĩ nhĩpêx mex ã amnhĩ pumu nê amarĩ axãmnhĩx aku. No kot ka mẽ kormã mẽmoj punuj kaga hkêt nê arĩ ri ho anhỹr o pa hãmri nê kãm ajamaxpêr nê hkur kêt nê. Rỹ tanhmãn tee ri

tanhmã ate amnhĩ tomnuj tota mã ajamexpêr nê akapri nê. Hãmri nê tokyx Tirtũm mã amnhĩ jarê nê amnhĩ to mex prãm xaj amnhĩ to awy hãmri nê arĩ kormã axãmnhĩx pãwtita ku. ²⁹ Kojã mēhō mē akōt axà nē mēmoj kukamã hamaxpêr pê htýx pãwti nhĩrēnhta õ py hkur o nhỹ. Hãmri nhũm Tirtũm tee ri ja hã omu nē hã tanhmã ho. ³⁰ Na ka mē ra axohtō nē ã amnhĩ nhĩpêx anē nē atýx ri mēmoj kukamã ajamaxpêr pê pãwta ku. Jejus kot mē panê htykja mã ajamaxpêr kêt pê atýx tanhmã ajamaxpêr to pê hkwý hkur o akrĩ. Mýrapê na ka mē ra ja hã axà nē ri apa. Nē mē akwýjaja ra htyk rax nē. ³¹ Nom kot ka mē axpēn wýr akuprō hãmri nē akupým tãm axpēn kōt ajamaxpêr nē axpēn kōt amnhĩ nhĩpêx nē rĩ kormã pãwtita ku. Hãmri nhũm Tirtũm ja hã mē apumu nē tanhmã mē ato hkêt nē. ³² Na hte mē pahte tanhmã amnhĩ tomnuj to hã mē pahpumu nē hã tanhmã mē pahto. Mē pahte ja hã amnhĩ pumunh nē axte ã amnhĩ nhĩpêx anhýr kêt kaxyw na hte ã mē pahpê hkrajê nhĩpêx anē. Jakamã kot puj mē nhýrmã mē kēp hkra hkêt xwýnhjê hkôt kuwyta wýr ma papa hkêt nē. ³³ Jakamã e Kris kōt ixtō nē ixtōxjaja. Kêr ka mē axte Pahihti Jejus tyk mã ajamaxpêr kaxyw axpēn wýr akuprō. Hãmri nē ra axpēn wýr apikuprōnh pa hã axpēn pumu nē rĩ kormã pãwti hkwý hku nē hkur pê Jejus kot mē panê htyk mã ajamaxpêr o akrĩ. ³⁴ Nē ka mē atō ra amã prãm japêr nē anhōrkwy kamã apku nē rĩ kormã mē hkôt tē. Jao ra anhōhy htu nē ajamakêtkati nē akwýjê jamãr o nhỹ. Kê mē hpōx pa ka mē atipxi nē Pahihti Jejus tyk mã ajamaxpêr pê hkur o akrĩ. Hãmri nhũm

Tĩrtũm ja hã mẽ apumu nẽ hkĩnh nẽ tanhmã mẽ ato hkêt nẽ.

Na ka prem mẽ ate inhmã kagà nẽ mẽnhta kamã mẽmoj tã ixkukjêr rax nẽ. Tã na pa ra kagà ja kamã mẽ amã hkwý jarẽnh rax nẽ. Nom kot paj piitã harẽnh par kêt nẽ. Kot paj ãm mẽ amã hkwý pix jarẽ. Hãmri nẽ nhỹrmã ma mẽ awýr mõ nẽ mẽ apumu nẽ kormã axte mẽ amã harẽnh jatur xãm kumẽ.

12

Mẽ kot Tĩrtũm kapêr o hêx xwýnhjê jarẽnh

Rõmãn 12.6-8; Wam Korît 14.29; Wam Pêtre 4.10-11; Wam Juãw 4.1-2

¹ Nẽ kot paj hpãnhã mẽ amã tanhmã Tĩrtũm Karõ jarẽnh to ka mẽ inhma. Tanhmã kot mẽ pahkrã hto nhũm mẽ pahte ahpýnhã tanhmã kãm amnhĩ nhĩpêx to ho papaja kot paj mẽ amã harẽ.

² Amnepê mã kormã mẽ ate Kris kôt amnhĩ xunhwýr kêt ri na ka prem sãnti hkôt ri amnhĩ nhĩpêx o ri apa. Kapêr kêt tã ka prem hkôt ri amnhĩ nhĩpêx rãhã ho ri apa. Te kot mẽ ano kupyrr pyrãk ka mẽ kãm mex o mex ã harẽnh o ri apa. Nẽ kãm amnhĩ jagrer pê amnhĩ to hwýr o ri apa. ã na ka prem amnhĩ nhĩpêx anhýr o ri apa. ³ Tã ra hpãnhã Tĩrtũm kôt amnhĩ xunhwý.

Na htem ohtô nẽ Tĩrtũm nhỹ hã kapêr jarẽnh o pa hã amnhĩ jarẽnh tã no ãm mẽ hkwýjaja ja hã amnhĩ to hêx. Tã kot paj ixprĩ hã mẽ amã tanhmã mẽ harẽnh to. Kojã mẽhõ mẽ kãm Tĩrtũm nhỹ hã kapêr jarẽnh o pa hã amnhĩ jarẽ hã kojã Jejus o kapêr punuj o pa hkêt nẽ. Kojã harẽnh o:

—Jejus kêp mẽ panhõ Pahihti jakamã kwa pu mẽ hkõt amnhĩ xunhwỳ nẽ hkõt amnhĩ nhĩpêx o ri papa.

Anhỹr o harẽ. Koja mẽhõ ã mẽ amã kapêr anẽ ka mẽ ama nẽ mẽ kot Tĩrtũm nhỹ hã kapêr jarẽnh o pa xwỳnh ã omunh kurê kumrêx. No koja mẽ amã ã kapêr anhỹr kêt nẽ ka mẽ ama nẽ Tĩrtũm kapêr o hêx o pa hã omunh kurê kumrêx.

Tĩrtũm Karõ kãm mẽ pahte axpẽn to mex prãm ã harẽnh

Rômãn 12.6; Epes 4.7; Wam Pêtre 4.10

⁴ Nẽ ahpỹnhã kot tanhmã mẽ panhĩpêx to xwỳnhja ãm pixii. Kêp Tĩrtũm Karõ. Na hte mẽ pahkarõ mã agjê nẽ ahpỹnhã tanhmã mẽ pahte axpẽn to mex kaxyw tanhmã mẽ panhĩpêx to. Kot tanhmã mẽ panhĩpêx to xàja ohtô. Mẽ pahte ahpỹnhã ri tanhmã kãm amnhĩ nhĩpêx to nẽ tanhmã axpẽn to mex to ho ri papa kaxyw na. Tĩrtũm Karõ na hte ja kaxyw tanhmã mẽ pahkrã hto.

⁵ Nẽ mẽ pahte kãm tanhmã amnhĩ nhĩpêx to ho papa xwỳnhja haxwỳja ãm pixii. Kêp Pahihti Jejus. Tã na pu htem ahpỹnhã kãm tanhmã amnhĩ nhĩpêx to ho ri papa.

⁶ Nẽ kot mẽ pahto ajuta nhũm mẽ pahte ahpỹnhã tanhmã axpẽn to mex to ho papa xwỳnhja haxwỳja ãm pyxii. Kêp Tĩrtũm. Na pu htem ahpỹnhã tanhmã hkõt axpẽn xunhwỳr tỳx to kaxyw tanhmã axpẽn to mex to ho papa.

⁷ Nẽ Karõja na hte ahpỹnhã tanhmã axpẽn kaxyw mẽ panhĩpêx to pu mẽ axpẽn to ajuta mex o ri papa.

- 8 Jakamã na pu hte mẽ pahkwỳjaja Tĩrtũm Karõ nhỹ hã ma mẽ pahkwỳjê mã Tĩrtũm kapẽr jarẽnh o ri mẽ hkõt papa.
- Nẽ mẽ pahkwỳjaja ma ỹ hã paxàhpumunh mex pẽ ma ri kapẽr o mẽ ahkre ho mẽ hkõt papa.
- 9 Nẽ mẽ pahkwỳjaja Karõ nhỹ hã Tĩrtũm kot tanhmã mẽ pahto ajuta hto kaxyw hkõt pajamaxpẽr tỳx nẽ.
- Nẽ mẽ pahkwỳjaja akupỹm mẽ à xwỳnhjê ho mex o papa nhũm mẽ akupỹm mex nẽ pa.
- 10 Nẽ mẽ pahkwỳjaja aa mẽ kot mẽmoj pumunh kêt kwỳ ho anhỹr o ri mẽ hkõt papa.
- Nẽ mẽ pahkwỳjaja Tĩrtũm kapẽr mar tỳx nẽ ô ri mẽ kãm harẽnh o mẽ hkõt ri papa.
- Nẽ mẽ pahkwỳjaja Tĩrtũm Karõ nhỹ hã tanhmã mẽ kot amnhĩ nhĩpêx to hã mẽ omunh o papa. Rỳ pahprĩ hã mẽkarõmnuti nhỹ hã mẽ kot amnhĩ nhĩpêx ã mẽ omunh o papa.
- Nẽ mẽ pahkwỳjaja nhãm mẽ kapẽr mar kêt tã ra mẽ kapẽr o pakapẽr.
- Nẽ mẽ pahkwỳjaja mẽ kapẽr o pakapẽrja ma nẽ mẽ kot mar kêt xwỳnhjê mã harẽ. Kormã aa pahte mar kêt tã ra pahprĩ hã mar mex nẽ mẽ kãm harẽ.
- 11 ã na hte Tĩrtũm Karõ kãm hprãm xà hkõt tanhmã mẽ panhĩpêx to pu mẽ ahpỹnhã ỹ hã ã axpẽn nhĩpêx anhỹr o ri axpẽn kõt papa.

Te mẽ pahpê Kris nhĩ pyràk ã mẽ pajarẽnh

Rõmãn 12.3-8; Epes 1.22-23, 4.11-16; Korosẽ 3.15

- 12 E pa hpãnhã mẽ amã mẽ panhĩ kamã tanhmã mẽmoj jarẽnh to ka mẽ inhma nẽ hã anohtỳx nẽ. Mẽ panhĩja ãm pixi htã no ãm kamã mẽmoj xohtô.

Kamã mẽ pahte nẽ kamã mẽ pahpa nẽ kamã mẽ pajakwa. Nẽ mẽ panhĩnhu nẽ mẽ pano. Ǻ mẽ panhĩ kamã mẽmoj xohtô kot anhÿr. Ja pyrã nẽ Kris nhĩja âm pixi htã te mẽ pahpê ĩ kamã mẽmoj xohtôta pyrãk. Mẽ pahkwÿjaja te mẽ pahpê hte pyrãk. Nẽ mẽ pahkwÿjaja te mẽ pahpê ĩhkra pyrãk. Nẽ mẽ pahkwÿjaja te mẽ pahpê no pyrãk.

¹³ Mẽ pahpê Kris kwÿjaja axpẽn kaxyw mẽ paxohtô. Mẽ ixpê Ijaewjaja nẽ mẽ apê Ijaew kêt xwÿnhjaja. Nẽ amarĩ ri mẽ kãm mẽ axàpênh o mẽ apa xwÿnhjaja nẽ amnhĩ mã ri mẽ axàpênh o mẽ apa xwÿnhjaja. Ǻ ahpÿnhã mẽ paxohtô kot anhÿr tã nhũm Tĩrtũm Karõ te mẽ pahpê Kris nhĩ pixi pyrãk o mẽ panhĩpêx. Nhũm Krisja mẽ pahpiitã mẽ pamã Karõ gõ nhũm mẽ pahkarõ mã agjê. Pixi htã mẽ pahpiitã mẽ pahkarõ mã agjê.

¹⁴ Nẽ mẽ panhĩja pixi tã kamã tanhmã mẽ pakute xàja ohtô. Tã Kris nhĩja te kot mẽ panhĩja pyrãk. Urãk nẽ kamã mẽ paxohtô. Jakamã na pu htem ahpÿnhã tanhmã kãm amnhĩ nhĩpêx to ho ri papa. Karõ kot tanhmã amnhĩ kaxyw mẽ panhĩpêx to xà hkôt.

¹⁵ Nẽ kop âm mẽ pahparja kapêr ronhÿx tee ri mẽ panhĩhkra pumu nẽ amnhĩ mã:

—Hêxta waa nẽ. Kêp âm ixpê mẽ ĩhkra ronhÿx pa inhmex nẽ ijarir. No âm ixpê mẽ hpar pix jakamã pêr âm mẽ hkĩnhã ixpê mẽ hkwy hkêt âm ixpê mẽ hatur xà pix na pa.

Anhÿr o amnhĩ jarênh japêr. Nom ja kot anhÿr kêt. Axtem nhÿhÿm kot mẽ pahto pa kaxyw na mẽ pahparja. Nẽ axtem mẽmoj tã mẽ paxàpênh rÿ mẽmoj jamÿnh kaxyw na mẽ panhĩhkraja. Na pu

htem hamē wa ho presija rāhā ho papa. Ja pyrā nē kot puj mē pahkwỳjê hō mē parom Tirtūm Karō nhỹ hā mēmoj tā àpēnh tỳx ā omu nē hkĩnhā mē pahte amnhĩ to warê hkêt ā amnhĩ jarēnh o papa hkêt nē.

¹⁶ Nē mē pajamakja kapēr ronhỹx kapēr o:

—Hêxta waa nē. Kêp apu ixpê mē no ronhỹx pa inhmex nē ijarir. No âm ixpê mē umar xà pix jakamā pēr âm ixte ho warê hkêt kumrêx.

Anhỹr o amnhĩ jarēnh japêr. Nom ja kot anhỹr kêt. Hamē wa mex kēnā. Axtem ho mē paxumar kaxyw na mē pajamakja. Nē axtem ho mē parit kaxyw na mē panoja. ¹⁷ Kêp âm mē pano pix ronhỹx pu mē parit pix nē paxumar kêt nē ri papa. Rỳ kêp âm pajamak pix ronhỹx pu mē paxumar pix nē parit kêt nē mē paxupār kêt nē ri papa. ¹⁸ Mē panhĩa pixi htā kamā hikukrêx xohtôô. Na pre Tirtūm amnhĩ krā hkôt kamā mēmoj piitā hipêx nē hanhō. ¹⁹ Kêp âm mē panhĩa kamā âm mēmoj pixi ronhỹx pu mē pamex kêt nē papa. ²⁰ Tā no âm kot anhỹr kêt. Mē panhĩa âm pixi htā kamā hikukrêx xohtôô. ²¹ Jakamā na hte mē panoja amnhĩ nē mē panhĩhkra mā kām:

—Tk kwa ma tē. Ixte ato presijare hā.

Anhỹr o kām kapēr kêt nē. Rỳ mē pahkrāja amnhĩ nē mē pahpar mā kām:

—Tk kwa ma tē. Na pa ato presija hkêt nē.

Anhỹr o kām kapēr kêt nē. Ja pyrā nē kot puj mē nhỹri Kris kôt panhĩõ pumu nē pamex o pahte hakrenh ā amnhĩ jarēnh kêt nē. ²² Nē mē panhĩ kamā mēmoj kwỳ te hirerek pyrāk tā no pu mē arĩ pamā hapê nē. Ja pyrā nē kêp pu mē kormā mē kot Kris kôt amnhĩ xunhwỳr tohtuj anhỹr xwỳnhjaja

pu mẽ pamã mẽ hkĩnh kãm tanhmã mẽ kutã pano-
jarêť to ho ri papa.

23-24 Nẽ na pu htem mẽ panhĩ kamã mẽ pakukrêx kwỳ hã pahpijaàm nẽ hpro nẽ ri ho papa. Nẽ hkwy hã pahpijaàm kêt nẽ hpro hkêt nẽ ho ri papa. Nẽ hkwy mẽ pahpê omnajti htã pu mẽ ho mex nẽ ri ho papa. Tĩrtũm kot ã mẽ panhĩpêx anhỹr jakamã na pu htem mẽ pakamã mẽ pakukrêx kwỳ mẽ pahpê omnajti htã pu mẽ ho mex nẽ ri ho papa. Ja pyrã nẽ kêt pu mẽ Tĩrtũm kôt mẽ pahtõ nẽ mẽ pahtõx piitã ho mex o ri papa. Nẽ tãm mẽ hipêx. Mẽ pahkwỳjaja muxre nẽ mẽ pahkwỳjaja omnajti htãã. Tanhmã mẽ kute htã pu mẽ kêp mẽ Jesus kôt mẽ pahtõ nẽ mẽ pahtõx ã mẽ ho mex o ri apa.

25 Nẽ na hte mẽ panhĩ kamã mẽ pahpar nẽ mẽ panhĩhkra nẽ piitã axpẽn kôt àpênh mex o pa. No na hte mẽ pahparja nhỹhỹm ma mra nhũm ihõja hkwym nhỹhỹm ma mrar kêt nẽ. Na hte wa axpẽn kôt àpênh mex o pa. Ja pyrã nẽ kêt pu mẽ pahpê Tĩrtũm krajaja axpẽn kôt amnhĩ nhĩpêx rãhã ho ri papa. Nẽ axpẽn to mex rãhã ho ri papa. No ri axpẽn kwỳm ri tanhmã amnhĩ nhĩpêx to ho ri papa hkêt nẽ.

26 Na pu htem tõhã nhỹhỹnh panhĩ kamã paxà nẽ ri papa. Pahkrã tãťãk rỳ pakatut gêk. Jao te mẽ panhĩ piitã kamã mẽ paxà pyrãk. Nẽ nhỹhỹnh akupỹm pamex nẽ te panhĩ piitã hkôt akupỹm pamex pyrãk. Ja pyrã nẽ koja Kris kôt panhĩõ nhỹhỹnh à nẽ ri pa. Rỳ tanhmã amnhĩ to nẽ ra hkaprĩ nẽ ri pa pu mẽ ja hã omu nẽ ỹ hã pahkaprĩ nẽ papa. No koja mẽmoj tã hkĩnh nẽ pa pu mẽ ja hã omu nẽ ỹ hã pahkĩnh nẽ papa.

Te mẽ pahpê Kris nhĩ pixi pyràk ã mẽ pa jarēnh

²⁷ Nẽ mẽ pahpê Kris kwỳjaja te mẽ pahpê Kris nhĩ pixi pyràk. Ahpỳnhã mẽ pahte tanhmã amnhĩ nhĩpêx to ho papa htã mẽ pahpê Kris kwỳ jakamã te mẽ pahpê ì pixi pyràk.

²⁸ Nẽ mẽ pahte Kris kôt tanhmã pahkwỳjê ho ajuta hto ho papa kaxyw na pre Kris ahpỳnhã tanhmã mẽ paxunhwỳr to.

Mẽ pahkwỳjaja mẽ pahte ÿ hã nhãm mẽ kãm kapêr jarēnh o papa kaxyw mẽ paxunhwỳ.

Nẽ mẽ pahkwỳjaja mẽ pahte ÿ hã tanhmã kapêr jarēnh to ho ri papa kaxyw mẽ paxunhwỳ.

Nẽ mẽ pahkwỳjaja Tĩrtũm kapêr jarēnh o mẽ ahkre ho ri mẽ papa kaxyw mẽ paxunhwỳ.

Nẽ mẽ pahkwỳjaja mẽ pahte aa mẽ kot mẽmoj pumunh kêt kwỳ ho anhỳr o ri papa kaxyw mẽ pa xunhwỳ.

Nẽ mẽ pahkwỳjaja akupỹm mẽ à xwỳnhjê ho mex o mẽ papa kaxyw mẽ pa xunhwỳ.

Nẽ mẽ pahkwỳjaja mẽ kapêr o mẽ hihtỳx o mẽ papa kaxyw mẽ pa xunhwỳ.

Nẽ mẽ pahkwỳjaja mẽ pahte tanhmã mẽ ho ajuta ho ho ri papa kaxyw mẽ pa xunhwỳ.

Nẽ mẽ pahkwỳjaja nhãm mẽ kapêr õ ho mẽ pakapêr o mẽ papa kaxyw mẽ pa xunhwỳ.

Ã na pre ahpỳnhã mẽ pahpê hkwyjê piitã mẽ paxunhwỳr anê. ²⁹ No na pu htem pahpiitã axpên kôt Tĩrtũm kapêr o mẽ ahkre ho ri papa hkêt nẽ.

Nẽ mẽ pahpiitã ÿ hã tanhmã pakapêr to ho ri papa hkêt nẽ.

Nẽ mẽ pahpiitã kapêr jarēnh o ri papa hkêt nẽ.

Nẽ mẽ pahpiitã aa mẽ kot mẽmoj pumunh kêt kwỳ ho anhỳr o ri papa hkêt nẽ.

30 Nê mẽ pahpiitã akupÿm mẽ à xwÿnhjê ho mex o ri papa hkêt nê.

Nê mẽ pahpiitã mẽ kapêr õ ho ri pakapêr o ri papa hkêt nê.

Nê mẽ pahpiitã ri mẽ kapêrja ma nê pakapêr kãm pahkwÿjê mã harênh o ri papa hkêt nê.

Na pu htem ahpÿnhã tanhmã Kris kôt mẽ pahkwÿjê ho ajuta hto ho ri papa. 31 Tã kêr pu mẽ pahpiitã pamã axpên kÿnh pê tanhmã axpên to mex to ho ri papa. Ja na mex o kot mẽmoj piitã hakrenh par. E kot paj ixprÿ hã tanhmã mẽ amã ja jarênh to ka mẽ inhma.

13

Mẽ pahte axpên kamã paxukaprÿ ho papa hã mẽ pamã karõ

Juãw 13.31-35; Karatas 5.13-15; Korosê 3.12-14

¹ Kot pa ma mẽ piitã ahpÿnhã mẽ kapêr kãm mẽ kãm Tÿrtũm kapêr jarênh o ri ixpa japêr. ãm mẽ piitã mẽ kapêr o ixkapêr mex o mẽ kãm harênh o ri ixpa japêr. Nê Tÿrtũm kapêr o mẽ wrÿk xwÿnhjê kapêr o mẽ ahkre ho ri ixkwÿjê hkôt ixpa japêr. Tã inhã mẽ hkÿnh kêt kãm ixte mẽ ahkre ho ri ixpa ronhÿx mẽ inhma nê ãm inhma. Nhũm ixkapêrja te ixte rat tatak pyrãk o pa tee ri Tÿrtũm kapêr o mẽ ahkre kaprÿ ho ri mẽ hkôt ixpa nhũm Tÿrtũm tee ri inhã mẽ hkÿnh kêt ã ixpumu nê inhã:

—Nà amã mẽ hkÿnh kêt jakamã na ka tee ri ixkapêr o mẽ ahkre kaprÿ. Anê.

² Rÿ kot paj Tÿrtũm xãhpumunh tÿx o mẽ kãm kapêr pimxur kwÿ jarênh o ri ixpa japêr. Rÿ Tÿrtũm mẽ kurom inhã mẽmoj to amnhÿrÿt pa omu nê

mê kãm harênh o ri ixpa japêr. Rỳ pa Tĩrtũm kot amnhĩ nhĩpêx piitã omunh par japêr. Rỳ ixte amnhĩ kaxyw hkôt ijamaxpêr tỳx kôt ý hã kên krã hprêk õ mã ixkapêr nhũm kot inhmar nê inhmar xà hkôt nhãm pikamênh japêr. Tã inhmã ixkwỳjê hkĩnh kêt kãm ã amnhĩ nhĩpêx anê nhũm Tĩrtũm tee ri ja hã ixpumu nê inhmã:

—Nà amã mẽ hkĩnh kêt jakamã te axàhpumunh tỳx kêt kumrêx pyræk. Na ka tee ri ã mẽ kãm ixkapêr jarênh anhỹr o ri apa kaprỳ. Anê.

³ Rỳ pa mẽ kêp amrakati xwỳnhjê mã ixkukrêx nhõr par japêr. Rỳ Kris ã mẽ kãm amnhĩ grõnh kôt mẽ kãm xa nhũm mẽ hã ixpĩr japêr. Tã inhmã mẽ hkĩnh kêt kãm ã amnhĩ nhĩpêx anê nhũm Tĩrtũm tee ri ja hã ixpumu nê inhmã:

—Nà ã ate mẽ kãm amnhĩ nhĩpêx anhỹr o ri apa htã amã mẽ hkĩnh kêt jakamã na ka tee ri ã mẽ kãm amnhĩ nhĩpêx anhỹr kaprỳ. Anê.

⁴ Kot puj mẽ pamã axpên kĩnh hã kot puj mẽ kritpêm mẽ piitã mẽ kãm pahprĩ ho papa.

Jao axpên kãm pagryk tokyx anhỹr kêt nê.

Nê pamã axpên to mex pix prãm.

Nê mêmoj tã axpên kamã pagryk kurê kumrêx kêt nê.

Nê mêmoj tã amnhĩ to jarkrar o ri papa hkêt nê.

Kot puj mẽ pamã axpên kĩnh hã kot puj mẽ ã amnhĩ nhĩpêx anhỹr o ri papa hkêt nê.

⁵ Nê kot puj mẽ axpên kamã paxukaprĩ ho papa hã kot puj mẽ tãm axpên nhĩpêx rãhã ho papa. Jao amnhĩ pix kukamã pajamaxpêr o ri papa hkêt nê. Nê mẽ pagryk tokyx anhỹr kêt nê. Rỳ axpên kãm pagryk tokyx anhỹr hkêt nê. Rỳ koja mêmõ tanhmã mẽ panhĩpêx kati hto pu mẽ ãm amnhĩ tã omu nê

axte kot tanhmã mẽ panhĩpêx tota mã pajamaxpêr kêt nê.

⁶ Nê kot puj mẽ pamã axpên kĩnh o papa hã kot puj mẽ tee ri mēhõ kot tanhmã amnhĩ tomnuj to hã omu nê pahkaprĩ nê. Rý tanhmã kot amnhĩ to mex to hã omu nê pahkĩnh nê.

⁷ Nê kot puj mẽ pamã axpên kĩnh o papa hã kot puj mẽ arĩ Tirtũm kot mẽ pahto mex par jatur xà mēnh xà hã arĩgro jamãr rãhã ho ri papa. Nê mẽ kot Kris ã tanhmã mẽ pahto htã pu mẽ tee ri amnhĩ kukamã tanhmã pajamaxpêr to hkêt nê. ãm mẽ kutã amnhĩ to htýx nê mẽ kãm pakuhê nê arĩ amnhĩ kaxyw Tirtũm mã pajamaxpêr týx rãhã nê.

⁸ Nê kot puj mẽ pamã axpên kĩnh o papa hãmri nê aa mẽ pahte ã amnhĩ nhĩpêx anhýrja mã panhũrer kêt nê. Nê arĩ mẽ pamã axpên kĩnh rãhã ho papa ho papa. Jar pika ja kamã mẽ pahte Tirtũm nhỹ hã mẽ kãm kapêr jarēnh o ri papa htã kot puj mẽ nhỹrmã ma õ krĩ hwýr api hãmri nê kuri axte ã kãm amnhĩ nhĩpêx anhýr kêt nê. Mo kaxyw kot puj mẽ axte ri mēhõ mã kapêr jarē? Kot puj mẽ õ krĩ hwýr api nê ra mẽ pahpiitã paxàhpumunh o axpên pyræk.

Nê na pu htem tõhã mẽ kapêr õ ho pakapêr o ri papa. Nom kot puj mẽ nhỹrmã Tirtũm nhõ krĩ hwýr api hãmri nê kuri axte nhãm ri mẽ kapêr o pakapêr kêt nê.

Nê na pu htem jar mẽ pahkwýjaja mẽ paxàhpumunh mex kôt Tirtũm kapêr jarēnh o ri papa. Tã kot puj mẽ nhỹrmã õ krĩ hwýr api hãmri nê axte ã amnhĩ nhĩpêx anhýr kêt nê. ãm mẽ pamã axpên kĩnh pixja kot puj mẽ arĩ õ krĩ kamã mẽ pamã axpên kĩnh tũm rãhã papa ho papa.

⁹ Jar mẽ pahpiitã mẽ paxàhpumunh tohtuj anhÿr o pakapěr jakamã na pu htem kormã Tĩrtũm kapěr jarėnh tohtuj anhÿr o ri papa. ¹⁰ Tã kot puj mẽ nhÿrmã õ krĩ hwÿr api nē kuri paxàhpumunh jatur xàm mẽnh pa. Jakamã nhũm jar mẽ paxàhpumunh tohtuj anhÿr xwÿnhta mẽ pahpê hapêx.

¹¹ E pa mẽ amã ja hã ejěp jarė ka mẽ inhma. Nà amnepê mã ixprĩre ri na pa pre ixtÿx ri mẽhprĩjê kot amnhĩ nhĩpêx o amnhĩ nhĩpêx nē mẽ hamaxpěr o ijamaxpěr. Nē mẽ kapěr mex kêt o ixkapěr o ri ixpa. Tã ra ixàptàr hãmri nē mẽ àptàrjê jamaxpěr o ijamaxpěr o ri ixpa. Te ra mẽ pahte kaxkwa kamã mẽ paxàhpumunh jatur xàm mẽnh parta pyràk mẽ aptàrjê jamaxpěr o ijamaxpěr o ri ixpa.

¹² Ja pyrà nē na pu htem kormã Tĩrtũm kot amnhĩ nhĩpêx ã omunh tohtuj anhÿr. Te mẽ pahte amnhĩ pumunh xà pynajre kamã pahprĩ hã amnhĩ pumunh mex kêêta pyràk. Nom kot puj mẽ nhÿrmã õ krĩ hwÿr api hãmri nē pahprĩ hã paxàhpumunh jatur xàm kumě. Te Tĩrtũm kot hprĩ hã tanhmã mẽ pakute hã mẽ pahpumunh parja pyràk.

¹³ E arĩ mẽ pahte Tĩrtũm kôt amnhĩ nhĩpêx o papa xàja na axkruněpxi. Mě pahte hkôt amnhĩ nhĩpêx o papa rãhã ho papa kaxyw. Wamta na ja: Kêr pu mẽ arĩ amnhĩ kaxyw Tĩrtũm mã pajamaxpěr mex rãhã ho ri papa. Nē hkôt ja: Kêr pu mẽ arĩ Tĩrtũm kot mẽ pahto mex par jatur xà mẽnh xà hã arĩgro jamãr rãhã ho papa. Nē hkôt ja: Kêr pu mẽ arĩ pamã axpěn kĩnh pê tanhmã axpěn to mex to rãhã ho papa. Ja na mex o kot wamta wa hakrenh. E

kêr pu mẽ ã amnhĩ nhĩpêx anhÿr rãhã ho ri papa.

14

*Tĩrtũm Karõ kot mẽ pahto mẽ paxihtÿx ã harẽnh
Wam Korît 12.7-11, 12.27-31*

¹ E kêr ka mẽ arĩ amã xxpẽn kĩnh pê xxpẽn to mex rãhã ho ri apa nẽ aa jam anhũrer nẽ ho ajamakêtkati hkêtnẽ. Nẽ amnhĩ to Tĩrtũm Karõ mãn amnhĩ to awÿ kê mẽ amã tanhmã mẽ ajamaxpêr to ka mẽ ahpÿnhã tanhmã xxpẽn to mex to ho ri xxpẽn kôt apa. Nẽ kêr ka mẽ ã ajamaxpêr anẽ nẽ ajamaxpêr o:

—Inhmã mẽ hkĩnh o ri ixpa hprãm tÿx. Nẽ Tĩrtũm Karõ kot tanhmã ixto nhũm ixte ahpÿnhã tanhmã mẽ ho ajuta hto ho ixpaja pa mããnẽn inhmã ho anhÿr prãm. Nẽ kot tanhmã ijakwa hto nhũm ixte ahpÿnhã mẽ kapêr õ ho ixkapêrja pa mããnẽn inhmã ho anhÿr hprãm. No kêt ixte Tĩrtũm nhÿ hã mẽ kãm kapêr jarẽnhja na inhmã ho anhÿr prãm tÿx kumrẽx. Anẽ.

²⁻⁴ Mẽ pakamã mẽ kapêr õ ho Tĩrtũm mã kapêr xwÿnhjaja na htem Tĩrtũm Karõ nhÿ hã ãm kumã pix mã kapêr õta o kãm kapêr nhũm tapxipix mẽ kuma. No mẽ papajaja na pu htem tee ri mar o pahkrĩ nom mar kêt nẽ. ãm kapêr xwÿnhhta pix koja mẽ pakurom amnhĩ ma. Nom koja mẽ pakapêr kãm Tĩrtũm mã amnhĩ jarẽ pu mẽ mar mex nẽ. Nhũm mẽ pakapêr kãm Tĩrtũm nhÿ hã mẽ pamã kapêr jarẽ pu mẽ pahprĩ hã kuma. Jao mẽ pamã kapêr kôt amnhĩ nhĩpêx prãm nẽ. Nẽ mẽmoj tã pahkaprĩ nẽ ri papa htã mẽ kuma nẽ amnhĩ kaxwÿnh kãm amnhĩ to paxihtÿx.

⁵ Mě apiitã mẽ ate nhãm mẽ kapěr õ ho Tĩrtũm mã amnhĩ jarẽnhja na mex. Nom mẽ ate mẽ akapěr o mẽ akwỳjê mã Tĩrtũm kapěr jarẽnh o ri mẽ apaja na mex o wamta jakre. Kot ka mẽ nhãm mẽ kapěr õ ho Tĩrtũm mã amnhĩ jarẽ nhũm mẽ akwỳjaja mẽ amar kêt jakamã ka mẽ ã akapěr anhỳrja o Kris kôt mẽ ho mẽ hamaxpěr o hihtỳx kêt nẽ. Âm kapxipix amnhĩ ma. Rỳ koja kapěr õja mar mex xwỳnhjê hõ amar japêr nẽ mẽ akapěr kãm akwỳjê mã harẽ. Hã koja ja mex nẽ. Nom kot kaj mẽ apiitã ma mẽ kapěr kãm mẽ kãm Tĩrtũm kapěr jarẽnh o ri apa nhũm mẽ piitã hprĩ hã amar mex nẽ. Nẽ amar xà hkôt Tĩrtũm kapěr kôt amnhĩ nhĩpêx mex nẽ. ⁶ Jakamã e Kris kôt ixtõ nẽ ixtõxjaja. Kot paj apu nhỹrmã ma mẽ awỳr mõ hãmri nẽ nhãm mẽ kapěr õ ho mẽ amã ixkapêr japêr ka mẽ inhmar kêt nẽ. Nom kot paj mẽ akapêr o mẽ amã ixkapêr ka mẽ apiitã aprĩ hã inhmar mex nẽ. Pa Tĩrtũm nhỹ hã mẽ amã mẽmoj jarẽ rỳ tanhmã kot amnhĩ nhĩpêx toja pa mẽ amã harẽ. Rỳ Karõ nhỹ hã mẽ amã mẽmoj jarẽnh o ã mẽ amã Tĩrtũm kapêr jarẽnh anẽ ka mẽ aprĩ hã inhmar mex nẽ. ⁷ Nom mẽ kapêr õ ho mẽ kapêr o mẽ akôt ri mẽ pa xwỳnhjaja te mẽhõ kot htỳx ri wiorãwti kakrênh xwỳnh pyræk. Koja htỳx ri hkakrênh o xa nhũm mẽ tee ri kot grer mar mã. Rỳ nhũm mẽhõ htỳx ri pifti kakôr o xa nhũm mẽ tee ri mẽmo mẽ grer mar mã.

⁸ Pôristijaja na htem amarĩ ri tanhmã amnhĩ nhĩpêx to ho pa nhũm mẽ hkrãhtũmja mẽ kãm pifti kakô nhũm mẽ kuma nẽ mẽ pijapu mã hamaxpêr kurê kumrêx nẽ hwỳr hprõt. Nom koja kawax pê hkakô rỳ htỳx ri tanhmã hkakôr to nhũm mẽ kuma

ně ãm kuma. ⁹ Ja pyrà ně kot kaj mẽ kapěr ô ho akwỳjê mã akapěr nhũm mẽ ama ně ãm mẽ ama. Ka te ãm mẽ kãm ajakwa momok pyràk o axãm o amnhĩ nhĩpêx.

¹⁰ Ně ahpỳnhã mẽ pakapěr xohtôô. Na htem ahpỳnhã mẽ kapěr o amnhĩ kwỳjê mã kapěr ně axpên mar mex ně. ¹¹ Nom koja mēhõ nhỹhỹnh pika hõ rũm ixwỳr mō ně mẽ kapěr o inhmã kapěr pa mar kêt ně. Ně amnhĩ xwar kutã ixkapěr o kãm ixkapěr nhũm ixpyrà ně inhmar kêt ně. ¹² Jakamã kot kaj mẽ amã Tĩrtũm Karõ xihtỳx xà ho amã tanhmã kãm amnhĩ nhĩpêx to ho apa hprãm hã kot kaj mẽ amnhĩ to awỳ ně kãm:

—Kwa amnhĩ kôt ijamaxpěr o axihtỳx Tĩrtũm. Pa anhỹ hã ixkapěr o ma Kris kôt ixkwỳjê ho mẽ hamaxpěr o ixihtỳx o ri mẽ hkôt ixpa. Kê mẽ akapěr ma ně Kris kôt amnhĩ xunhwỳr tỳx ně. Ně hkôt amnhĩ nhĩpêx mex o ri pa. Aně.

¹³ Ně kêr ka mẽ nhãm mẽ kapěr ô ho Tĩrtũm mã amnhĩ jarênh xwỳnhjaja amnhĩ to Tĩrtũm Karõ wỳ ně kãm:

—Ixte mẽ kapěr ô ho ixkapěr tã ixte amnhĩ mar kêt. Jakamã kwa tanhmã ixto ijamaxpěr mex to pa amnhĩ mar mex ně ixkapěr kãm ixprĩ hã Kris kôt ixkwỳjê mã ja jarê kê mẽ inhmar tỳx ně. Aně.

¹⁴ Nom kot paj nhãm mẽ kapěr ô ho Tĩrtũm mã mex ã harênh tã amnhĩ mar kêt ně. Te ixpimtir kãm ixkarõ pix kapěr pyràk. No kot paj pam amnhĩ krã hkôt ixkapěr o kãm mex ã harê hãmri ně ra amnhĩ mar mex ně. ¹⁵ Nà ja na inhmã mex jakamã kot paj nhãm mẽ kapěr ô ho Tĩrtũm mã mex ã harê ně kãm gre. Ně mãănên ijamaxpěr xà hkôt ixkapěr o mãănên kãm mex ã harê ně kãm gre. Nà ja na

inhmã mex. ¹⁶ Nom kot puj mẽ ma mẽ kot Tĩrtũm kapẽr mar xà hã ixkre hwỳr mra nẽ kamã Tĩrtũm mã mex ã harẽ. Tã pa nhãm mẽ kapẽr õ ho kãm ixkapẽr japêr. Ka mẽ ate inhmar o akrĩ xwỳnhjaja tee ri inhma. Jakamã tee ri inhma nẽ ixkõt Tĩrtũm mã akapẽr kêt nẽ. Rỳ kãm:

—Nà ãm hãmri na ã amex ã ajarẽnh anẽ Tĩrtũm.

Anhỳr o kãm akapẽr kêt nẽ. Mẽ ate inhmaare hã kot ka mẽ ã kãm akapẽr anẽ. Jakamã kot paj ri mẽ akamã mẽ kapẽr õ ho ixkapẽr kêt nẽ. ãm mẽ akapẽr pix o mẽ anom Tĩrtũm mã mex ã harẽ. ¹⁷ Kot paj mẽ kapẽr õ ho Tĩrtũm mã mex o mex ã harẽnh mex tã ka mẽ mẽmo mẽ kapẽrja aprĩ hã mar kêt jakamã inhmar pẽ Tĩrtũm kõt amnhĩ xunhwỳr tỳx kêt nẽ.

¹⁸ Na pa hte tõhã mẽ arom nhãm mẽ kapẽr õ ho Tĩrtũm mã amnhĩ jarẽ. Nom nhỹri ahte nhỹ nẽ ã kãm amnhĩ jarẽnh anẽ. ãm hãmri na pre Tĩrtũm ja kaxyw tanhmã ixto pa hte ã amnhĩ nhĩpêx anhỳr o ri ixpa.

¹⁹ Tã na pu htem Tĩrtũm mã mex o mex ã harẽnh kaxyw nẽ ma mẽ kot kãm amnhĩ jarẽnh xà hã ixkreta wỳr axpẽn wỳr mra pa mẽ pikuprõnh xwỳnhjê kapẽr o mẽ kãm ixkapẽr. Nom kot paj nhãm mẽ kapẽr õ ho mẽ kãm ixkapẽr ry rax kumrêx tã no nhũm mẽ inhmar kêt nẽ. Nom kot paj mẽ kapẽr o ãm ixkapẽr krãnre htã no nhũm mẽ inhmar mex kurê kumrêx. Ja na inhmã mex. ²⁰ Kwa mẽ ixkapẽr ma nẽ mar tỳx nẽ. Nẽ mẽhprĩrêjê jamaxpẽr o ajamaxpẽr kêt nẽ. ãm Kris kõt mẽ àptàr tũmjê jamaxpẽr o mãn kêt mẽ ajamaxpẽr o ri apa. ãm mẽmoj pixire hkõt kot kaj

mê ãm hãmri te mēhprîjê jamaxpēr pyrək o ajamaxpēr. Mēhprîjaja na htem mēmoj punuj kukamã hamaxpēr kêt nê. Na htem ãm htÿx pa. Tã kêr ka mē urək nê mēmoj punuj kukamã ajamaxpēr o ri apa hkêt nê.

²¹ Amnepêm na pre Tĩrtũm tanhmã Ijaewjê mã kapēr to. Mē kapēr o mē kãm kapēr tã no nhũm mē kuma nê ãm kuma. Jakamã nhũm tee ri ja hã mē omu nê amnhĩ tã tanhmã mē harēnh to. Tanhmã mē harēnh toja Tĩrtũm kapēr ã kagà htũm kamã na. Kot mē harēnh kot:

E kot paj ma mē hwÿr axtem pika hõ rũm pōristi hkwÿ rē kê mē ma mē hwÿr mra nê mē unê. Hãmri nê amnhĩ kapēr o mē kãm kapēr nhũm mē tee ri mē kuma no ãm hkôt mēmoj pumunh kêt nê.

Koja mē ã mē hipêx anhÿr tã nhũm mē arĩ kãm ixkapēr mar nê amnhĩ kaxyw ixkôt hamaxpēr prãm kêt nê. Anê.

Tĩrtũm kapēr ã kagà htũm kot ã mē harēnh kot anhÿr. ²² Jakamã kot kaj mē Tĩrtũm mã amnhĩ jarēnh xà hã ixkre hwÿr akuprõ nê mē kapēr õ ho Tĩrtũm mã amnhĩ jarēnh japêr. Nhũm Kris kôt amnhĩ xunhwÿr kêt xwÿnhjaja mē akôt agjê nê hkrĩ nê tee ri mē akapēr ma nê Kris kôt amnhĩ xunhwÿr kêt nê. Tanhmã kot mē amnhĩ to nê hkôt amnhĩ xunhwÿ? Mē kot akapērta maare hã. No kot ka mē akapēr o Tĩrtũm nhÿ hã mē kãm akapēr nhũm mēhprĩ hã amar mex nê. Jao tanhmã hamaxpēr to nê mē apyrà nê Kris kôt amnhĩ xunhwÿr japêr. ²³ Nom kot ka mē apiitã nhãm mē kapēr õ ho Tĩrtũm mã mex ã harē nhũm amarĩ ri mē pa xwÿnhjaja mē awÿr agjê nê mē akapēr ã mē

ama nê hã mẽ apumu. Hãmri nê tee ri hamaxpêr nê mẽ akrã pipãnh ã axpên mã mẽ ajarê. ²⁴ Nom koja mẽ awÿr agjê ka mẽ akatàt kôt mẽ amnhĩ kapêr o Tĩrtũm kapêr jarênh o akuhê nhũm mẽhprĩ hã mẽ amar mex nê. Hãmri nê amnhĩ kapêr o akapêr ma nê hamaxpêr o:

—Hêxta waa nê. Xep ixte amnhĩ tomnuj xwÿnh na pa. Nà ãm hãmri na mẽ Tĩrtũm kapêr jarê. Nà ãm hãmri na kêt ja. Anê.

²⁵ Hãmri nê mẽ amã tanhmã kot amnhĩ tomnuj to hã amnhĩ jarênh pa hãmri nê hkaga nê Jejus kôt amnhĩ xunhwÿ. Nê hkõnkrã ho htêm nê hkrĩ nê Tĩrtũm mã mex o mex ã harê. Hãmri nê mẽ amã:

—Nà ãm hãmri na hte Tĩrtũm mẽ akamã pa ho pa. Anê.

Tĩrtũm nhõrkwÿ kamã mẽ pahte tanhmã amnhĩ nhĩpêx to hã mẽ pamã karõ

Atre 2.42, 5.12-13; Eprêw 10.25

²⁶ E Jejus kôt ixkwÿjaja. Kot paj hpãnhã axtem mẽ amã mẽmoj tã karõ. Mẽ kot Tĩrtũm mã amnhĩ jarênh xà hã ixkre kamã tanhmã mẽ ate amnhĩ nhĩpêx to hã karõ ka mẽ inhma.

Nà kêt ka mẽ axpên wÿr akuprõ nê akrĩ ka mẽ atõ amã Tĩrtũm mã mex ã harênh ã mẽ grer o agrer prãm hãmri nê mãmri kãm ho gre. Hãmri nê agrer pa kê apãnhã mẽhõ kànhmã xa nê Tĩrtũm kapêr kwÿ ho mẽ ajahkre. Nê ho anhÿr pa nhũm hpãnhã mẽhõ kànhmã xa nê Tĩrtũm kot tanhmã ho mex to hã mẽ amã amnhĩ jarê. Nê amnhĩ jarênh pa hãmri nhũm mẽhõ nhãm mẽ kapêr õ ho mẽ amã ujarênh japêr. Hãmri nê ujarênh pa kê mẽhõ hpãnhã mẽ akapêr o hprĩ hã mẽ amã kapêrta jarê.

E kêr ka mẽ axpẽn wỳr akuprõ nẽ Kris kôt axpẽn to axihtỳx kaxyw ã axpẽn pãnhã amnhĩ nhĩpêx anẽ.

²⁷ Nẽ ka mẽ atõ amã nhãm mẽ kapêr õ ho mẽ kãm akapêr prãm japêr. Nom kêr ka mẽ axohtõ nẽ ã mẽ kãm amnhĩ nhĩpêx anhỳr kêt nẽ. ãm mẽ atõ wa axkrutre rỳ axkrunêpxire nẽ mẽ kapêr õ ho mẽ kãm akapêr. Hãmri nẽ axpẽn pãnhã akapêr pa kê mễhõ kot hprĩ hã mẽ kapêr õta mar japêr nẽ mẽ apãnhã xa nẽ mẽ akapêr o mẽ kãm harẽ kê mễhprĩ hã mar mex nẽ. ²⁸ Nom koja ja kaxyw mễhõ amrakati japêr ka mẽ kapêr õ ho akapêr kêt nẽ. ãm kapxipix nhỹri ahte Tĩrtũm mã akapêr.

²⁹ Nẽ kê Tĩrtũm nhỹ hã kapêr jarênh xwỳnhjê hõ wa axkrut rỳ axkrunêpxi nẽ mẽ ajahkre ka mẽ aprĩ hã mar o akrĩ. Hãmri nẽ mar pa nẽ tanhmã mẽ harênh to. ãm hãmri Tĩrtũm nhỹ hã kapêr ã mẽ harẽ rỳ ho hêx ã mẽ harẽ.

³⁰ Nẽ koja mễhõ Tĩrtũm nhỹ hã mẽmoj jarênh o xa. Rôm nhũm Tĩrtũm mẽ kaxyw mẽ atõ mã ajamaxpêr kwỳ gõ. Ka kapêr o ãm xwỳnhta mã kànhmã anhĩhkra pẽ kê apumu nẽ anhĩkrê. Hãmri ka hpãnhã xa nẽ mẽ kãm tanhmã ajamaxpêr tota jarẽ. ³¹ Nom kêr ka mẽ anhĩpê mẽ kãm akapêr hkêt nẽ. ãm axpẽn pãnhã Tĩrtũm kapêr o axpẽn jahkre nẽ ho axpẽn jamaxpêr o axihtỳx. Ja mex. ³²⁻³⁴ Nom kêr ka mẽ axpẽn wỳr akuprõ nẽ apiitã anhĩpê atỳx ri akapêr kêt nẽ. Ja na Tĩrtũm kệp hprãm nõkati. Mẽ ate axpẽn pãnhã axpẽn mã akapêrja na kãm hprãm. Jakamã kê mẽ kot Tĩrtũm nhỹ hã mẽ kapêr jarênh o pa xwỳnhjaja taxy axpẽn jahkre hã axpẽn jamã.

Nhũm mēhõ kumrēx kapēr pa hāmri ka hpānhã mē kām akapēr.

Nē kê mēnijaja amarĩ mē ahkreja mar o hkrĩ. Ijaew kot amnhĩ nhĩpêx xà hkôt. Jakamã kwa mē anijaja. Kêr ka mē amarĩ akryk mē mar o akrĩ nē axpēn mã akapēr o akrĩ hkêt nē. ³⁵ No kot kaj mē tee ri mēmoj ma nē mar mex kêt japēr tā hã axpēn kukjêr kêt nē. Ām akryk arĩ mar o akrĩ. Hāmri nē akupỹm anhõrkwỹ hwỳr tē nē rĩ kormã hã amjên kukja. Nom kot ka mē apikuprõnh xà hã ixkre kamã axpēn mã akapēr o akrĩ nhũm mē amjênjaja tee ri ja hã mē apumu nē hpijaàm nē.

³⁶ E na pa ã Tĩrtũm mã amnhĩ jarēnh xà hã ixkre kamã tanhmã mē pahte amnhĩ nhĩpêx to hã mē amã karõ anē. Tã te mē apê ja mex kêt pyræk. Kwa mon ka wem ja ma nhũm mē apê omnuj nē? Xà mē ate Tĩrtũm kapēr mar mex o ijakrenh kôt na ka mē ã ajamxpēr anē? Xà na pre Tĩrtũm mē akumrēx mã kapēr? Hã na ka mē ã ajamxpēr anē? Rỳ xà mē kapxipix mã na pre kapēr? Hã na ka mē ixkapēr ma nhũm mē apê omnuj nē? Nà ixkumrēx na pa pre mē awỳr inhmõr nē mē amã Tĩrtũm kapēr jarēnh kēnã kot ka kêt mē axtem nē ã ajamxpēr anē. ³⁷ Kot kaj mē atõ ã ajamxpēr anhỹr japēr nē ajamxpēr o:

—Nà na pre Tĩrtũm tanhmã inhmã kapēr to pa ô ri mē kām ixujarēnh mex o ri ixpa.

Anhỹr o ajamxpēr. Rỳ ajamxpēr o:

—Nà na pre Tĩrtũm Karõ mē kaxyw tanhmã ixto pa ỹ hã tanhmã mē ho mex to ho ri ixpa.

Anhỹr o ajamxpēr. Kot kaj mē ã ajamxpēr anē hāmri nē mãñnēn pa ã ixte amnhĩ nhĩpêx anhỹr ã

ixpumunh mex kurê kumrêx. Amnhĩ pyrà nê ixte Tĩrtũm nhĩ hã mẽ kãm ixkapêr xwỳnh ã ixpumunh nê hã ijarênh kurê kumrêx. ³⁸ Nom koja ja hã ijarênh kêt ka mẽ ja hã omu hãmri nê tanhmã kot mẽ amã kapêr toja ma nê ãm ama.

³⁹ E Kris kôt ixtõ nê ixtõxjaja. Kêr ka mẽ amnhĩ to Tĩrtũm Karõ wỳ kê ma mẽ ate mẽ kãm Tĩrtũm kapêr jarênh o ri apa kaxyw mẽ ato mẽ axihtỳx.

Nê koja mễhõ kãm nhãm mẽ kapêr õ ho kapêr prãm ka mẽ ja nê kãm akapêr kêt nê. Kwār mãmri ã amnhĩ nhĩpêx anê. ⁴⁰ Nom kêr ka mẽ ate Tĩrtũm mã amnhĩ jarênh xà hã ixkre kamã axpên pãnhã axpên mã akapêr nom anhĩpê kãm akapêr hkêt nê.

15

Kris akupỳm htĩr kumrêx ã harênh

Atre 2.23-36, 10.39-41; Wam Korît 6.14

¹ E Kris kôt ixkwỳjaja. Kot paj axte mẽ amã Jejus kot mẽ panê tanhmã amnhĩ nhĩpêx to hã harê ka mẽ inhma. Na pa pre ra mẽ amã ja jarê ka mẽ ama nê hkôt amnhĩ xunhwỳ. Nê hkôt amnhĩ nhĩpêx mex o ri apa. ² Na pa pre mẽ amã harê ka mẽ amnhĩ kaxyw kãm ajamaxpêr tỳx nê nhũm Tĩrtũm mẽ ato hkra. Tã ka htem arĩ kapêr kôt amnhĩ nhĩpêx mex o ri apa. Koja mễhõ kot Tĩrtũm kapêr mar tã amnhĩ kaxyw hkôt hamaxpêr kêt nê nhũm Tĩrtũm tee ri amnhĩ tã omu nê ho hkra hkêt nê.

³ Na pa pre amnhĩ krã hkôt mẽ amã tanhmã Kris jarênh to hkêt nê. Ixte kapêr mar xà hkôt na pa hte amnhĩ xô ri mẽ amã tanhmã harênh to ho ri ixpa. Jejus jarênhja na mex o kot mẽ ujarênh piitã hakrenh par kumrêx. Tã tãm kot paj mẽ amã harê. Na pre Krisja mẽ pahte amnhĩ tomnuj pãnhã

amnhîrer kaxyw mẽ panê ty. Tîrtûm kapêr ã kagà htûm kot hkukamã harênh xà hkôt. ⁴ Hãmri nhûm mẽ kên kre kamã haxà nhûm kamã nôr o apkati. Nê axte hã apkati. Hãmri nhûm Tîrtûm akupÿm ho htîr. Kapêr ã kagà htûm kot hkukamã harênh xà hkôt. ⁵ Tã nhûm Simãw Pêtre kumrêx akupÿm htîr ã omu nhûm hpãnhã Jejus nhÿ hã mẽ ahkre ho mẽ pa xwÿnh maati jaja haxwÿja omu. ⁶ Hãmri nhûm mẽ kot hkôt mẽ pa xwÿnh pê 500 jakrenh xwÿnh piitã anhîpê haxwÿja akupÿm htîr kãm omu. Na pre ra mẽ hkwyjaja ty nhûm mẽ hkwyjaja arî htîr nê pa. ⁷ Jakamã nhûm prem ra akupÿm htîr kãm omu. Hãmri nhûm hpãnhã Xiakreja omu. Nhûm hpãnhã ÿ hã mẽ ahkre o mẽ pa xwÿnh piitã omu. Akupÿm htîr kãm omu. ⁸ Tã pa na pa pre ijaxwÿja amnhî to hapu nê akupÿm htîr kãm omu. Te ixpê mẽ hkra kot hapu pyrã nê amnhî to hapu nê omu. Na pre kaxkwa kamã inhmã kapêr o xa pa ixprî hã omu. ⁹ No mẽ kot ixpyrà nê Kris nhÿ hã mẽ ahkre ho mẽ pa xwÿnh maati hkwyjaja na mẽ mex o kot ijakrenh. Na pa pre hte mẽ hkĩnhã amnhî tomnuj tÿx nê. Jao Kris pê hkrajê homnuj tÿx o ri ixpa. Tã hkôt amnhî xãm hãmri nê tee ri ã amnhî nhîpêx anhÿr ã amnhî pumu nê amnhî kamã ixpijaàm tÿx nê. Jakamã na pa hte Kris nhÿ hã kapêr jarênh o ixpa hã amnhî pumu nê ixte hkôt amnhî xãm kêt ri tanhmã ixte amnhî nhîpêx toja mã ijamaxpêr nê ixpijaàm nê. ¹⁰ Na pa pre amnhî tomnuj tÿx o ixpa htã nhûm Tîrtûm arî kãm ijpê nê. Nê ixkamã ukaprí nê. Pa pre hkôt amnhî xãm nhûm ixto hkra pa ra kãm tanhmã amnhî nhîpêx to mex rãhã ho ixpa. Jakamã na hte tee ri amnhî tã ixpumu nê tanhmã hamaxpêr to hkêt nê. Rÿ hamaxpêr o:

—Hêxta waa nê. Inhmã Pawre japê nê ixte ho mex tã nhũm ixkôt amnhĩ nhĩpêx kêt kumrêx.

Anhÿr o tee ri hamaxpêr kêt nê. Na pa hte kãm tanhmã amnhĩ nhĩpêx to ho ixpa rũnh o ÿ hã mē kapêr o pa xwÿnh kwÿjê jakre ho ixpa. Nom amnhĩ krã hkôt mē ahkre hkêt nê. Ja kaxyw na pre Tĩrtũmja ixto ixihÿx pa ÿ hã kãm tanhmã amnhĩ nhĩpêx to ho ri ixpa nhũm ja hã ixpumu nê hkĩnh nê.

¹¹ Nê Jejus jarênhja ãm pixii. Axtem hõ hkêt. Nê ÿ hã mē ahkre ho mē pa xwÿnhjê kapêrja nê pa ixte mē amã harênhja kot axpên pyrãk. Harênh tipxi. Kris kot mē pahte amnhĩ tomnuj mÿrapê mē panê hÿk nhũm Tĩrtũm kot akupÿm ho htĩr ã wa harênhja na pa hte pix jarênh o ri mē akôt ixpa. Ka prem inhma nê amnhĩ kaxyw hkôt ajamaxpêr tÿx nê.

Tĩrtũm kot akupÿm mē pahto mē pahtĩr ã harênh Rukre 20.37

¹² Nê kwa ra ixte mē amã Kris hÿk nê akupÿm htĩr ã harênh tã ka xep mē akwÿjaja axtem nê mē hÿk nê akupÿm mē htĩr kêt ã mē hkamnhĩx o ri apa. ¹³ Kwa mē ajamaxpêrja mex kêt. Kêp apu ãm hãmri mē ate ã mē harênh anhÿr ronhÿx pre Kris haxwÿja akupÿm htĩr kêt nê. Nhÿx pre hÿk o ty.

¹⁴ Nê kêp apu Kris akupÿm htĩr kêt ronhÿx pa mē ãm mē amã kapêr jarênh o ixpa kaprÿ. Ka mē ajaxwÿja amnhĩ kaxyw hkôt ajamaxpêr kaprÿ.

¹⁵ Nê kêp ãm akupÿm mē htĩr kêt ronhÿx pa mē ixte mē amã Tĩrtũm kapêr jarênh o ri ixpa xwÿnhjaja mē amã ho ixêx o ri ixpa. Na pa htem mē amã Tĩrtũm ra kot akupÿm Jejus

o htîr ã harênh o mẽ akôt ixpa. Tã kêp apu akupÿm mẽ htîr kêt ronhÿx pa mẽ ãm mẽ amã harênh o ixêx.

16 Nê kêp apu akupÿm mẽ htîr kêt ronhÿx pre Kris haxwÿja akupÿm htîr kêt nê. Nhÿx pre ãm amarĩ tyn hapêx.

17 Nê Kris amarĩ htyk nê hapêx ronhÿx kot pu mẽ ri amnhĩ kaxyw hkôt pajamaxpêr nê hkôt amnhĩ xunhwÿr kaprÿ.

Nê Kris amarĩ htyk nê hapêx ronhÿx pre Tĩrtũm Jejus kukwak ri mẽ panê mẽ pahte amnhĩ tomnuj o hapêx kêt nê. Nhÿx pu mẽ pahpiitã nhÿrmã ma kuwy hwÿr pajapêx pa.

18 Nê kêp apu Kris htyk nê hapêx ronhÿx ra mẽ kot amnhĩ kaxyw hkôt hamaxpêr tã ra htyk xwÿnhjaja ma mẽ kot amnhĩ tomnuj mÿrapê kuwyta wÿr hapêx.

19 Nê kêp apu Kris htyk kumrêx nê hapêx ronhÿx pu mẽ kormã pahtyk kêt xwÿnhjaja tee ri amnhĩ wÿr kamã pajamak o ri papa kaprÿ. Nê pahpê hkra hã amnhĩ jarênh kaprÿ. Jao pahkaprĩ htÿx o mẽmoj piitã hakrenh par kumrêx nê ri papa.

Kris kumrêx akupÿm htîr ã harênh

Atre 26.23; Sikũn Korîť 4.14; Piripos 3.10-11; Wam Tesarõn 4.15-18; Apokarip 20.1-15

20 Nã mẽ htyk nê nhÿrmã akupÿm mẽ htîr kêt ã mẽ harênhja kot anhÿr kêt. Ra Tĩrtũm kot akupÿm Kris o htîr jakamã koja mããnên hkra htyk xwÿnhjaja nhũm mẽ piitã Jejus pyrà nê nhÿrmã akupÿm mẽ ho htîr pa. Jakamã na pu htem Kris

akupÿm htĩrja mã pajamaxpēr nē amnhĩ kukamã pajamaxpēr o:

—Nà ra Tĩrtũm kot akupÿm Jejus o htĩr jakamã koja uràk nē nhÿrmã akupÿm mẽ pahte hkõt amnhĩ xunhwÿr xwÿnh piitã mẽ pahto mẽ pahtĩr. Nà koja ã mẽ panhĩpêx anē. Ja kaxyw àhpumunh tÿx kumrêx xwÿnh kênã. Anē.

²¹ Nē amnepêm na pre Tĩrtũm my kot waja nhĩpêx. Hãmri nhũm kot tanhmã amnhĩ tomnuj to ho ra mẽ htykja o hkrax. Tã nhũm wamta kõt my hõta wamta rom amnhĩ to mex o mẽ htyk tã akupÿm mẽ ho htĩr o hkrax. ²²⁻²³ Tã mẽ pahpê wam my pê Atãw kanrêhã tàmnhwÿ jakamã kot puj mẽ uràk nē nhÿrmã ty. No ãm mãânên mẽ pahpê Kris kraa. Kris kumrêx na pre akupÿm htĩr. Tã koja nhÿrmã akupÿn mẽ pahwÿr wrÿ hãmri nhũm Tĩrtũmja kot hipêx pyrã nē akupÿm mẽ pahto mẽ pahtĩr. Mẽ pahte hkõt amnhĩ xunhwÿr ã mẽ pahpumunh kõt akupÿm mẽ pahto mẽ pahtĩr pa. No ãm kormã.

*Kris nhÿrmã kot mẽ htyk o hapêx ã harênh
Juãw 11.25; Rõmãn 6.23; Wam Korīt 15.54; Sikũn
Ximotre 1.10; Eprêw 2.14; Apokarip 20.14*

²⁴⁻²⁸ Nē koja Kris arĩ mẽ ho amnhĩptàr rãhã nhũm Tĩrtũm mẽ kot kutã amnhĩ xunhwÿr xwÿnhjê pê mẽ hihtÿx xà ho hapêx pa. Kapêr ã kagã htũm kot ja jarênh kot:

Koja nhÿrmã Tĩrtũm Kris kot kãm mẽ ho amnhĩptàr kaxyw ãm. Anē.

Jakamã Jejus tapxipix koja mẽ ho amnhĩptàr o pa. Koja Tĩrtũm pix mẽ ho amnhĩptàr kêt nē. Nom koja

pahi hkwỳjê hõ axte nhãm mẽ ho amnhĩptàr kêt kumrẽx.

Tã mẽ kot mẽkarõmnuti hkõt kãm tanhmã amnhĩ to ho mẽ pa xwỳnhjaja koja Tĩrtũm ma amnhĩ nê kuwy hwỳr mẽ rẽnh pa. Nê mẽhtykja o hapêx nhũm mēhõ axte htyk kêt kumrẽx. Jakamã koja Jejus Kris mẽmoj punuj piitã ho hapêx nê Mēpahpãm Tĩrtũm nhĩhkram akupỹm mẽmoj piitã haxàr pa. Tĩrtũm jamaxpēr xà hkõt ã mẽmoj to anhỳr par anē hãmri nē ìhkram mẽmoj jaxàr pa. Nē mãânēn tãm kãm amnhĩ gõ. Jakamã nhũm Tĩrtũm tapxipix mẽmoj piitã ho amnhĩptàr pa.

Mẽ htyk xwỳnhjê jarēnh

²⁹ Nê na hte mẽ pahkwỳjaja kormã kēp Tĩrtũm kra hkêt tã Jejus kõt mẽ kot amnhĩ xunhwỳr nê mẽ htyk xwỳnhjê mã hamaxpēr o pa. Hãmri nê mẽ kãm nhỹrmã axte mẽ omunh prãm xàj mẽ uràk nê Jejus kõt amnhĩ xunhwỳ nhũm mẽ hkrã kumrã. Tã akupỹm mẽ htĩr kêt ronhỹx mẽ ãm ã pajamaxpēr anhỳr kaprỳ. ³⁰ Nê paa. Na pa hte ma mẽ kãm Tĩrtũm kapēr jarēnh o ri mẽ hkõt ixpa. Nhũm mẽ hkwỳjaja ja hã inhma nê ixkamã gryk nê ixtã amỹnê pa mẽ mỳrapê ixpunuj nē ri ixpa. No ãm amnhĩ to htỳx nē arĩ ri mẽ kãm Kris kapēr jarēnh o ri mẽ hkõt ixpa. Tã kēp ãm nhỹrmã akupỹm ixtĩr mã kêt ronhỹx pa tee ri ã amnhĩ nhĩpêx anhỳr o ri ixpa kaprỳ. ³¹ Na htem apkati mẽ ixtã tanhmã àmnēnh to ho ri pa. ãm hãmri na pa mẽ amã ã mẽ harēnh anē. Nom na pa hte tee ri amnhĩ kukamã ijamaxpēr o ri ixkaprĩ nē ixpa hkêt nē. Mẽ kot ixpĩr mã tã pa hte mẽ ate Pahihti Jejus Kris kõt amnhĩ nhĩpêx mex ã mẽ apumunh kõt ixkĩnh nē ri ixpa.

Nhũm te ixkamã mẽmoj kêt pyræk pa hte ri ixpa.
³² Na pa hte jar Epes kamã mẽ oprê xwỳnhjê kutã amnhĩ to htỳx pê mẽ kãm Jejus kapêr jarênh o ri mẽ hkôt ixpa nhũm mẽ kãm mar prãm kêt jakamã hã ixtomnuj tỳx nê. No nhỹrmã ixtyk nê akupỹm ixtĩr mã kêt ronhỹx pa mẽ kêp Kris kwỳ hkêt xwỳnhjê jamaxpêr o ijamaxpêr nê mẽ uræk nê ijamaxpêr o: Ixte ixtyk ã arĩgro pumunh kêt jakamã kot paj mãmri mẽmoj piitã hkur o ri ixpa.

Nê mãmri mẽmoj piitã ho ixkõm o ri ixpa.

Nê mãmri mẽmoj piitã ri tanhmã ho ho ri ixpa.

Ixtyk nê axte ixte ã amnhĩ nhĩpêx anhỹr o ixpare kaxyw ã.

Anhỹr o nhỹx pa ijamaxpêr o ixpa. Kêp ãm Tĩrtũm kot akupỹm mẽ pahto mẽ pahĩr mã kêt ronhỹx pu mẽ ã mẽ kêp Kris kwỳ hkêt xwỳnhjê jamaxpêr anhỹrja kôt pajamaxpêr pix o ri papa. No ãm ja kot anhỹr kêt.

³³ Na htem mẽmoj jarênh o:

—Mê kot htỳx ri amnhĩ tomnuj xwỳnhjê hkôt ri mẽ pa xwỳnhjaja koja mẽ gaa nê mẽ kot amnhĩ nhĩpêx kôt amnhĩ nhĩpêx o ri pa. Anê.

Ãm hãmri na ã mẽ harênh anhỹrja. Jakamã kwa mẽ okora. Kêr ka mẽ ã amnhĩ nê mẽ kot amnhĩ nhĩpêx anhỹr o mẽ pa xwỳnhjê pumunh mex o ri apa. ³⁴ Kwa mẽ tokyx mẽ ate tanhmã amnhĩ tomnuj to hã amnhĩ pumu nê axte ã amnhĩ nhĩpêx anhỹr kêt nê. Nê mẽ ate Tĩrtũm kot akupỹm mẽ ho htĩr kêt ã harênh xwỳnhjaja. Te mẽ ate Tĩrtũm kot amnhĩ nhĩpêx ã omunh kêt pyræk. Tã mẽ ate tokyx ja hã amnhĩ pumunh nê amnhĩ kamã apijaàm kaxyw na pa ã mẽ amã ixkapêr anê.

Mē panhī nyw jarēnh
Rukre 20.34-36; Rōmān 8.10-11; Sikūn Korīt 5.1;
Piripos 3.20-21

³⁵ Nē mǎn ka mē atō akupỹm mē htīr ā mē harēnh ma nē tee ri mē hkukamā ajamaxpēr nē hǎ ri tanhmā axpēn kukjēr to nē axpēn mā:

—Kwa tanhmā koja we Tīrtūm akupỹm hkra htyk xwỹnhjē ho htīr to? Ra mē htyk nē mē ĩ katōk nē hapēx par mā kēnā. Tanhmā kot wem amnhī to nē akupỹm htīr? Nē tanhmā koja we mē ĩ nywja kute wehe? Anē.

³⁶ Nà na ka mē atỳx ri ā ajamaxpēr anē nē tee ri mē hkukamā ajamaxpēr. E kot paj ixprī hǎ ja hǎ ejēp jarē ka mē inhma. Nà na htem mēmo y hkre. Te mē kot mē htyk jaxàr pyràk o hipēx nē hkre nhūm hikwỹ nē gaa nē higrōt hapōj. Nom te kēp mēmo yta pyràk kēt. ³⁷ Ām hy pix na htem hkre. No higrōt kre hkēt nē. Rỳ tanhmān pàr nywja kre hkēt nē. Ām hy pix na htem hkre. Tā nhūm higrōt hapōj nē hprēk nē gaa nē ô. ³⁸ Tīrtūm na hte hamaxpēr xà hkôt tanhmā ho nhūm higrōt hapōj nē hprēk nē ô. Tā ja pyrà nē kot puj mē Tīrtūm jamaxpēr xà hkôt pahtyk tā koja akupỹm mē pahto mē pahtīr nē mē pamā mē panhī nyw gō.

³⁹ Nē mēmo hy piitā te kot axpēn pyràk kēt. Ahpỹnhā na. Ja pyrà nē ahpỹnhā ri mēmoj piitā ĩ. Na axtem mē panhī nē axtem mry nhī nē axtem àk nhī nē axtem tep nhī. Mēmoj piitā ahpỹnhā ri ĩ.

⁴⁰⁻⁴¹ Nē kaxkwa kamā haxwỳja mēmoj piitā ahpỹnhā no ām muxre. Myytija mex. Nē mytwrỳreja axte mā no ām haxwỳja mex. Nē kanhēti haxwỳja mex. Haxwỳja axte mā. Kamā

hkwỳ hpòk kryre nē kamā hkwỳ hpòk rŭnhti no ām piitā mex.

Nē jar pika ja kamā haxwỳja mēmoj piitā mex. No ām te kot kaxkwa kamā mēmoj jarir xwỳnhja mex pyrāk kêt. Axtem na raa.

⁴² Tā koja mē panhī nywja haxwỳja axte mā. Te kot panhī htŭm pyrāk kêt. Na htem ty nhŭm mē ma mē o mra nē mē hagiê. Nhŭm mē hikwỳ nē gaa nē ĩ rerek nē hapêx. Tā koja Tĩrtŭm akupỹm tanhmā mē pahto mē pahtĩr to pu mē hpānhā pamex kumrêx. Hāmri nē axte mā mē panhī nyw mex o mex jakamā koja axte htyk nē ĩ rerek kêt nē.

⁴³ Na htem ty nhŭm mē hagiê nhŭm htyk xwỳnhja tanhmā amnhī to hkêt nē amari hikwỳ. Omnuj nē ĩ nhenhek nē hikwỳ. Tā koja Tĩrtŭm akupỹm mē ho mē htĩr nē mē kām mē ĩ nyw gō nhŭm mē hpānhā mex kumrêx nē hihtỳx nē Tĩrtŭm nhō krĩ kamā pa ho pa.

⁴⁴ Mē htyk nhŭm mē kot mē hagiênh xwỳnhjaja na htem arĩ ĩ htŭm ā hikwỳ. Ām jar pika ja pix kām ri mē papa kaxyw na mē panhī htŭmja. No mē panhī nywja axtem Tĩrtŭm nhō krĩ kamā ri mē papa kaxyw jakamā koja mē panhī nywja axte mā. Tĩrtŭm Karō koja mē pamā kugō.

Mē panhī nyw te kot Kris nhĩ pyrāk ā harênh

Rukre 20.34-36

⁴⁵⁻⁴⁶ Nē Tĩrtŭm kapêr ā kagà htŭm kot Atāw jarênh kot:

Na pre Tĩrtŭm my kot wa Atāwja nhĩpêx. Jakamā Atāw kêp pika nhō xwỳnh na pre. Anê.

Ā Atāw jarênh kot anhỹr. Ja pyrà nē na pu htem pakatorxà nhōhy rŭm pajapôj nē Atāw pyrà nē

pahpê pika nhõ xwỳnh. Tã nhũm Atãwja pa nẽ gaa nẽ hpigêt nẽ ty. Jakamã kot puj mẽ uràk nẽ papa nẽ gaa nẽ ty. Nom nhũm Krisja Atãw kurom kệp akupỹm mẽ ho mẽ htĩr xwỳnh jakamã kot puj mẽ pahpê hkwỳjaja Atãw pyrà nẽ nhỹrmã mẽ pahtyk tã nhũm Kris akupỹm mẽ pahto mẽ pahtĩr. Hãmri nhũm Tĩrtũm Karõ mẽ pamã mẽ panhĩ nyw gõ pu mẽ axte pahtyk kêt nẽ. Pãnhã axte mã mẽ pahpê kaxkwa nhõ xwỳnh.

⁴⁷ Nẽ Atãw na pre Tĩrtũm pika ho hipêx nẽ ho htĩr nhũm ri pa. Nom Kris na pre Atãw rom kaxkwa rũm mẽ pahwỳr wrỳ. ⁴⁸ Tã mẽ pahpê pika nhõ xwỳnhjaja te mẽ pahpê Tĩrtũm kot wam my nhĩpêx xwỳnhhta pyràk. No mẽ pahte kaxkwa hwỳr ma papa mã xwỳnhjaja te mẽ pahte kaxkwa rũm my kot mẽ pahwỳr wrỳk xwỳnh Krista pyràk. ⁴⁹ Tã kormã mẽ pahpê pika nhõ xwỳnh jakamã te mẽ pahpê my pika ho hipêx xwỳnhhta nhĩ pyràk. Nom kot puj mẽ nhỹrmã ty hãmri nẽ hpãnhã te pahpê kaxkwa rũm my kot mẽ pahwỳr wrỳk xwỳnhhta nhĩ pyràk.

Axte mẽ pahtyk kêt kumrêx ã mẽ pajarênh

Juãw 11.25; Sikũn Korīt 5.4; Wam Tesarõn 4.13-

18

⁵⁰ Nẽ kot puj mẽ panhĩ htũm rãhã Tĩrtũm nhõ krĩ hwỳr paxàpir kêt nẽ. Panhĩ htũm na hte ty nẽ rerek nẽ hapêx. Jakamã koja Tĩrtũm Karõ mẽ pamã mẽ panhĩ nyw gõ pu mẽ rĩ kormã ma õ krĩ hwỳr pajapêx pa nẽ kamã papa ho papa.

⁵¹⁻⁵² E mẽ inhma. Na pre kormã Tĩrtũm mẽ amã mẽmoj to amnhĩrĩt kêt tã ra inhmã ho amnhĩrĩt. Jakamã kot paj ỹ hã mẽ amã harẽ ka mẽ inhma.

Nà kot puj mẽ pahpiitã mẽ pahtyk kêt nê. Koja nhÿrmã Tirtũm kapêr o mẽ wrÿk xwÿnhjê hõja mẽ pamã pifti kakô. Mẽ pajaêr pê hkakô. Hãmri nhũm Tirtũm kra ra mẽ htyk nê mẽ hikwÿ xwÿnhjaja akupÿm ï nyw o htÿr kurê kumrêx. Nê kormã mẽ pahtyk kêt xwÿnhjaja kot pu mẽ mẽ pahtyk kêt ri mẽ urak nê panhÿ nyw kurê kumrêx. Hãmri pu mẽ pahpiitã pahtÿr o pahtÿr tũm nê papa. ⁵³ Koja Tirtũm mẽ panhÿpêx o te mẽ pahte paxê htũm o papinhÿpanh nê hpãnhã paxê nyw jagjênh pyrak. Jao mẽ panhÿ htũm o hapêx nê hpãnhã mẽ pamã mẽ panhÿ nyw gõ pu mẽ axte pahtyk kêt kumrêx nê ri papa ho papa. ⁵⁴ Tirtũm kapêr ã kagà htũm kot ja jarênh kot:

Na ra Tirtũmja mẽhtyk ho hapêx pa. Anê.

Te ra kot ho hapêx par pyrak o ã harênh kot anhÿr. No ãm kormã. Jakamã kot puj mẽ nhÿrmã panhÿ nyw nê ri papa nê mẽ pahtõ axte pahtyk kêt kumrêx. ⁵⁵ Mẽ pahtykja te mẽ kot makre par nhũm axte kot mẽ hkamnhwÿr kêtja pyrak. Urà nê koja Tirtũm akupÿm mẽ pahto mẽ pahtÿr pu mẽ axte pahtyk kêt nê. Nê axte ri pamã ma hkêt nê papa. Nê axte paxà hkêt nê. ⁵⁶ Tirtũm kapêr ã kagà htũmja ã mẽ pakukamã mẽ pajarênh kot anhÿr. Mẽ pahte amnhÿ tomnuj xwÿnh jakamã kot puj mẽ nhÿrmã ty. ⁵⁷ Nom nhũm Tirtũm àhpumunh tÿx o àhpumunh tÿx jakamã na hte Pahihti Jejus Kris kukwak ri mẽ pahte hkôt amnhÿ xunhwÿr xwÿnhjê nê mẽ pahte amnhÿ tomnuj rênh pa. Pu mẽ nhÿrmã mẽ pahtyk tã nhũm akupÿm mẽ pahto pahtÿr.

Mẽ pahte Jejus mã tanhmã amnhÿ nhÿpêx mex to

*hã mẽ pamã karõ**Karatas 6.9; Korosẽ 1.10*

⁵⁸ Jakamã e kwa Jejus kôt ixkwỳjaja. Kêr ka mẽ arĩ Pahihti Jejus kôt mãn amnhĩ xunhwỳr tỳx rãhã ho ri apa. Nẽ kapêr kôt pix mã ri amnhĩ nhĩpêx rãhã nẽ kãm tanhmã amnhĩ nhĩpêx mex to ho ri apa. Kot kaj mẽ ã amnhĩ nhĩpêx anẽ hãmri nẽ kãm tanhmã amnhĩ nhĩpêx to kaprỳ ho ri apa hkêt nẽ. ãm hãmri kãm mẽmoj to anhỳr mex rãhã ho ri apa.

16*Mẽ kêp amrakati xwỳnhjê jarênh**Atre 11.27-30; Rõmãn 15.25-27; Sikũn Korît 8.1-24, 9.1-5; Wam Ximotre 6.18*

¹ Nẽ na pa pre krĩ pê Karatas kamã tanhmã Jerujarẽ kamã Kris kwỳjê jarênh to. Ijaew kwỳ kot mẽ pahpyrà nẽ Jejus kôt amnhĩ xunhwỳr ã mẽ harẽ nẽ mẽ kêp amrakati hã mẽ harẽ hãmri nẽ mẽ kãm:

—E. Kwa kêr ka mẽ kãm mẽ akàxpore hkwỳ ho akuprõ nẽ ma mẽ hwỳr amẽ.

Anhỳr o mẽ kãm ixkapêr. Jakamã kwa kêr ka mẽ urak nẽ mẽ kaxyw mẽ kãm kàxpore hkwỳ ho akuprõ. ² Mẽ panhõ arĩgromnu pê sap ã hkwỳ ho akuprõ. Kot kaj mẽ akàxpore rax japêr nẽ mẽ kaxyw hkwỳ ho rax nẽ axi. Nom kot kaj akàxpore grire japêr nẽ mẽ kaxyw mẽ kãm ho grire nẽ agõ. Kêr pa mẽmo arĩgro hã ma mẽ awỳr mõ ka mẽ ra mẽ kaxyw ho apikuprõnh rax nẽ.

³ Nẽ ma mẽ kot mẽ kãm ho mõi mã xwỳnhjaja ka mẽ ixkutêp mẽ akwỳjê rê. Kêr pa pøj nẽ mẽ omu hãmri nẽ mẽ kaxyw kagà nhĩpêx nẽ kamã mẽ harẽ. Nẽ mẽ kãm kugõ nhũm mẽ ma Jerujarẽ hwỳr

kàxpore mẽ ro hã amnhĩ kôt o mō mẽ mẽ kãm kugõ. Mẽ kot kamã harēnh mẽ mar hãmri mẽ mẽ kamjaja mẽ ate mẽ kaxyw mẽ rēnh ã mẽ ajarēnh ma. ⁴ Rỳ kot ka mẽ amã mẽ hkôt inhmēnh prãm mẽ mãmri mẽ hkôt inhmē pa ma mẽ hkôt mō.

*Pawre kot amnhĩ kukamã amnhĩ jarēnh
Atre 19.21-22*

⁵ Nom kot paj tokyx mẽ awỳr inhmõr kêt nē. Kot paj ja rùm ixkato nē hpãnhã ma pika pē Masetõn wỳr mō. Hãmri mẽ mẽ hkôt ixpa grire mẽ ma kormã mẽ awỳr Korît wỳr mō. ⁶ Hãmri mẽ pøj mẽ mẽ akôt ri ixpa ryy mẽ. Nē ixtã amgrã pixi mẽ hapêx mẽ rĩ kormã ma axte nhãm krĩ hõ hwỳr mō. Nē inhnojarēt ka mẽ ixto Tĩrtũm wỳ nē inhmã ixàpkur xà hkwy gõ pa ma mẽ hwỳr pry hã hkur o mō. ⁷ No ixte mẽ awỳr ixpõx mẽ tokyx mẽ akurũm ixkator mẽ hpãnhã ma nhãm krĩ hõ hwỳr inhmõrja na inhmã hprãm kêt. Jakamã koja Tĩrtũm kãm ja mex pa arĩ ri mẽ akôt ri ixpa hã ixtã mytwrỳ xohtõ mẽ tokyx ma nhãm inhmõr kêt nē. ⁸ Kot paj kormã jar Epes kamã ri ixpa rãhã nhũm mẽ hkĩnh pē Pētekos kato mẽ hapêx pa rĩ kormã ma Masetõn wỳr mō. ⁹ Na pa hte jar kormã mẽ kãm Jejus kapēr jarēnh o ri mẽ hkôt ixpa nhũm mẽ ohtõ mẽ inhmar o pa. Mẽ kãm mar prãm. Tã no nhũm mẽ hkwyjaja ohtõ mẽ mẽ kêp ja omnuj mẽ nhũm mẽ hã ixkamã gryk mẽ ixtomnu o pa.

*Mẽ kot Ximotre ho mex ã mẽ harēnh
Hapuhã Juãw 5*

¹⁰ Nē kwa koja Ximotre mẽmo arĩgro hã mẽ awỳr pøj ka mẽ omu mẽ ho mex mẽ. Nē mẽ amnhĩ nhõrkwỹ hwỳr awỳ kê mẽ akutã apkur o pa. Na hte

ixpyrà nê Pahihti Jejus mã tanhmã amnhĩ nhĩpêx to mex o pa. ¹¹ Kormã mẽ pahkĩnhã nyw tã kêr ka mẽ tee ri ja hã omu nê ri axpên mã tanhmã harênh to hkêt nê. Mê âm akapêr mex pix o kãm akapêr. Nê koja akupÿn nojarêť ka mẽ pry hã kãm apkur xà hkwȳ gô kê mex pê man akupÿn ixwÿr mō pa tokyx omu. Kot paj jar mẽ pahkwÿjê mẽ akupÿn hpôx kamã ijamak o ixpa.

¹² Nê na pa hte xatã jar mẽ pahtō Aporja ma mẽ awÿr mōr kaxyw mẽ awÿr hano. Kot jar mẽ pahtō hkwȳjê mẽ ma mẽ awÿr mōr kaxyw. Nom kormã. Koja xep mẽ jar tanhmã amnhĩ to hpa nê rĩ kormã ma mẽ awÿr mō.

*Kagà jatur xà kamã Pawre kot mẽmoj tã karō
Epes 6.10-12; Sikũn Ximotre 1.7; Wam Pêtre 5.8-9*

¹³ E kwa kêr ka mẽ arĩ amnhĩ wÿr Jejus kamã ajamak rãhã ho ri apa. Nê hamãr pê kutêp tãm amnhĩ nhĩpêx o ri apa. Nê amnhĩ kaxyw hkôt ajamaxpêr tÿx rãhã nê.

¹⁴ Nê mẽ amã axpên kĩnh pê tanhmã axpên to mex to.

¹⁵ Mãn ka mẽ ra Estepti mẽ hkwȳjê jarênh ma. Mẽ hkumrêxjaja na prem pika pê Gres kamã Kris kôt amnhĩ xunhwÿ. Tã xep mẽ ra Kris kôt hkwȳjê ho mex o ri mẽ hkôt pa. ¹⁶ Kêr ka mẽ ã mẽ kot amnhĩ nhĩpêx anhÿr xwÿnhjê kapêr ma nê hkôt ri amnhĩ nhĩpêx o ri apa. Mẽ kot Kris mã mẽ ajamãr xwÿnh piitã kêr ka mẽ kapêr ma nê mẽ hkôt ri amnhĩ nhĩpêx mex nê.

¹⁷ Nê ota Estepti nê Akajkre nê Putunatreta na mẽ ra jar pōj. Pa mẽ Sostenes mẽ wa mẽ omu nê wa ixkĩnh nê. Te ixte mẽ apumunh nê ixkĩnh tÿxta

pyràk. ¹⁸ Na xep prem ma mẽ awỳr mō nē tanhmã mẽ amã kapēr to ka prem mẽ ama nē akĩnh nē. Tã mẽ ra amnē ixwỳr mō nē tanhmã inhmã kapēr mex to pa mẽ kuma nē ijaxwỳja ixkĩnh nē. Kwa kēr pu mẽ ã mẽ kot mẽ panhĩpêx anhỳr xwỳnhjê ho mex o papa.

¹⁹⁻²⁰ Nē ota jar pika pê As kamã Kris kôt mẽ pahkwỳjaja piitã mẽ awỳr hpēr mẽ. Nē Akir mẽ hprō Prisireja wa. Nē wa òrkwỳ kamã mẽ kot Tĩrtũm mã amnhĩ jarēnh kaxyw mẽ pikuprõnh xwỳnh piitã mẽ awỳr hpēr mẽ.

Nē kēr ka mẽ nhỹri axpēn pumu nē mẽ apê Kris kôt mẽ ate axpēn to atō nē atõx ã axpēn mã akapēr mex nē akĩnh nē.

²¹ E kot paj kagà jatur xà kamã inhĩhkra ho mẽ amã amnhĩ nhĩxi nhĩpêx ka mẽ omu. Koja inhmã ixkapēr ã kagà xwỳnhhta ja hã kagà hkêt nē. Pa kot paj hipêx. Ixpê Pawre na pa ã amnhĩ nhĩxi nhĩpêx anē ka mẽ omu.

²² Nē kwa kēr ka mẽ arĩ amã Pahihti Jejus kĩnh o ri apa. Koja mēhō kãm hkĩnh kêt hã koja Tĩrtũm ja hã homnuj tỳx kumrēx.

E “maranat.” Mẽ pakapēr kãm na htem maranat jarēnh o: “Kwa tokyx akupỹn mẽ ixwỳr wrỳ Pahihti.” Anē.

²³ E kê Pahihti Jejus Krisja mẽ ato mex nē mẽ akutã nojarêt rãhã ho pa. ²⁴ Ixpyrà nē mẽ apê Jejus Kris kwỳ jakamã na pa hte inhmã mẽ akĩnh nē.

Tã ãm ja pix. Ixpê Pawre na pa ã mẽ awỳr kagà nhĩpêx nē mēnh anē.

Tĩrtũm kapēr ã kagà nyw **New Testament in Apinayé (BR:apn:Apinayé)**

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

383a4e22-34cd-505f-9cc2-2f9921e7aa9f